

2026

**IULAI -
SETEMA**

Vol. 102, No. 3

**Lesona Fa'a-Tusi Paia o le
Sapati**

Vasega Matutua



Savavali Faatasi ma Iesu

**O se savaliga vavalalata ma le Atua
e ala i La'asaga iā Keriso**

LESONA O I TOTONU

1. O le Alofa o le Atua i le Tagata	5
2. Manaoga o le Tagata Agasala iā Keriso	10
3. Salamō	15
4. Fa'aali Atu	20
5. Fa'apaiaina	26
6. Fa'atuatuaina ma Taliaina	31
7. O le Tofotofoina o lē Ua Fia Avea ma So'o	36
8. O le Tupu A'e iā Keriso	41
9. O le Galuega i le Olaga Nei	46
10. O le Iloaina o le Atua	52
11. O lo Tatou Tofi o le Tatalo	57
12. O Le Mea e Faia i le Masalosalo	62
13. Olioli i le Alii	67

O Lesona o le Tusi Paia o le Sapati, o se polokalame o suesuega i aso taitasi, e faavae i le Tusi Paia ma le Agaga o Valoaga e aunoa ma ni faamatalaga fa'aopoopo. O upusi'i e pu'upu'u e mafai ai ona maua ai ni manatu pu'upuu ma tu'usao. O puipui [] o lo'o tu'uina atu i nisi tulaga e fa'amautinoa ai le manino, ia tala'aga talafeagai, ma le faigofie ona faitau. O nisi su'esu'ega i luga o punaoa e matua fautuaina lava.

Fa'ata'ita'iga: Adobe Stock i luga o le faavaa pito i luma ma i. 4, 25, 72; Fa'afanua Punaoa i i. 51, 72.

Puleaina 2025 e le Seventh Day Adventist Reform Movement General Conference, Sabbath School Department, 5240 Hollins Road, Roanoke, Virginia 24019, USA.

Telefoni: 1-540-362-1800 Upega tafa'ilagi: www.sdarm.org. I-meli: info@sdarm.org

Fa'atomuaga

O se fa'asologa lenei o lesona mo le suesueina mo lenei kuata, "Savavali Fa'atasi ma Iesu," o lo o fa'avae mai i le tusi ua fa'aigoaina o, La'asaga iā Keriso. E mafai ona faitauina lenei mea, mai i lea matā'upu i lea matā'upu, o se fa'amatalaga o lesona o le Tusi Paia.

O nisi o tamaiti a'oga o le A'oga Sapati o le a latou manatunatu i le taimi mulimuli na talanoaina ai lenei mataupu i le kuata muamua o le tausaga 1980. O se fiafiaga tele ia i matou le toe tu'uina atu o nei lesona i ni faiga fou ma nisi o mea fa'aopoopo, peita'i o nei upumoni loloto na aumaia i aso ua mavae.

O le tele o taimi e mafaufau ai tagata i lo latou Tamā fa'alelagi e peisea'i o se mea malūlū ma taumamao lava, e peisa'i o se fa'amasino sauā ma faigata. Ma ua avea ma mea ua latou lē amana'iaina ai le loloto o Lona alofa mo i latou, ma Lana tausiga alofa o loo i Lona finagalo mo Ana fanau uma.

E tatau ona avea le alofa o le Atua ma mea muamua lava e ao ona fa'ailoaina atu. Ona tatau lea ona mulimuli i le mea moni e fa'apea o le tagata agasala ua aunoa ma se fesoasoani ma leai se fa'amoemoe, e ao ona manaomia se Fa'aola. O le soifuaga o Keriso, o lē na afio mai e lavea'i tagata agasala, o loo fa'ailoa mai ai o loo i ai se auala mautinoa e toe foi atu ai i le Tamā fa'alelagi.

O autu o loo talanoaina i nei lesona e fa'atatau lea i aafiaga tetele i le olaga faa-Kerisiano ma e fa'apitoa lava mo le tagata talitonu ua fa'afouina i le fa'atuatua o loo sailia lona tuputupu a'e i le alofa tunoa. E tatau i tagata talitonu uma ona toe iloilo ia mataupu i lea taimi i lea taimi, e le gata e mo lo latou lava manuia, a 'ia latou iloa foi le auala sili e mafai ona fesoasoani atu ai i isi ina 'ia o mai iā Keriso.

O se fa'atulagaga fa'atulagaina o upu moni fa'avae e mafai ona ta'ita'iina atu ai i se malamalama'aga manino ma taliaina ai ona a'oa'oga, ma taliaina ai se tagata i le avea ai o ia ma totino o le ekalesia. Ae afai e lē o le auala lea e aumaia ai se tasi ina ia fetaia'i ma Keriso, e lē o ia te ia la se a'afiaga moni mo lona ola e fa'avavau. E moni, e na'o lē e "fa'atuatua i le Alo ua ia te ia le ola e fa'avavau" (Ioane 3:36).

E tatau i tagata uma o le A'oga Sapati ona i ai se molimau a le Agaga, fa'atasi ai ma o latou lava agaga i le avea ai o i latou ma suli moni i le aiga o le Atua. E tatau i tagata ta'ito'atasi uma ona iloa o latou lava faaa'oa'oga, o lo latou lava fa'alagolago pea i le Tama fa'alelagi i taimi uma ma mea uma, e tatau ona fa'amaonia ma avea ma mea tāua ma aogā. E sili atu mea e mana'omia nai lo le alofa vaivai fa'aletagata. E mana'omia e tagata uma le alofa o le Atua - le alofa lē fa'apito o le Atua - lea ua totona i o latou loto ma agaga ina ia latou alolofa ai e fa'apei ona Ia alofa mai.

Ia avea lenei ma a'afiaga o tagata uma o le A'oga Sapati.

O le Matagaluega o le A'oga Sapati a le Koneferenisi Aoao

Taulaga o le Sapati Muamua

Sapati, Iulai 5, 2026



Fa'alauteleina o le Ekalesia i Chennai, Initia

O Chennai, sa ta'ua muamua o Madras, o le laumua ma le a'ai tele o Tamil Nadu, o se setete e i le itu i saute o Initia. O lo'o i luga o le Talafatai o Coromandel o le Fagaloa o Bengal. E tusa ai ma faamaumauga a Initia i le 2011, na ma'ua ai o Chennai o se a'ai e lona ono i le faatulagana e sili ona to'atele tagata Initia e nofoia, ae lona fa i le faitau o taulaga e sili ona tumutumu i ai tagata. Na fa'avaeina i le 1688, o le Greater Chennai Corporation o se fa'alapotopotoga pito i leva o Initia, ma lona lua, o se vaega lenei e sili ona to'atele tagata i le lalolagi e faamautu ai e aupito ane ia Lonetona anamua. E iai lona nofoaga tutotonu mo fefa'ataua'iga ma pisinisi pe a ma le 15,000 pisinisi e iai, ma o se nofoaga autu mo turisi fa'afoma'i, ua ta'ua o le 'Laumua o le Soifua Maloloina a Initia.' O lo'o iai fo'i i lenei a'ai se vaega tele o pisinisi ta'avale afi a Initia, o le mafua'aga lea o le isi ona igoa, 'Detroit o Initia.' Na o Chennai le aai i Saute o Asia na faatulagaina i totonu o le National Geographic 'Top 10 Food Cities' i le 2015 ma ua faatulagaina i le iva pito i luga o aai faavāomalo sili ona ta'uta'ua o le lalolagi ua ta'ua o le Lonely Planet.

Ua silia nei ma le 12 miliona le faitau aofa'i o tagata o Chennai, ma o lo'o fa'atupula'ia pea lona faitau aofai i le 2.34% i le tausaga. O le aai e nofoia e ituaiga tagata eseese ma a o latou talitonuga fa'alotelu, o tu ma aganuu eseese. E tusa ai ma le faitauga o tagata i le 2011, o le toatele o le faitau aofa'i o tagata Chennai, o tagata Hindu (80.73%) pito ane i ai Mosalemi, 9.45%, o le 'au Kerisiano i le 7.72%, 1.27% isi ituaiga talitonuga, ma le 0.83% e lē o faailoina o latou talitonuga.

E tusa ai ma faamaumauga i le 2019, o le 40% pe tusa lena o le 1.788 miliona aiga o loo nofoia le aai, e i le laina o tagata matitiva. E oo mai i le 2017, e 2.2 miliona aiga o lea vaega o le aai, ma le 40% o tagata o loo nonofo ai e leai ni o latou fale. E tusa ma le 1,131 nofoaga pito i matitiva e i le aai, o loo nonofo ai le silia ma le 300,000 aiga. O lenei aai e nofoia e ituaiga o tagata eseese, ma e manaomia ona faalogo nei ituaiga uma o tagata i le talalelei e faavavau a Iesu Keriso i nei ona aso e gata ai.

O le mafua'aga lea e le'i mafai ai ona matou faamae'aina le fausiaina o se falesa i Chennai e tusa ma le taimi na atofaina e faaumaina ai, ona o tulaga faigata i mea tau tamaoiga. I le taimi nei, o loo faagasolo le galuega, ma ua matou iloa ai, e manaomia fo'i ona fausiaina ma se maota o le faifeau, o se fale fono, ma ni potu a'oga mo tamaiti a'oga o le A'oga Sapati. O le mea lea ua matou matua manaomia ai lava la outou fesoasoani ina ia mafai ona faataunuaina lenei fa'amoemoe e ala i le lagolago mai a o tatou uso pele ā ekalesia i le lalolagi atoa.

Ua matou talosaga atu ai ma le agaga e tumu i le faaaloalo ia te outou uma lava uso ma tuafafine pele, faapea le au talavou ina ia outou alofagia la matou talosaga atu mo la outou foa'i ma le loto malie mo lenei galuega tele. Matou te mua'i fa'afetai atu ai e tusa ma la outou foa'i o le a tauaaoina, ma ia saga faamanuia tele atu le Ali'i ia te outou uma lava le au uso pele.

O ou uso ma tuafafine i Chennai

O le Alofa o le Atua i le Tagata

MAU AUTU: “Fa’auta i le silisili o le alofa ua foaiina mai e le Tamā ia te i tatou, ina ua ta’ua i tatou o fanau a le Atua: o le mea lea e lē iloa ai i tatou e le lalolagi, auā na lē iloa o Ia” (1 Ioane 3:1).

Faitauga Fautuaina: *Steps to Christ, chapter 1, pp. 9-15.*

“O le Atua o le alofa lava ia. E pei o ave o le malamalama mai le Ia, o le alofa ma le malamalama ma le olioli e tafe mai iā te Ia i mea uma o Lana foafoaga.” - *Thoughts from the Mount of Blessing, p. 77.*

1. O LE ATUA O LE ALOFA LAVA IA

Ulua’i Aso, Iuni 28

a. O a fa’amaoniga o le alofa o le Atua ua foaiina mai i tagata?
Esoto 34:6, 7; Iona 4:2 (vaega mulimuli); Ieremia 31:3.

“O le afioga a le Atua ua fa’aalia mai ai Lana amio. O Ia lava ua folafola mai Lona agalelei ma Lona alofa mutimutivale e lē mafaitaulia. Ina ua fai atu Mose, ‘Ia E fa’aali mai ia te a’u Lou mamalu,’ A ua fetalai mai Ieova, ‘Ou te fa’auitu Lo’u lelei uma i ou luma. Esoto 33:18, 19. O Lona mamalu leni. Na ui atu Ieova i luma o Mose, ma na ta’u mai, ‘O Ieova, o Ieova, o le Atua e alofa mutimutivale ma le alofa fua, e telegese Lona toasa, e tele Lona alofa ma le fa’amaoni, o lē tausī le alofa e oo atu i afe o tupulaga, o lē fa’amagalo fo’i i le amiolētonu ma le solitulafono ma le agasala.’ Esoto 34:6, 7. E ‘telegese Lona toasa, ae tele Lona alofa,’ ‘auā e fiafia o Ia i le alofa’ Iona 4:2; Mika 7:18.” - *Steps to Christ, p. 10.*

e. O le a le fa’amoemoega o le Atua i le auina mai o Lona Alo?
Mataio 11:27; Ioane 14:8, 9.

“Na ta’ita’ia e Satani tagata ina ia latou manatunatu i le Atua - o se fa’amasino sauā, o se tagata faigatā ma lē alofa. Na ia mata’ituina lē na Foafoaina mea, o se tagata o lo’o mata’ituina ma le lotoleaga ina ia iloa ai mea sesē ma mea lē sa’o a tagata, ina ia mafai ona Ia fa’asalaina i latou. O le mea lea na afio mai ai Iesu e mau fa’atasi ma tagata ina ia aveeseina ai leni pogisa, e ala i le fa’aalia mai o le alofa lē māfuatia o le Atua.” - *Ibid., p. 11.*

a. Na fa'apefea ona fa'amatalaina e Iesu Lana misiona i le lalolagi? Luka 4:16-18.

“[Luka 4:18.] O le galuega lenei [a Iesu]. Sa Ia femaliua'i ma faia mea lelei ma fa'amalolo i latou uma na sauāina e Satani. Sa i ai ni nuu e lē'i fa'alogoina ai se auē i lea fale ma lea fale ona o ma'i, auā na Ia ui atu ia i latou ma fa'amaloloina o latou ma'i uma. O Lana galuega na fa'amaonia ai Lona fa'au'uga fa'alelagi. O le alofa, ma le alofa mutimutivale, ma le agalelei na fa'aalia i galuega uma o Lona soifuaga; Na fa'atumuina Lona finagalo i le alofa mutimutivale mo le fanau a tagata. Auā na Ia tauaveina le natura o le tagata, ina ia mafai ai ona Ia ausia manaoga o le tagata. O i latou o ē matitiva ma tagata lotomauualalo latou te le'i fefefē e fa'alatalata atu ia te Ia. E oo lava i fanau iti na tosina atu ia te Ia. Na latou fiafia e tasi'i i Ona aao ma va'ava'ai atu i Ona fofoga o loo Ia manatunatu loloto mo i latou i Lona alofa mutimutivale.” - *Steps to Christ, pp. 11, 12.*

“Na silafia e Iesu mai agaga uma se tasi e ao ona ofoina atu i ai se vala'aulia mo Lona malo. Na Ia pa'i atu i loto o tagata i Lona ui atu i totonu o i latou e peisea'i o se tagata o loo naunau mo lo latou lelei. Na Ia sailia i latou i nofoaga e tumutumu iai tagata, i fale uma taitasi, i luga o va'a, i sunako, i tafatafa o vaituloto, e oo lava i le tausamiga o le fa'aipoipoga. Na Ia feiloa'i ma i latou i ā latou galuega i aso taitasi, ma fa'aalia ai Lona naunau mo ā latou mataupu fa'alelalolagi. Na Ia tu'uina atu Ana a'oa'oga i totonu o aiga, ma aumaia aiga i o latou lava fale i lalo o se a'afiaga o Lona afioaga paia. O le malosi o Lona agalelei fa'aletagata na Ia fesoasoani ai i le manumaloina mai o loto o tagata. O Lana masani o Lona alu atu lea i luga o mauga ma tatalo toatasi ai, auā o se sauniuniga lea mo Lana galuega mo tagata i le taimi atoa o Lona soifuaga galue. Na afio mai o Ia e fa'amalolo i ē mama'i, e a'oa'o i ē o pouliuli pea, ma motusia filifili uma mai i ē ua fusifusia e Satani.” - *The Desire of Ages, p. 151.*

e. E ui lava ina tumu o Ia i le alofa ma le agalelei, o le a se fa'ata'ita'iga o le fa'amaoni o Keriso i le a'oa'iina o mea sesē? Ioane 9:39-41; Mataio 21:12, 13.

“E le'i taofia e Iesu se upu moni lava e tasi, ae na Ia a'oa'o atu i taimi uma ma le alofa. Na Ia a'oa'o atu ma le fa'autauta ma se mafaufau sili ona loloto, ma Lona agalelei i Ana feso'ota'iga uma ma tagata. E lē o Ia o se tagata sauā, e le'i tautala fua i se upu fa'atigā, e le'i fa'atigā fua i se agaga o loo i le atuatuva'e. Na te le'i fāitioina vaivaiga fa'aletagata. Na Ia tautala tu'usa'o atu i le upu moni, ae sa i ai lava i Lona finagalo le alofa i taimi uma lava. Na Ia ta'usalaina le pepelo fa'a'ole'ole, ma le tagata lē talitonu, ma lē amioleaga; peita'i na Ia tautala atu ma loimata i Lona fofoga a'o Ia fetalai atu i Ana a'oa'iga ma'ama'ai.... E tāua agaga uma i Lana silafaga. E ui o loo Ia tauaveina pea Lona lava natura ma le mamalu fa'alelagi, ae na Ia aapa mai ma le alofa tele i tagata uma o le aiga o le Atua. Na Ia silafia o Lana galuega ma Lana misiona le lavea'iina o i latou o ē ua pa'u'u ma fa'atoilaloina.” - *Steps to Christ, p. 12.*

a. O le ā le avega mamafa na tauaveina e lo tatou Fa'aola i Lona soifua? Isaia 53:5-7; Luka 2:48, 49.

“Na tauave e Iesu le mamafa tele o le galuega mo le fa'aolataga o tagata. Na Ia silafia afai e leai se suiga maumaututū i fa'avae ma fa'amoemoega mo le aiga tagata, o le a leiloa ma leai se fa'amoemoe o tagata uma. O lea le avega na Ia tauaveina i Lona finagalo, ma e leai se tasi na te mafai ona malamalama i le mamafa o le avega na Ia tauaveina i Ona luga. Na femāliua'i ma savali na o Ia i le taimi o Lona tamaitiiti, talavou, se'ia avea ma tagata matua. Ae peita'i, sa i ai lava le lagi i le mea na Ia femāliua'i ai. O aso ta'itasi uma lava na Ia fetaia'i ai ma tofotofoga ma fa'aosoosoga; mai i na aso ta'itasi uma na aumaia ai o Ia e fetaia'i ma le leaga, ma molimauina ai Lona mana ia i latou na Ia sailia e fa'amanuia ma lavea'i. E ui i na fa'aosoosoga uma, ae na te le'i toilalo pe fa'avaivai ai.

“Mai i nei mea uma lava, na Ia aumaia ai Ona mana'oga i le tu'uina atoatoa atu mo Lana misiona. Na Ia fa'amamaluina Lona soifua e ala i le tu'uina atu o mea uma i le finagalo o Lona Tamā. A o itiiti o Ia, na fesili atu Lona tina, ina ua maua o Ia i le a'oga a le 'au rapi, 'La'u tama e, se a le mea ua e fa'apea mai ai iā te i ma'ua?' Na Ia tali mai i Lona tinā—ma o Lana tali o le autu lea o Lana galuega i Lona olaga atoa—'Se a le mea na oulua saili mai ai iā te A'u? Pe lua te le'i iloa ea e tatau ona Ou i ai i le galuega a lo'u Tama?'

“O Lona soifuaga o se olaga e tumu i le fa'ataulaga ofo. Sa leai sona aiga i lenei lalolagi, vagana ai ni uo agalelei na saunia ni mea mo Ia a o avea ai o Ia ma tagata faimalaga. Na afio mai o Ia e soifua ma ola mo i tatou i se olaga o ē na sili ona maulalo ma mativa, ma feafioa'i ma galulue fa'atasi ma le tagata mativa ma le tagata puapuagatia. E ui ina lē iloa o Ia e tagata ma lē tauāloa, ae sa Ia femāliua'i i totonu o le lotolotoi o tagata ma Ia faia le tele o mea lelei mo i latou.” -*Gospel Workers*, p. 42, 43.

e. O le ā le mea ua a'oa'oina mai e ala i le fa'amaligi mai o le alofa taumasuasua o le Atua e uiga i lo tatou Tamā fa'alelagi? Ioane 3:16; 1 Ioane 4:9, 10.

“O lenei taulaga tele e le'i fuafuaina ma faia ina ia fa'atupuina ai le alofa i le finagalo o le Tamā i tagata, pe ina 'ia lē i ai ai fo'i se fa'anaunauga ia te Ia mo se lavea'iga. E leai, e matuā leai lava! 'Auā ua fa'apea lava ona alofa mai o le Atua i le lalolagi, ua Ia auina mai ai Lona Alo pele e toatasi.' Ioane 3:16. E alofa le Tamā ia i tatou, e lē ona o le taulaga tele o le togiola, ae ona na Ia saunia le togiola auā e alofa o Ia ia i tatou. Ua avea Keriso ma auala e mafai ai ona Ia sasaa atu Lona alofa e lē mafuatia i luga o se lalolagi ua pa'ū. 'O lenei, sa i totonu o Keriso le Atua, ua toe fa'aleleia e Ia le lalolagi ia te Ia.' 2 Korinito 5:19. Na tigā fa'atasi le Atua ma Lona Alo. O tigā o Ketesemane, ma Lona maliu i Kalevario, o le tau lena na totogi ai e se loto e tumu i le Alofa e lē māfuatia lo tatou fa'aolataga.” - *Steps to Christ*, p. 13.

a. O le a le fa'avae mo le fa'aolataga o ō tatou agaga? 1 Korinito 1:30; Galuega 16:31.

“E, le gālala ma le naunau o le agaga o Keriso e fa'aola i lē ua leiloa! E le'i avea le fa'atautauina o Lona tino i luga o le satauro ma mea na aveesea mai ai Lona tulaga paia, ma Lona mana Atua ina ia lavea'iina mai ai o Ia e ala i Lana taulaga fa'aletagata mo i latou uma o ē na talia Lana amiotonu. I Lona maliu ai i luga o le satauro, na Ia aveesea mai ai le agasala mai le tagata solitulafono i le avea ai o Ia ma Sui e ala i le fa'atuatua ia te Ia o lona lava Fa'aola. O agasala a se lalolagi solitulafono, e ui lava ina fa'atusaina e pei o le 'ie mūmū ulaula,' ae na tu'uina atu lava i se Molimau Moni fa'alelagi.” -*This Day With God*, p. 236.

e. O le a se mea na faia e Keriso mo lo tatou fa'aolataga e sili atu nai lo soo se taumafaiga po'o se poto fa'aletagata? Ioane 10:17; Roma 5:6-8.

‘Ua alofa tele Lo'u Tamā ia te outou, ae ua sili atu Lona alofa ia te A'u ona o le foa'iina atu o Lo'u ola e togiola a'i outou. I le avea ai o Ia ma Sui ma Amiotonu mo oe, o le tu'uina atu o Lo'u ola, ma le tauaveina o ou noataga, o au solitulafono, o le mea lea ua pele ai a'u i Lo'u Tamā, auā o La'u taulaga, e ta'uamiotonuina ai e le Atua lē ua fa'atuatua ia Iesu ma ua Ta'uamiotonuina.’

“E leai se tasi na te mafaia ona faia se togiola mo i tatou, vagana ai le Alo o le Atua; auā ua na'o Ia o lē sa i le fatafata o le Tamā e mafai ona fa'aailoa mai o Ia. Ua na o Ia o lē na silafia le maualuga ma le loloto o le alofa o le Atua e mafai ona fa'aalia. E leai se mea e itiiti ifo nai lo le taulaga lē māfuatia na faia e Keriso mo le tagata ua pa'ū e mafai ona fa'aalia mai ai le alofa o le Tamā i le aiga tagata ua leiloa.” -*Steps to Christ*, p. 14.

i. O le a se mea ua fa'aailoa mai e Ioane na ia molimau iai e uiga i lo tatou fautua o i luma o le nofoāli'i o le Atua? 1 Ioane 1:1-3.

“E to'aitiiti lava i latou e malamalama i le uiga mata'utia o le agasala, ma latou malamalama ai i le tele o le malaia e mafua mai i le soliga o le tulafono a le Atua. E tusa ai ma le fuafuaga ofoofogia o le togiola ina ia toe fa'afo'isia mai ai i le tagata agasala le fa'atusa paia o le Atua, ua tatou iloa ai o le auala lea e tasi mo le lavea'iina o le tagata na faia e ala i le taulaga ofo fua na Ia faia, atoa ai ma le fa'amaualalo ma le alofa lē māfa'atusalia o le Alo o le Atua. Ua na o Ia lava na i ai le malosi e tau ai taua ma le fili mata'utia o le Atua ma tagata, ma, i le avea ai ma o tatou sui ma lo tatou mautinoaga, na Ia tu'uina atu ai le mana poo le malosi ia i latou uma o ē piimau atu ia te Ia i le fa'atuatua, ia avea ma manumalo ona o Lona suafa, atoa ai ma Ana galuega lelei uma lava.” - *Christian Education*, p. 112.

a. O le a le mea na agavaa ai Keriso na te totogiina le tau o lo tatou fa'aolataga? 1 Peteru 1:18, 19; Eperu 5:8, 9.

“O le taulaga e lē māfuatia na saunia e lo tatou Tamā fa’alelagi e ala i le foaiina mai o Lona Alo e maliu mo i tatou, o le tau lea na fa’atauina ai lo tatou fa’aolataga, lea e aumaia ai iā i tatou ni fa’amoemoega silisili i le mea e mafai ona tatou ausia e ala ia Keriso. A o osofia le aposetolo o Ioane i va’aiga maualuga, ma le loloto, ma le lautele o le alofa o le Tamā i le fanau a tagata a fano, na fa’atumuina ai o ia i le mata’u ma le gatete; ma, o se va’aiga e lē mafai e upu ona fa’amatalaina ai le tele ma le faula’i o lenei alofa, ma ua ia vala’au atu nei i le lalolagi ina ia latou va’ava’ai i ai... Oka se matuā tāua tele o lenei mea mo le tagata! Ona o le solitulafono ua avea ai le fanau a tagata ma pologa ma auauna a Satani. Peita’i, e ala i le fa’atuatua i le taulaga togiola a Keriso, ua avea ai nei atalii uma o Atamu ma fanau a le Atua. I le tauaveina ai o le natura fa’aletagata, na siitia ai e Keriso le tulaga o le tagata. Ma ua tu’uina ai nei le tagata ua pa’u i se tulaga e mafai ona avagaa ai i latou e ta’ua o le ‘fanau a le Atua’, e ala iā Keriso.” *-Steps to Christ, p. 15.*

e. O a upu na fa’aaogā e le aposetolo o Ioane e fa’amatalaina mai ai le tele o le alofa o le Atua? 1 Ioane 3:1, 2.

“E leai se alofa e tusa ma lenei alofa. O fanau a le Tupu fa’alelagi! O se folafolaga matagofie! O se fa’amoemoega mo se mafaufau sili ona loloto! O le alofa e lē māfa’atusalia o le Atua mo se lalolagi e le’i alolofa ia te Ia! O se mafaufau o iai se mana e manumaloina ai le agaga ma aumaia ai le mafaufau e fa’atagataotauaina i le finagalo o le Atua. O le tele o lo tatou su’esu’eina o le amio fa’apa’iaina e ala i le malamalama o le satauro, o le tele foi lena o lo tatou va’aia o le alofa tunoa, ma le agamalu, ma le fa’amagaloga ua tu’ufa’atasia ma le amiotonu ma le faamasinoga tonu, ma o le sili atu foi lea ona manino o lo tatou iloa o fa’amaoniga e lē mafaitaulia o se alofa e lē mafa’atusaina ma se alofa mutimutivale e sili atu nai lo le alofa o se tinā i lana tama lē usiusita’i.” *-Ibid.*

FESILI TOE FA'AMANATU

Aso Faraile, Iulai 3

1. Fa’amatala uiga sili ona tāua o le amio a le Atua.
2. Na fa’apefea ona fa’aalia e Iesu le amio a le Atua a o i ai i le lalolagi?
3. Na fa’apefea ona tosinaina e le misiona a Keriso Ana filifiliga?
4. I le avea ai o Ia ma o tatou Sui, o a ni lesona na a’oa’oina e Iesu?
5. Fa’amatala le meaalofa silisili a Keriso mo i tatou.

Mana’oga o le Tagata Agasala ia Keriso

MAU AUTU: “Ua tali atu Iesu, ua fa’apea atu ia te ia, E moni, e moni, Ou te fai atu ia te oe, a lē toe fanau le tagata, e lē mafai ona iloa e ia o le malo o le Atua” (Ioane 3:3).

Faitauga Fautuaina: *Steps to Christ, chapter 2, pp. 17-22.*

“Ua na o Keriso lava le fa’amoemoega e tasi mo le togiolaina o i tatou o le aiga tagata ua toilalo.” -*The Desire of Ages, p. 147.*

1. O LE ULUA’I TULAGA O LE TAGATA

Ulua’i Aso, Iulai 5

a. Fa’amatala le ulua’i tulaga sa i ai le tagata i Etena. Kenese 1:26, 27, 31; Salamo 8:4-6.

“Na mua’i tu’uina atu i le tagata i le amataga uiga fa’amamaluina atoa ai ma se mafaufau e atoatoa ma paleni lelei. Sa malosi atoatoa lona tino, ma sa ōgatasi ona mana’o ma le finagalo o le Atua.” - *Steps to Christ, p. 17.*

“Na fa’apena ona tauaveina e le tagata le fa’atusa o le Atua, e lē gata i foliga va’aia ae fa’apea fo’i i le amio. Peita’i, ua na o Keriso lava, o le ‘fa’atusa moni’ (Eperu 1:3) o le Tamā, peita’i, na faia le tagata i le fa’atusa o le Atua. O le natura o le tagata sa ōgatasa lelei ma le finagalo o le Atua. Sa mafai e lona mafaufau ona malamalama lelei i mea paia. Sa mamā ona lagona, o ona manaoga ma ona fa’anaunauga sa pulea e se mafaufau fa’apa’iaina. Sa mamā ma paia ma fiafia o ia i le tauaveina o le fa’atusa o le Atua, ma na ia usiusitai atoatoa atu i Lona finagalo.” -*Patriachs and Prophets, p. 45.*

e. Na fa’apefea ona galue Satani e fa’aleagaina le fuafuaga fa’alelagi i le foafoaina o le tagata? Kenese 3:1-7; Roma 6:16; 1 Ioane 2:16.

“Peita’i, o le lē usiusitai [o le tagata] na fa’aleagaina ai lona natura, ma suitulaga ai loa le manatu fa’apito i le alofa. Na matuā fa’avaivaia lava lona natura ona o le soliga o le tulafono, lea na le mafai ai e ia, i lona lava malosi ona tetee atu i le malosi o lē o loo leaga. Ua fa’atagataotauāina o ia e Satani, i le semanū lava a tumau ai pea o ia i lea pologa e fa’avavau pe ana lē matuā tula’i mai ma aapa mai le Atua. O le fa’amoemoe lava lea sa i lē taufa’aosooso, ia fa’alavelaveina le fuafuaga paia fa’alelagi na ala ai ona faia o le tagata, ma fa’atumuina le lalolagi i le fa’anoanoa ma le mapuitigā. Ma mulimuli ane ai o le a ia fa’apea ane, ua mafua leni leaga uma talu ona ua faia o le tagata e le Atua.” -*Steps to Christ, p. 17.*

a. Ina ua mavae ona la'ua agasala, na fa'apefea ona tali atu Atamu ma Eva ina ua la fa'alogoina le si'ufofoga o le Atua? Kenese 3:8-10.

e. Aisea ua lē mafai ai e tagata agasala ona tutū i luma o le Atua Moni e Toatasi e Lē Māfuatia? Esoto 33:20; Teuteronomie 4:23, 24.

“A o avea le tagata e aunoa ma se agasala, sa matuā vavalalata le la mafutaga fiafia ma Lē ‘ua iā te Ia le oloa uma o le poto atoa ma le malamalama.’ Kolose 2:3. Ae peita’i, ina ua agasala o ia, sa lē toe mafai e ia ona maua sona fiafia i lea mafutaga paia, ma ua ia saili i se auala e lafi ai mai le Atua. O le tulaga lava lea ua i ai o le loto e le’i toe fuata’iina. Ua lē ogātasi ma le Atua, ma ua na lē maua se olioli i le mafuta fa’atasi ma Ia. E lē mafai e le tagata agasala ona fiafia pe a mafuta ma le Atua; o le a ia lagona le fefē i le mafutaga ma tagata pa’ia. Ana fai e fa’atagaina o ia e ulufale i le lagi, o le a lē maua e ia sona fiafia. Auā o le alofa mamā lē fa’apito o loo i ai lea i loto o i latou uma ua ‘ainā ai le lagi, lea e tali atu i le finagalo Alofa o Lē e lē Māfuatia—o le a lē tutusa lea ma uiga o loo ia lagonaina i lona agaga. O ona manatu, o mea e tāua i lona loto, o ona fa’amoemoega, o le a matuā eseese lava ia ma uiga mamā o i latou e leai se agasala o loo nonofo ai iina. O le a avea o ia ma leo pa’ulua i pese mālīe a le lagi. O le a avea le lagi ia te ia ma nofoaga e lē maua ai sona sa’olotoga; o lona mana’o ia lafi mai ia te Ia o Lē o loo fai ma malamalama o le lagi, i le ma le totonugalemu o ona fiafiaga. E lē ona o se finagalo fia tauimasui o le Atua e mafua ai ona taofia mai ai tagata amioleaga mai le lagi; ae peita’i, ua tapunia ese i latou ona o lo latou lava lē tatau ai mo lea fa’atasiga. O le a avea le pupula o le Atua ma afi e fano ai i latou.” - *Steps to Christ, pp. 17, 18.*

i. Aisea e lē mafai ai e le tagata ona ia sola ese mai le fa’asalaga o le agasala? Iopu 14:4; Roma 8:7, 8; Isaia 64:6.

“E le mafai e i tatou lava ona toe sosola ese mai le lua o le agasala ua tatou goto ifo ai. Ua leaga o tatou loto, ma ua lē mafai e i tatou ona toe liliuina. ‘O ai ea e mafai ona aumaia o se mea mamā nai le mea eleelea? e leai se tasi.’ Iopu 14:4... O a’oa’oga, o tū e masani ai, o le fa’aaogaina eseese o le mafaufau, ma taumafaiga uma fa’aletagata, e tofu uma ma o latou tulaga tatau ma aogā, ae peita’i, e lē mafai lava ona i ai so latou malosī e lavea’iina mai ai i tatou mai le nofo pologa i le agasala. Atonu e mafai e soo se foliga fa’apena ona fa’aalia mai ai o le amio tatau, ae e lē mafai ona suia pe fa’aliliuina ai o le loto; e lē mafai ona fa’amamāina ai punāvai o le ola. E ao lava ona i ai o se mana e galue mai totonu, o se ola fou mai lugā, a o lē’i mafai ona liua o le tagata mai le agasala i le amiotonu. O lea mana fa’alelagi o Keriso lava lea. Ua na o Lona alofa tunoa lava e mafai ona toe fuata’iina ai lo tatou ola fa’aleagaga na fai a tineia, ma fa’aliliuina atu ai o tatou loto i le Atua mo se olaga fa’apa’iaina.” - *Ibid., p. 18.*

a. O a mea e ao ona tatou iloa e uiga i le loto o le tagata? Salamo 14:1-3; Roma 3:9-11.

“Ua ta’u mai e le Afioga a le Atua, ‘Ua agasala tagata uma lava, ma ua le oo i le viiga o le Atua’ (Roma 3:23). ‘E leai se tasi ua amio lelei, e leai lava se tasi’ (Roma 3:12). E toatele ua fa’asesēina i o latou lava loto. Ua latou lē iloa, o le loto fa’anatura ua sili ona fa’a’ole’ole i mea uma, ma ua matuā leaga lava. Ua latou fusia i latou i la latou lava amiotonu, ma ua manatu i latou ua latou ausia tapulaa tau i le amio; peita’i, o le a matuā fa’ato’ilaloina lava i latou pe a latou lē ausia se uiga fa’apa’iaina, ma ua lē mafai ai e i latou ona latou ausia mana’oga o le Atua.” -*Selected Messages, bk. 1, p. 320.*

e. Aiseā ua lē mafai ai e i tatou o tagata ona iloa le malo fa’aleagaga ma vā’ai i le malo o le Atua? 1 Korinito 2:14; 2 Korinito 4:4.

“Na fetalai mai le Fa’aola, ‘A lē toe fanau le tagata,’ o lona uiga, pe a lē maua e ia se loto fou, ni mana’oga fou, ni fa’amoemoega fou, ma ni fa’atauga fou lea e ta’ita’iina atu ai o ia i se olaga fou, ‘e lē mafai ona iloa e ia o le malo o le Atua.’ Ioane 3:3. O le manatu ta’atele o le, ia tau lava ina atiina a’e o le lelei o lo’o i totonu o le tagata i lona natura fa’alea’oa’oga i auala eseese, peita’i, o se fa’asesēega lea e fano ai. ‘E lē talia e le tagata fa’aletino o mea a le Agaga o le Atua: auā o mea valea ia iā te ia: na te lē mafai fo’i ona iloa, auā e fa’amasinoina fa’aleagaga.’ ‘Aua e te ofo auā na ou fai atu iā te oe, E ao ina toe fanau mai outou.’ 1 Korinito 2:14; 3:7. Ua tusia fo’i fa’apea e uiga iā Keriso, ‘O iā te Ia le ola; o le ola fo’i o le malamalama lea o tagata’, e leai lava se isi ‘igoa i lalo o le lagi ua foa’iina mai i tagata, e mafai ona fa’aolaina ai o i tatou.’ Ioane 1:4; Galuega 4:12.” -*Steps to Christ, pp.18, 19.*

i. E ui lava e le mafai ona laveaiina e i tatou i tatou lava, o le a se mea e tatau ona tatou faia? Mataio 11:28-30; Ioane 3:3.

“Ua fa’aalia mai le Atua iā Keriso, ‘ua fa’aleleia e Ia le lalolagi iā te Ia.’ 2 Korinito 5:19. Talu ai ua matuā fa’aleagaina lava le tagata e le agasala, o le mea lea ua lē mafai ai e ia, i totonu ‘iā te ia lava, ‘ona ia oo atu i le lotogatasi ma Ia o Lē o Lona natura e matuā paia lava ma tumu i le agalelei. Peita’i, ina ua uma ‘ona togiolaina e Keriso le tagata mai le nofosala i le tulafono, na Ia foa’iina mai le mana fa’alelagi e o fa’atasi ai ma taumafaiga a le tagata. O lea la, e ala i le salamō i luma o le Atua ma le fa’atuatua ‘iā Keriso, o le a mafai ai e le fānau a Atamu ua paūū ‘ona aveva ma ‘fanau a le Atua.’ 1 Ioane 3:2.” -*Patriarchs and Prophets, p. 64.*

a. O le ā se a'afiaga o le aposetolo o Paulo ina ua ia iloa atoatoa lona tulaga o ia o se tagata e matuā agasala lava i luma o le Atua? Roma 7:12, 14, 24.

“E lē lava le na ona iloa o le alofa mutimutivale o le Atua ma Lona agalelei, ma tatou va'ava'ai atu i Lona uiga fa'apalepale ma Lana tausiga fa'a-Tamā. E lē lava fo'i lo tatou iloa o le poto ma le tonu o Lana tulafono ma lona fa'avae mau, o le alofa lea e fa'avavau. Na talitonu le aposetolo o Paulo i nei mea uma, ma ia fa'apea mai ai, ‘Ma te ‘au upu fa'atasi ma le tulafono, e lelei ia.’ ‘E paia lava le tulafono, ma le poloa'iga e paia, e tonu, ma ua lelei.’ Peita'i na ia toe fa'aopoopo mai ona o le mafatia tele o lona agaga - o le tiga ma le fa'anoanoa, ‘A o a'u ou te i la le tino, ua fa'atauina atu a'u e fai ma tagata o le agasala.’ Roma 7:16, 12, 14. Sa naunau atu o ia i le mamā ma le amiotonu, lea e leai sona malosi e ausia ai, ma ia alaga atu ai, ‘Auē o a'u le tagata malaia! O ai ea sē lavea'i iā te a'u ‘ai le tino o lenei oti?’ Roma 7:24. O le alaga lava lea ua alu a'e mai loto mafatia i nuu uma ma augatupulaga uma. Peita'i, ua na o le tasi lava le tali, ‘Fa'auta i le Tamai Mamoe a le Atua, na te aveesea le agasala a le lalolagi.’ Ioane 1:29.” - *Steps to Christ*, p. 19.

“E toatele ua latou iloa le leai o so latou fesoasoani, ma ua latou naunau atu ai mo lena ola fa'aleagaga lea na te aumaia i latou ia lotogatasi ma le Atua; o loo fai fua a latou tauiviga ina ia maua mai ai.... Peita'i, o loo aapa mai le Fa'aola i lē ua fa'atauina mai i Lona toto, ma ua Ia fetalai atu i ai ma le agamalu e tumu i Lona alofa mutimutivale, ‘E te fia malolo ea?’ ”-*Desire of Ages*, p. 203.

e. O le ā le auala na fa'amautinoa atu ai e le Atua ia Iakopo e le'i tu'ulafoa'iina o ia ina ua sola ese mai i lona uso o Esau? Kenese 28:10-13.

“[Sa lagona e Iakopo] ua pei ia o se tagata ua tuliese, ma sa ia iloa o nei fa'afitauli uma ua oo mai ia te ia ona o lana auala sesē. O lona fa'anoanoa ua pei o se ao pogisa na ufitia ai lona agaga, ma ua tau lē mafai ai ona ia tatalo. Peita'i o lenei ua matuā tuua toatasi lava na o ia ma sa ia lagonaina le manaomia o le puipuiga mai le Atua e pei ona ia le'i lagonaina muamua. Na ia fa'atoga ma loimata ma le fa'amaulalo loloto i luma o le Atua ma ia ta'utino atu ai lana agasala, ma aoi atu ai mo se fa'amaoniga e le'i tu'ulafoa'iina atoatoa o ia. Peita'i, sa le'i maua lava e lona loto mafatia se mapusaga. Ua leai sona talitonuina o ia lava, ma sa ia te ia le fefē ne'i lafoa'ia o ia e le Atua o ona tamā.

“Peita'i sa le'i tu'ulafoa'iina e le Atua Iakopo. Sa fa'aauau pea ona fa'alauteleina lona alofa mutimutivale i Lana auuana sesē ma le masalosalo. Sa fa'aalia ma le alofa mutimutivale e le Alii le mea tonu lava lea e manaomia e Iakopo, o lona mana'omia lea o se Fa'aola. O ia o se tagata agasala, peita'i, sa fa'atumulia lona loto i le agaga fa'afetai ina ua ia va'aia le fa'aalia mai o le ala e mafai ona toe fa'afo'i atu ai o ia i le finagalo alofa o le Atua.” -*Patriarchs and Prophets*, p. 183.

a. O le a le lesona e ao ona a'oa'oina mai i le ala fa'a-apefa'i na va'aia e Iakopo i le vao? Kenese 28:16, 17; Ioane 1:51.

“I le fa'aaliga na tu'uina atu ai iā Iakopo le fuafuaga o le togiola e ui e le'i atoatoa, peita'i na taua ia te ia vaega o le fa'aaliga na ia va'aia i lenā taimi. O le ala fa'a-apefa'i na fa'aalia ia te ia i lana miti, o le ala fa'a-apefa'i lava lea na ta'ua e Keriso i le talanoaga ma Natanielu. [Ioane 1:51.] Sa i ai le saolotoga vavalalata i le va o le Atua ma le tagata, se'ia o' lava i le taimi na fouvale ai le tagata i le malo o le Atua. Peita'i, o le agasala a Atamu ma Eva na vā a'i le lalolagi ma le lagi, ma na avea ma mea na lē mafai ai e le tagata ona fa'atasia ma lona Foafoa. Peita'i, na le'i tu'ua lenei lalolagi e aunoa ma se fa'amoemoe. O le ala fa'a-apefa'i o lo'o fa'atusaina mai ai Iesu, o lea le auala ua fa'atuina e mafai ona feso'ota'i ai.” -*Patriarchs and Prophets*, p. 184.

e. Fa'amatala le fesoota'iga ua fa'atuina e ala i le fesoasoani a Keriso. Roma 3:23-26; Eperu 1:14.

“Ina ua fouvale ma pa'u le tagata, na vavae ese ai e le tagata o ia lava mai le Atua; ma motusia ese mai ai le lalolagi mai le lagi. Sa lē toe mafai lava se feso'ota'iga i lea va. Ae peita'i talu Keriso, ua toe fa'afeso'ota'iina ai le lalolagi ma le lagi. Talu ai ona o Ana lava galuega lelei, ua toe soso'o ai e Keriso le vanu na faia e le agasala, ma ua mafai ai nei e le 'au agelu ua fai ma auaua ona feso'otai ma tagata. Ua fa'afeso'ota'i e Keriso le tagata ua pa'ū i lona vaivai ma le leai o se fesoasoani i le Puna o le mana o Lē ou le malosi uma....

“O le finagalo o le Atua ua naunau mai lava i Lana fanau o i le lalolagi i se alofa e sili atu lona malosi nai lo le oti. I Lona foaiina mai ai o Lona Alo, ua Ia sasaa mai ai le lagi atoa uma mo i tatou e ala i lea meaalofo e tasi. O le soifuaga, o le maliu, ma le fautua a lo tatou Fa'aola, o galuega a agelu, ma olega a le Agaga, o galuega uma a le Tama i soo se mea, ma le naunau mai o ē o i le lagi—o mea uma ia o loo latou galulue fa'atasi uma mo le togiolaina o le tagata.” -*Steps to Christ*, pp. 20, 21.

1. Fa'atusatusa le tulaga o le tagata soifua a'o le'i pa'ū ma le taimi ina ua mavae lona pa'ū.
2. Ina ua mavae le pa'ū o le tagata, o le a le mea na ia faia ma aisea?
3. O le a le tali e tasi i le fa'afitauli o le agasala?
4. Fa'amatala le uiga o le fa'aailoga poo le fa'atusa ofoofogia na tu'uina atu ia Iakopo i lana miti.
5. O a auala e fesoota'i ai le Atua ma tagata ola uma?

Salamō

MAU AUTU: “O lenei, inā salamō ia outou ma ia outou liliu, ina ia sōloiese a outou agasala, ina ia oo mai ai o tausaga e filemū ai mai luma o le Alii” (Galuega 3:19).

Faitauga Fautuaina: *Steps to Christ, chapter 3, pp. 23-35.*

“E lē lafoa’iina e le Atua i latou ua fa’alataina e le agasala, pe afai e toe fo’i atu ia te Ia ma le loto salamō moni.” -*Patriarchs and Prophets, pp. 202, 203.*

1. FA’ANOANOA ONA O LE AGASALA

Ulua’i Aso, Iulai 12

a. O a fua poo fa’amaoniga o le salamō moni na manaomia e Ioane le Papatiso? Luka 3:7-14.

“O le salamō e aofia ai le fa’anoanoa ona o agasala ua faia, atoa ai ma le liliu ese mai ai. E lē mafai ona tatou teena le agasala se’i vaganā ua tatou va’ai tino lava i lona leaga; ma se’ivaganā ua tatou liliu ese mai ai ma le loto atoa, o le ā leai se suiga moni i le olaga.” -*Steps to Christ p. 23.*

e. O ā mea e tatau ona iloa e uiga i le salamō moni ina ia suia ai le loto ma le olaga? 2 Korinito 7:9, 10.

“O le fa’anoanoa ma le tigā moni lava ona o le agasala, o le i’uga lea o le galuega a le Agaga Paia i le loto. Ua fa’aalia e le Agaga le leai o se agaga fa’afetai a’e o le loto, lea ua ta’u fa’atauva’a ma fa’atigā i le Fa’aola, ma aumaia ai i tatou i le salamō i le tafu’e o le satauro. O agasala uma lava e faia, ua tatou toe fa’asatauroina ai Iesu; mā a tatou va’ava’ai atu ia te Ia o Lē ua tatou tu’ia, ona tatou fa’anoanoa ai lea ona o agasala ua aumaia ai le tigā ia te Ia. O tigā fa’apena o le a ta’ita’ia atu ai i tatou i le lafoa’ia o le agasala.” -*The Desire of Ages, p. 300.*

“Pe afai e gaua’i atu le loto i le galuega mana a le Agaga o le Atua, o le a fāgua ai le loto fuatia ifo, ma o le a iloa ma lagona ai e le tagata agasala se mea e uiga i le loloto ma le paia o le tulafono a le Atua, o le fa’avae lea o Lona malo i le lagi ma le lalolagi.” -*Steps to Christ, p. 24.*

a. O le ā le aioiga a Tavita ina ua ia iloa le mamafa o lana agasala? Salamo 51:1-4.

“O le tatalo a Tavita ina ua mavae lona pa'ū, ua fa'aalia mai ai le uiga o le fa'anoanoa moni ona o le agasala. Sa matuā loloto ma fa'amaoni lona salamō. Ua lē aliali mai lava i lana tatalo lona taumafai e fa'aufiufi lana agasala; poo sona taumafai e 'alo ese mai i le fa'asalaga na folafolaina. Na iloa lelei e Tavita le tele o lana agasala; na ia vaai atu i le fa'aleagaina o lona agaga; ma ia inoino ai i lana agasala. E le gata na ia tatalo mo le fa'amagaloga, ae fa'apea foi mo se loto mamā. Na ia naunau ina ia toe maua mai lona fiafia i se olaga ua fa'apa'iaina - ma ia toe fa'afo'isia o ia i le lotogatasi ma le mafutaga ma le Atua.” -*Steps to Christ, pp. 24, 25.*

e. O le ā le mea na ta'ita'ia ai o ia i le salamō moni o Tavita e saili? Salamo 51:10-13.

“Ia e faia se loto mamā i totonu ia te a'u. O le amataga tonu lava lea, e tusa ai ma le fa'avae moni lava o le amio faa-Kerisiano; auā e sau mai le loto mataupu silisili o le olaga. Afai o le a va'ai tagata uma, o faifeau ma tagata, ua fa'amaoni o latou loto i le Atua, o le a tatou va'aia lava ni taunuuga tetele mai le galuega ua faia. O le sili atu ona tāua ma le fa'atinoina o lau galuega, o le sili atu fo'i lea ona mana'omia ona i ai o ni loto mamā. O le alofa tunoa e mana'omia mo lea sauniuniga, ma o le mana o le Agaga Pa'ia o le a galulue fa'atasi ma taumafaiga uma e faia e le tagata i le isi itu. Afai o le a sāili ma le fa'amaoni ma le finafinau e fanau uma a le Atua ia te Ia, o le sili atu fo'i lena o le tuputupu a'e i le alofa tunoa. O le a muta fe'eseesea'iga; o le a tasi le loto ma le mafaufau o ē talitonu; o le a manumalo le olaga mamā fa'apa'iaina ma le alofa i totonu o ekalesia. O lo tatou va'ava'ai atu i ai, e suia ai i tatou. O le tele o lou taimi e te mafaufau loloto ai i le amio a Keriso, o le tele fo'i lea o le lafoia mai o lou fa'atusa i Lona fa'atusa. Sau ia Iesu i le tulaga o loo e iai, mā o le a Ia talia oe, ma tu'uina atu ia te oe se pese fou i lou laulaufaiva, o le vi'iga lea i le Atua.” -*Gospel Workers (1892), pp. 451, 452.*

i. O le ā le a'oa'oga a le Tusi Paia e uiga i le salamō ma le tu'uina atu atoatoa iā Keriso? Roma 2:4; Galuega 3:19; 5:31.

“E pei ona lē mafai ona fa'amagaloina i tatou e aunoa ma Keriso, e fa'apea fo'i ona lē mafai ona tatou maua o le salamō e aunoa ma le Agaga o Keriso e fagua ai o tatou loto fuatia ifo.

“O Keriso o le puna ia o mafaufauga tonu uma. Ua na o Ia lava e mafai ona totoina i le loto le inoino i le agasala. O mana'oga uma mo le upu moni ma le olaga mamā, o mautinoaga uma o ō tatou lava uiga agasala, o se fa'amaoniga lea e fa'aalia ai o loo gaoioi Lona Agaga i o tatou loto.” -*Steps to Christ, p. 26.*

a. O le ā tonu le uiga moni o le salamō o Esau, Farao ma Iuta ina ua latou iloa i'uga o ā latou agasala? Eperu 12:16, 17; Esoto 12:30-32; 14:3-5; Mataio 27:3-5.

“E toatele e fa’anoanoa ona o ā latou agasala ma sesē ua latou faia, ma ua latou fa’ailoa atu se liuaga fa’afoliga i va’aiga i fafo ona o lo latou fefefē ne’i aumaia e ā latou agasala ni mafatiaga i ō latou luga. Ae peita’i, e lē o le salamō lea e pei ona a’oa’oina mai e le Tusi Paia. Latou te fetāgisi ma fa’anoanoa ona o mafatiaga ua ogotia ai ae lē ona o le agasala. O le ituaiga tigā lea na fa’anoanoa ai Esau ina ua ia vaai atu ua faoa mai iā te ia le tofi o le ulumatua e fa’avavau.... Na fa’apea foi iā Iuta le Sekara, ina ua uma ona ia fa’alataina lona Alii, na ia fa’apea ane ai, ‘Ua ou agasala ina ua ou fa’alataina le toto o le tagata lē sala’ Mataio 27:4.

“Na faia fa’amalosi lea ta’utinoga mai lona agaga agasala ona o se lagona mata’utia o le fa’asalaga ua fa’afaula’i mai nei i ona luga, ma lona va’avaai atu ma le mata’u i le faamasinoga a le Atua. O lona mafaufau atu i le i’uga o loo fa’atali mai nei ia te ia na fa’atumulia ai o ia i le mata’u, ae peita’i, e le’i ia te ia se fa’anoanoaga loloto ma se loto momomo i lona loto, ona ua ia fa’alataina le Alo e lē ponā o le Atua ma ia fa’afitia Lē Paia o Isaraelu. O Farao fo’i, ina ua puapuagatia i lalo o fa’asalaga a le Atua, na ia ta’utino atu lana agasala ina ia fa’asaoina ai o ia mai i nisi fa’asalaga e ono mulimuli mai, peita’i, na vave ona toe foi atu o ia i lona tetee i le Lagi i le taimi lava na taofia ai mala. O i latou uma nei na fetāgisi ona o mafatiaga na alia’e mai talu le agasala, ae latou te le’i fa’anoanoa ona o le agasala lava ia.” -*Steps to Christ, pp. 23, 24.*

“Na tuuina atu e le Atua ia Farao le fa’amaoniga sili ona mata’ina o Lona mana fa’alelagi, ae na musu le tupu e gaua’i ma mulimuli i le malamalama. O fa’aaliga uma o le mana o le Atua na ia teena, na atili fa’amautū ai lona fa’amaaa i ana fouvalega. O fatu o lana fouvale na ia lūlūina ina ua ia teena le ulua’i vavega na faia, na aumaia ai lona seleselega.” -*Patriarchs and Prophets, p. 268.*

e. O le a le mea e tupu pe a lē salamō le tagata agasala ma fa’atuai i lona salamo seia oo i le taimi o mulimuli mai? Ioane 12:35, 36; Eperu 3:12-15.

“O Kerisiano e o’o atu i lea taimi e le’i faia sa latou sauniuniga mo lea aso tele ma le mata’utia o le Atua, o le a latou alalaga ma fa’aali atu a latou agasala i upu o le tigā ma le mafatia tele, ae taliē ma ula mai i ai le ‘au amioleaga i o latou puapuaga. O le fa’aaliga o agasala a i latou nei, ua leai sona eseese ma le fa’aaliga o agasala a Esau po’o Iuta. Ua latou salamō ona o le fa’asalaga o le solitulafono, ae leai se salamō ona ua latou lagona le leaga o le agasala ua latou faia. Latou te le’i lagona se salamō moni, leai fo’i so latou inoino i le agasala. Ua latou ioe i ā latou agasala ona o le fefefē i le fa’asalaga, peita’i, e aveesea loa le fa’asalaga, ona latou toe fo’i lava lea i la latou amioleaga e pei o Farao anamua, i lo latou tete’e i le Lagi.” -*The Great Controversy, pp. 620, 621. [Author’s italics.]*

a. O le ā le eseeseega o le Faresaio ma le telona e tusa ai ma le tala na fa'amatala e Keriso? Luka 18:10-13.

“O le fa'ataoto i le Faresaio ma le telona, o le tatalo a le Faresaio o se tatalo na faia i le fa'amalieina o le manatu fa'apito o le tagata ia te ia lava, ‘Le Atua e, ou te fa'afetai atu ia te Oe, ina ua ou lē pei o isi tagata,’ na tu matila mai i le tatalo a le Faresaio le eseeseega tele o ia ma le aioiga a le tagata salamō, ‘Ia e alofa mai ia te a'u le tagata agasala’ Luka 18:11, 13, R.V. O le mafua'aga lea o le a'oa'ia ai e Keriso o le pepelo o tagata Iutaia.” -*The Desire of Ages*, p. 495.

e. O le a le fetalaiga a Iesu e uiga i le i'uga o le tatalo a le telona? Luka 18:14.

“Fai mai le tatalo a le telona le tagata mativa, ‘Le Atua e, ia e alofa mai ia te a'u le tagata agasala’ (Luka 18:13), na manatu ifo lava ia i lona loto o ia o se tagata e matuā agasala lava, o lea lava foi le manatu o nisi ia te ia; peita'i, sa lagona lava e lenei tagata lona mana'omia o se fesoasoani, o le mafua'aga lea o lona oo ifo ai i luma o le Atua ma lana avega o le agasala ma le māasiasi, ma aoi atu ai iā te Ia mo Lona alofa tunoa. Na ia tatala atu lona loto i le galuega mana o le Agaga o le Atua, ma fa'asa'olotoina mai ai o ia mai le malosi o le agasala. A o le tatalo fa'amauualuga ma le fa'afiaamiotonu a le Faresaio na fa'aalia ai ua na tapunia le faitotoa o lona loto mai le galuega a le Agaga Paia. Talu ai ona o lona vavāmamao ma le Atua, na le'i lagona ai e ia lona lava uiga ua fa'aleagaina, e matuā fete'ena'i lava ma le atoatoa o le paia fa'alelagi. Na te le'i mana'omia se mea mai lana tatalo, ma, e na te le'i maua mai fo'i se mea.” -*Steps to Christ*, pp. 30, 31.

i. I le fa'amatalaina o lenei tala, o le a le uiga fa'aleagaina na sãilia e Iesu e fa'asa'o? Luka 18:9; 2 Korinito 10:12; Faataoto 16:18.

“O le tapua'iga a le Faresaio e le'i avatua ma oo atu i le agaga. Na te le'i suesueina lona olaga ia tusa ma le amio a le Atua, i lona lagonaina lea o se loto ua tumu i le alofa ma le alofa mutimutivale. Na ia fa'amalieina ia lava i se tapua'iga e na o foliga va'aia i fafo e gata mai ai. Na manatu lava ia o ia ua amiotonu-peita'i o le fua o ana lava galuega na fa'amasinoina e tusa ma va'aiga fa'aletagata.

“O lē e fa'alagolago ia te ia lava o ia o le tagata amiotonu, na te fa'aalia lona inoino i isi. E pei ona faia e le Faresaio i lona fa'atusatusa o ia lava ma isi tagata, e fa'apena foi ona ia fuaina isi tagata i lona olaga. O lana amiotonu na ia fa'atusatusaina ma isi, ma o le sili atu o le leaga o i latou na, o le sili atu foi lea o lona ta'uamiotonuina o ia mai i isi. O lona fa'afiaamiotonu e ta'ita'ia atu ai i le tu'uā'ia o isi, ma ia tausalaina i latou o ni tagata solitulafono i le tulafono a le Atua. O lea uiga ua na fa'aalia ai le agaga tonu lava lea o Satani, o lē o loo faia le galuega o le molia o le au uso. Ma o le itu'aiga uiga ma le agaga tonu lenei, e le mafai ai ona ia ulufale atu i le fa'atasiga ma le mafutaga ma le Atua.” -*Christ's Object Lessons*, p. 151.

a. O le ā le lamatiaga o le lē amana'iaina o le talitonuga i le fa'atuai ona tali atu? 2 Korinito 6:2; Eperu 3:7, 8; Luka 12:20, 21.

“E to'atele o lo'o latou fa'afilemuina o latou loto fuatia ifo ma ua atuatuvaile ai i le manatu fa'apea, e mafai lava ona latou liliuese mai o latou ala leaga i soo se taimi lava latou te manatu i ai; e ui lava i lo latou fa'atuai pea i le vala'aulia o le alofa tunoa, ma ua latou manatu ai o le a latou lagonaina lava i se taimi lumana'i le musumusuga a le Agaga. Latou te manatu a uma ona latou faia o le fa'atigā i le Agaga o le alofa tunoa, ma tu'uina atu lo latou malosi i le itu a Satani, ona latou fa'apea ane lea, e mafai lava ona latou liliuese mai lo latou ala sesē pe a lata mai le malaia. Peita'i ua lē o se mea faigofie lea mo i latou. O le tele o mea i le olaga nei e mafaufau i ai ma a'oa'oina ai, ua matua'i tāmāuina atoatoa ai le amio lea e to'aititi lava i latou e manana'o ina ia toe maua mai ai le fa'atusa ma foliga o Iesu.” -*Steps to Christ*, pp. 33, 34.

e. O le ā se mea e tatau ona tatou faia pe afai tatou te iloa e lē o ōgatusa o tatou loto ma o tatou olaga ma le amio a le Atua? Salamo 139:23, 24; 51:10.

“Ia suesue le Afioga a le Atua ma le agaga tatalo. O le upu lea o loo fa'asino atu ai i tatou i le tulafono a le Atua ma le soifuaga o Keriso, o fa'avae sili ia o le amio paia, a aunoa ma lea 'e leai se tasi e iloa atu le Atua.' Eperu 12:14. E fa'aali tino mai ai le agasala; e fa'aalia manino mai ai le ala o le fa'aolataga. Ia e fa'alogo i ai e pei o le siufofoga o le Atua o lo'o fetalai mai i lou agaga...

“Ua avea i tatou ma tagata e matuā agasala lava, ae na maliu lava Keriso ina ia fa'amagaloina i tatou. O le aogā o Lana taulaga ua lava lea e ofoina atu ai o Ia i le Tama mo i tatou. O i latou ua Ia matuā fa'amagaloina lava, o le a sili lo latou alolofa ia te Ia, ma o le a sili ona tūtū latalata atu i Lona nofoalii e vivii atu ia te Ia ona o Lona alofa tele atoa ai ma Lana taulaga lē māfuatia. O le taimi lava tatou te malamalama atoatoa ai i le alofa o le Atua, o le sili atu foi lea o lo tatou iloa lelei o le agasala i ona foliga. Pe afai tatou te va'ava'ai atu i le umi o le filifili ua tuutuu ifo mo i tatou, pe afai tatou te malamalama atili i se mea e uiga i le taulaga lē fai tuāoia na saunia e Keriso mo i tatou, ona liusuāvai ai lea o ō tatou loto ma fa'amalūlūina i le agamalū ma le salamō.” -*Ibid.*, pp. 35, 36.

FESILI FA'AMANATU

Aso Faraile, Iulai 17

1. O le ā le meaalofa sili ma matagofie ua foaiina mai e le Atua ina ia tatou maua ai le alofa tunoa fa'alelagi?
2. Aiseā e lē mafai ai ona tatou maua le salamō moni lava mo i tatou?
3. O le ā se mea na misi i le salamō o Esau, Farao, ma Iuta?
4. Aiseā na fa'amatala ai e Iesu le fa'ataoto i le Faresaio ma le telona?
5. O le ā le laasaga sili ona taua e aumaia ai le tagata i le mafutaga vavalalata ma le Atua?

Fa'aali Atu

MAU AUTU: “O lē ua ufiufi lona solitulafono, e lē manuia o ia; a o lē ua fa'aali ma lafoaiina, e alofagia o ia” (Faataoto 28:13).

Faitauga Fautuaina: *Steps to Christ, chapter 4, pp. 37-41.*

“O le ta'utinoga e sau mai le totonugalemu o le agaga ma sasaa atu mai le loto, e maua lona ala i le Atua o le alofa mutimutivale e lē māfuatia.” -*Steps to Christ p. 38.*

1. O LE ALOFA O LE ATUA

Ulua'i Aso, Iulai 19

a. Afai e ta'usalaina i tatou i le agasala, o le ā se mea e tatau ona lava ona tatou faia? Faataoto 28:13; Iakopo 5:16.

“O tuutuuga o le mauaina o le alofa tunoa o le Atua, e faigofie, ma e tonu fo'i ma talafeagai. E lē finagalo le Alii ina tatou faia se mea e tigā ai ina ia maua mai ai e i tatou le fa'amagaloga o agasala. E lē mana'omia ona tatou faia o ni malaga uumi ma faigatā, po'o le faia fo'i o ni fa'asalaga tigā, ina ia talileleia ai o tatou agaga i luma o le Atua o le lagi, pe ina ia togiolaina a'i a tatou solitulafono; auā 'o lē ua fa'aali ma lafoa'iina lana agasala, e alofagia o ia.” -*Steps to Christ, p. 37.*

e. O le ā le uiga e mana'omia mai ia i tatou? Faataoto 15:33; 19:23; Salamo 34:18.

“O i latou e le'i fa'amaulaloina o latou agaga i luma o le Atua i le fa'aali atu lea o ā latou agasala, e le'i fa'ataunu'uina la e i latou laasaga muamua ina ia taliaina ai. Afai tatou te le'i maua le salamō moni, le salamō lea 'e oo i le ola e lē toe salamō ai', ma tatou le'i fa'aali atu a tatou agasala ma le fa'amaulaloina moni o le agaga ma le loto nutimomoia, ma fa'aalia lo tatou inoino i ā tatou amioleaga, tatou te lē o sailia moni lava la le fa'amagaloina o a tatou agasala; ma afai tatou te le'i sailia lava, e le'i maua lava la e i tatou le filemu ma le manuia o le Atua. Pau lava le mafua'aga e lē maua ai e i tatou le fa'amagaloga o agasala ua mavae, ona tatou te le'i naunau e fa'amaulaloina o tatou loto ma usita'i ai i tuutuuga e tusa ma folafolaga ua i le upu moni. O loo ua tu'uina mai ai fa'atonuga manino e uiga i lenei mataupu. O le fa'aali atu o agasala, e tusa lava pe ua faia fa'aaliali poo le faia fa'alilolilo foi, e tatau lava ona fa'aalia ma le loto ua ootia fa'amaoni ma le loto malie atoatoa.” -*Ibid., pp. 37, 38.*

a. Afai tatou te fa'atigā i se isi tagata, o ai ua tatou fa'atiga i ai? Salamo 51:4.

Fai mai le aposetolo, 'Ia fēfa'aalia'i o outou sesē, ma tatalo le tasi mo le tasi, ina ia fa'amālōlōina outou. Iakopo 5:16. Ia fa'aali atu a outou agasala i le Atua, o Lē e na'o Ia lava e mafai ona fa'amagaloina, ma ia fa'apea fo'i ona outou fēfa'aalia'i mea ua outou fēagaleagaa'i ai. Afai ua e fa'atiga i lau uo po'o lou tuaoi, e tatau lava ona e fa'aali atu lou sesē, ma o lona tiute le fa'amagaloina o oe ma le loto malie. Ona e sailia lea o le fa'amagaloga a le Atua, auā o le uso ua e fa'atigā i ai, e ā le Atua ia, ma, talu ai ua e fa'atigā ia te ia, ua e agasala ai i Lē na faia o ia, i le ma lona Fa'aola." -*Steps to Christ, p. 37.*

e. Aiseā e tatau ai lava ona tatou fa'amagalo atu i isi? Mataio 6:14, 15; Efeso 4:32.

"O lē e lē fa'amagalo atu, ua motusia e ia le ala tonu lava lea e mafai ona ia maua ai le alofa tunoa mai le Atua. E lē tatau ona tatou manatu e fa'apea, se'i vagana ua fa'apea mai o i latou ua sesē i lo latou agavale ma fa'atigā mai ia i tatou, ma ua tatau ai ona tatou taofia mai ai ia i latou lo tatou fa'amagaloina o i latou. O lo latou matāfaioi, le fa'amaulaloina o ō latou loto e aunoa ma se masalosalo, e ala i le salamō ma le fa'aali atu o agasala, a ia tatou maua le agaga o le alofa mutimutivale mo i latou ua latou faia se mea leaga ia i tatou, tusa pe latou te fa'aali mai o latou sesē poo le leai fo'i. E ui lava ina tigā manu'a na latou fa'atigā mai ai iai tatou, e lē tatau ona tatou fa'apelepele ma teufatu i a tatou faitioga ma tatou tigoalofa mo i tatou lava ona o ni manu'a ua tatou tigā ai; peita'i, afai tatou te manana'o e fa'amagaloina a tatou agasala e le Atua, e ao lava la ona tatou fa'amagalo atu iai latou uma o loo faia mea leaga ia i tatou." -*Thoughts from the Mount of Blessing, pp. 113, 114.*

i. O le ā se mea e tatau ona a'oa'oina ai i tatou i lo tatou tiute i tagata uma? 1 Peteru 4:8; Roma 13:8.

"Ia afio tumau Keriso Lē e paia, o Soifua e fa'avavau i totonu ia te oe, ma ia avea oe ma ala e fa'aalia mai ai le alofa fa'alelagi lea o le a osofia ai le fa'amoemoe o ē ua leai se fa'amoemoe ma aumaia ai le filemu o le lagi i loto o ē ua mafatia i le agasala. A o tatou o atu i le Atua, o le mea lea o le a fa'afetaiā'ia i tatou i le faitotoa, o le a tatou mauaina le alofa mutimutivale mai ia te Ia, ma tu'uina atu ai i tatou ina ia fa'aailoa atu ai Lona alofa tunoa i isi." -*Ibid., pp. 114, 115.*

"O le lē alofa o le tagata i le isi tagata, o se agasala sili lea ia i tatou. E toatele ua latou manatu o loo latou faia le fa'amasinoga tonu a le Atua ae latou te lē o fa'aalia mai le atoatoaga o Lona agamalu ma Lona alofa silisili. O le masani lava o i latou, o le fetaia'i lea ma sauaga ogaoga o loo i lalo o le atuatuvaale o fa'aosoosoga. O nei agaga o loo tauivi pea ma Satani, ma o upu sauā ma le lē alofa e fa'avaivaia ai i latou ma mafua ai ona latou pa'u'ū atu i le malosi o fa'aosoosoga." -*The Ministry of Healing, p. 163.*

e. O ā agasala e tatau ona fa'ailoa i luma o tagata lautele ae o isi e fa'ailoa atu tau lava o le Atua? Salamo 32:5; Mataio 5:23, 24.

“O le ta'utinoga ua faia ma le fa'amaoni, e masani lava ona i ai sona uiga moni lava, ma e fa'aalia mai ai le uiga tonu lava o agasala ua tatou faia. Pe afai o ni agasala e fa'asino tonu i le va ma le Atua, e na o le Ia lava e tatau ona fa'aali atu i ai; ae afai o ni sese i le va ma isi tagata, ona fa'aali lea i ia tagata taito'atasi; poo ni sesē i luma o le toatele, e tatau fo'i lea ona ta'utino atu i luma o le toatele. Ae peita'i o fa'aaliga uma o a tatou agasala, e tatau ona ma'oti ma ia faia ma le fa'amaoni, ma fa'ailoa mai ai agasala tonu lava ia o loo tatou nofosala ai.” -*Steps to Christ*, p. 38.

“O agasala ua faia fa'alilolilo e tatau ona ta'utino atu ia Keriso, o lē ua na'o Ia lava le puluvaga i le va o le Atua ma le tagata.... O agasala uma lava ua avea ma solitulafono i le Atua, e ao ona ta'uta'u atu ia te Ia e ala atu iā Keriso. O agasala uma lava ua faia fa'aaliali, e tatau ona ta'utinoina i luma o tagata lautele.” -*Gospel Workers*, p. 216.

a. O le a le fa'amoemoega o le ta'utino ma le fa'aalia moni lava? 1 Samuelu 12:19.

“I ona po o Samuelu, na sē ese ai le fanauga a Isaraelu mai le Atua. O le fua o a latou agasala na puapuagatia ai i latou; auā ua latou lafoā'ia lo latou fa'atuatua i le Atua, ua lē iloa e i latou Lona mana ma Lona poto e ta'ita'iina ai le nuu, na le'i talitonu fo'i i latou i le mafai lea e Ia ona puipuia ma taofia i latou e tusa ma Ona ala. Na latou liliuese mai le Tupu Silisili o le atulaulau uma, ma latou mananao e pulea i latou e pei fo'i o isi nuu o siomia i latou. Na fa'ato'a maua e i latou le filemu ina ua latou faia o lenei ta'utoga fa'amaoni: ‘Ua matou fa'aopoopoina i a matou agasala uma lenei mea leaga, ina ua matou fa'atoga atu i se tupu mo i matou’ 1 Samuelu 12:19. O le agasala lava na latou agasala ai na faasalaina ai i latou, e tatau fo'i ona fai tonu i ai la latou ta'utinoga.” -*Steps to Christ*, pp. 38, 39.

e. O le ā se gaioiga e tāua ma aogā e ao ona mulimuli mai i le ta'utinoga? Isaia 1:16, 17; Esekielu 33:15.

“O le ta'utinoga o le a lē taliaina lava e le Atua e aunoa ma le salamō fa'amaoni atoa ai ma le toe fuata'iina. E tatau ona i ai ni suiga mausalī i le olaga; o mea uma e inosia e le Atua e tatau ona tuu ese ma lafoā'ia. O le i'uga lea poo fua moni ia o le fa'anoanoa moni lava ona o agasala na faia.” -*Ibid.*, p. 39.

“O tagata uma ua liua, e pei o Sakaio, o le a fa'ailoa mai ai le ulufale atu o Keriso i lona loto e ala i le lafoā'ia o amioga leaga ua fa'ailogaina ai lona olaga. E pei o le alii telona, ma o le ā tu'uina atu e lea tagata se fa'amaoniga maumautūtū o lona fa'amaoni e ala i le faia o se toe fuata'iina.” -*The Desire of Ages*, p. 556.

a. Ina ua fesili Ieova le Atua ia Atamu ma Eva ona o la la'ua agasala, na fa'aapefa ona la fa'ailoa mai e lē o i la'ua e sesē? Kenese 3:12, 13.

“E lē mafai e Atamu ona ia fa'afitia pe 'alofaga i lana agasala; peita'i na te le'i fa'aalia sona salamō, ae na ia taumafai e tu'ua'i lana avā, mulimuli ane na ia tu'ua'ia le Atua: 'O le fafine na e aumai ia te a'u, ua na aumai ia te a'u le fua o le la'au, ona ou 'ai ai lea.' “ - *Patriarchs and Prophets, p. 57. [Author's italics.]*

“Ina ua uma ona 'ai e Atamu ma Eva le fua o le la'au fa'asaina, sa fa'atumuina i la'ua i le māsiasi ma le mata'u. Na pau le mea na mua'i oo a'e i o la mafaufau i le taimi lava lena, o le faia lea o ni o la fa'amatalaga 'alofaga ina ia fa'asaoina mai ai i la'ua mai le sala mata'utia o le oti. Ina ua fetalai mai le Ali'i e uiga i lo la agasala, na tali atu Atamu, ma ia tu'uina atu le tasi vaega o lana agasala i le Atua, a o le tasi vaega o lana agasala na ia tu'uā'ia i le fafine. 'O le fafine na e aumai ia te a'u, ua na aumai ia te a'u le fua o le la'au, ona ou 'ai ai lea.' O le fafine fo'i ua na tu'ua'ia le leaga i le gata, ma fa'aapea atu, 'Na fa'asesē mai le gata ia te a'u, ona ou 'ai ai lea.' Kenese 3:12, 13. Aiseā na e faia ai le gata? Aiseā na e fa'atagaina ai le gata e sau i Etena? O nei fesili a le fafine i le mafua'aga o lana agasala ua aliali mai ai e peisea'i ua na 'alofaga i lana agasala, ma tu'ua'i atu ai i le Atua le leaga ua mafua ai ona la pa'uū.” -*Steps to Christ, p. 40.*

e. Aiseā e lē aogā ai le ta'utinoina atu o agasala ona o lou taumafai e ta'uamiotonuina oe lava? Iopu 9:20; Luka 16:15.

“O lenei agaga o le ta'uamiotonuina e le tagata o ia lava, na afua uma mai ia Satani le tamā o le pepelo, ma fa'aapea ona aliali mai o lea lava uiga i amio o atalii ma afafine uma o Atamu. O ta'utinoga ua faia fa'apenei e lē o galueā'ina e le Agaga o le Atua, ma o le a lē taliaina fo'i e le Atua. O le salamō moni o le a ta'ita'ia atu ai le tagata i lona tau'aveina o lana agasala ma talia e aunoa ma le fē'alofa'i po o le fia nātia o se mea.” -*Ibid., p. 40.*

“E lē tatau ona tatou taumafai e fa'aitiitia lo tatou lagona ta'usalaina e ala i le faia o 'alofaga i agasala na tatou faia. E ao ona tatou talia le fua fa'atatau a le Atua i le agasala, ma o se mea e matuā mamafa lava lea. Ua na o Kalevario lava e mafai ona fa'aalia mai ai le matuā mata'utia tele o le agasala. Afai tatou te tau'aveina ā tatou lava agasala, o le a momomo ai i tatou. Peita'i o Lē e leai se agasala ua na suitulaga ia i tatou; e ui lava o se mea sa lē tatau lea, peita'i, o Ia lava ua na tau'ave a tatou amiolētonu. 'Ae afai tatou te fa'aali a tatou agasala,' 'e fa'amaoni Ia (le Atua) ma le amiotonu e fa'amagalo ai ā tatou agasala, ma fa'amamā mai ia i tatou i amiolētonu uma lava.” 1 Ioane 1:9. O Lana tulafono o le upu moni silisili lea! e na te Ta'uamiotonuina ai i latou uma o ē fa'atuatua ia Iesu. 'O ai se Atua e tusa ma Oe, o lē fa'amagaloina le amiolētonu, ma ua lē manatua solitulafono a ē o totoe o Lona tofi? E lē fa'amoemoe pea o Ia i Lona to'asā e fa'avavau, auā e fiafia o Ia i le alofa' Mika 7:18.” -*Thoughts from the Mount of Blessing, p. 116.*

a. Na fa'apefea ona ta'utino atu ma le lotomauualalo ma le fa'amaoni e Paulo lana agasala? Galuega 26:10, 11.

“O fa'ata'ita'iga o i le afioga a le Atua e uiga i le salamo moni ma le fa'alumaina, ua fa'aalia mai ai le agaga moni o le fa'aali atu o agasala, lea e lē faia i ai se 'alofaga mo agasala ua faia po'o se taumafaiga ina ia fa'aufiufi ai e le tagata ia lava. E le'i taumafai Paulo e puipuia o ia; ae sa na fa'aalia le atoatoa o le leaga o lana agasala i lona itu pogisa, na te le'i taumafai e fa'aitiitia lona tausalaina. [Galuega 26:10, 11].” -*Steps to Christ, p. 41.*

e. O le a se mea na ta'utinoina mai e Paulo i lana ulua'i tusi ia Timoteo? 1 Timoteo 1:15.

“I lo tatou manatu ifo ai iā i tatou e aunoa ma se mea tatou te mafaia ua na o le vaivai lava, ma tatou fa'apea ane ai, e leai se tasi e fautua mo i tatou i luma o le Atua, ma fa'apena ona ta'u mai ai e Satani ia i tatou le lē toe i ai o se tāua o i tatou; e lē toe mafai fo'i ona toe fa'aleleia ma fa'asa'o sesē ma vaivaiga o ō tatou olaga. A tatou taumafai e o atu i le Atua, ae musumusumu mai Satani ia te oe, E leai ma se aogā e te tatalo ai; E te le'i faia ea lena mea leaga? E te le'i agasala ea i le Atua ma lou loto i ai? Peita'i, e mafai ona tatou fai atu ia Satani e fa'apea, 'o le toto fo'i o Iesu Keriso Lona Alo e fa'amamāina ai i tatou i agasala uma lava' 1 Ioane 1:7. O le taimi lava tatou te lagonaina ai le leaga o le agasala ua tatou faia, ma ua tatou manatu ai e lē mafai ona tatou tatalo, o le taimi lena e tatau ai ona tatou tulivae atu i le Atua i le tatalo. Atonu tatou te lagona le māasiasi ma le fa'alumaina, peita'i, e ao lava ona tatou tatalo ma le loto talitonu atoatoa. [1 Timoteo 1:15]. O le fa'amagaloga... o se meaalofa mo i tatou, o loo i ai lea i le amiotonu e le ponā a Keriso lona fa'avae atoa mo le foaiina mai.” -*Thoughts from the Mount of Blessing, pp. 115, 116.*

i. Afai tatou te fa'aali atu a tatou agasala, o le a se mea mautinoa ua folafola mai e le Atua? 1 Ioane 1:9.

“O le loto mauualalo ma le nutimomoia, ma ua gaua'i atu i le salamo moni, o le a na talia ma le fiafia, atoa ma le fa'afetai, auā o se fa'aaliga lea o le alofa o le Atua ma le togisala na saunia i Kalevario; e pei ona fa'aali atu e se atalii lona sesē i se tamā alofa, o le a fa'apena foi ona aumaia e le tagata ua salamō moni ana agasala uma i luma o le Atua. Ma ua tusia, [1 Ioane 1:9].” - *Steps to Christ, p. 41.*

FESILI TOE FA'AMANATU

Aso Faraile, Iulai 24

1. Afai tatou te fa'aali atu ma le fa'amaoni a tatou agasala i le Atua, e fa'apefea ona tatou tutu i Ona luma?
2. O a tulaga e tatau ai ona fa'aali atu i isi tagata mea ua tatou sesē ai, ma aisea?
3. Aisea e taua ai le fa'aali moni atu o agasala?
4. Faamatala le matautia o le ta'uamiotonuina e le tagata o ia lava.
5. O le a le i'uga o le fa'aali atu ma le loto salamō moni ma le agaga o le lotomauualalo o agasala?

Taulaga Sapati Muamua

Sapati, Aokuso 1, 2026



Matagaluega o A'oga a le Koneferenisi Aoao

“A'oa'o ia i le tama e tusa ma lona ala; a oo ina toaina lava o ia, e lē te'a ese ai” (Faataoto 22:6).

O loo ua tatou ola nei i se taimi sili ona tāua i le lotolotoi o se sosaiete ua faateleina le faalelalolagi ma le leai o se faatuatua, o le tiute i le a'oa'oina o a tatou fanau ma talavou i le mata'u i le Atua ua sili atu ona faanatinati nai lo se isi lava taimi. I le avea ai o i tatou ma mātua, faiaoga, ma avea ai ma itu tino o le tino o Keriso, ua ia i tatou se galuega paia e tatau ona faia ina ia saunia ai se tupulaga o le a mafai ona puipuia le faatuatua ma le mausali, lotomauualalo, ma le leai o se masalosalo.

“O le faasaienisi poo le poto a'oa'oina, o se a'oa'oga moni o le upumoni, lea e tatau ona matuā faamausaliina i le agaga ina ia lē mafai ona tafiese e a'oa'oga sesē o loo faapea ona salalau atu i soo se mea.” — *Testimonies for the, vol. 6, p. 131.*

O le mafua'aga lea ua galulue malosai ai le Matagaluega o A'oga a le Konafesi Aoao e faamalosia ma faalautele a tatou a'oga faamisionare i le lalolagi atoa. E le lava le tele o a tatou nofoaga fa'alea'oa'oga i atina'e talafeagai, o mataupu fa'aonaponei, ma meafaigaluega e fetau ma le tulaga moni fa'aleagaga o a tatou fanau a'oga. E le gata i lea, ua talosagaina e le tele o atunu'u le tatalaina o ni fa'alapotopotoga fa'alea'oa'oga fou e le gata ina fa'alauiloa ai le poto fa'alea'oa'oga ae fa'apea fo'i ma mataupu fa'avae o le talalelei e fa'avavau.

Ma o lenei taulaga fa'apitoa o le a lagolagoina ai vaega tāua nei e tolu:

1. Toe fa'atulagaina o a'oga fa'amisionare o lo'o iai nei;
2. Fa'atuina o a'oga fou e mana'omia le avanoa mo a'oa'oga fa'a-Kerisiano a le SDARM;
3. Fa'alauteleina o le galuega fa'aliliu ma le fetu'una'iga o meafaigaluega fa'alēa'oa'oga na matou atina'e mo le 'au a'oga ina ia mafai ona tali atu ai i a'oga fa'anei ona po ma a'oga fa'amisionare i gagana eseese ma aganu'u eseese.

“O le a'oa'oga moni, o le saunia lea mo galuega fa'amisionare. O atali'i ma afafine uma o le Atua ua vala'auina e avea ma misionare; ua vala'auina i tatou i le auaunaga i le galuega a le Atua ma o tatou uso a tagata; ma o le saunia o i tatou mo lenei auaunaga, e tatau ona avea ma sini autu o la tatou a'oa'oga.”—*The Ministry of Healing, p. 395.*

O le mea lea, matou te valaau atu ai ia te outou, o uso ma tuafafine pele, ina ia tu'uina atu a outou taulaga ma le agalelei mo galuega fa'amisionare. O le faafaigaluegaina o tupe i le a'oa'oina o a tatou fanau ma tupulaga talavou, o le faafaigaluegaina poo le teuina lea o tupe mo le lumana'i o le ekalesia i le folafolaina o le talalelei, ma le seleselega mulimuli.

Ia faateleina e le Ali'i lau fai taulaga ma ia saga faamalosia atili lenei galuega tāua—ma ia avea moni a tatou a'oga ma lamepa e susulu i le mea pogisa, ina ia saunia ai se tupulaga faamaoni mo le toe afio mai o lo tatou Faaola.

O Le Matagaluega o A'oga a le Koneferenisi Aoao

Fa'apaiaina

MAU AUTU: “E saili mai outou ia te A‘u, tou te maua, pe a outou saili mai ia te A‘u ma outou loto atoa” (Jeremia 29:13).

Faitauga Fautuaina: *Steps to Christ, chapter 5, pp. 43-48.*

“E lē mafai e i tatou i lo tatou lava malosi ona tatou fetaia’i ma osofa’iga a le amio leaga; ma e soo se mea lava e fa’aliliueseina mai ai le mafaufau mai le Atua, ma soo se mea lava e ta’ita’ia atu ai i le fa’amaualuga po o le fa’alagolago o le tagata ia te ia lava, o le a mautinoa lava le saunia ai o le ala mo lo tatou fa’ato’ilaloina. O le fa’amoemoe o le Tusi Paia o le fa’atupuina a’e lea o le lē fa’alagolago o le tagata i lona lava malosi, a ia fa’alagolago atoa atu i le mana ma le malosi fa’alelagi.” - *Patriarchs and Prophets, p. 717.*

1. O LE TAUĀ A LE TAGATA LAVA IA

Ulua’i Aso, Iulai 26

a. Na fa’apefea ona fa’amatalaina e Paulo le tauā a le Kerisiano ma ‘auupega e manaomia mo lea tauā? Efeso 6:12-18.

“Na osofa’ia e Satani Keriso i ana fa’aosoosoga sili ona mata’utia ma malolosi, peita’i, na manumalo ai Keriso i ana osofa’iga uma. O na tauā uma na tauina e Keriso e mo i tatou; o Ona manumalo ua faigofie ma mafai ai ona tatou manumalo. E foa’iina mai e Keriso le malosi [mana] mo soo se tasi e ole atu ia te Ia mo lea malosi poo lea mana. E lē mafai e Satani ona manumalo i se tasi e aunoa ma lona loto i ai. E leai se malosi o le tiapolo e mafai ai ona ia pulea le mafaufau, pe fa’amalosia ai fo’i le tagata na te faia le agasala. E mafai e le tiapolo ona aumaia tofotofoga ma fa’aosoosoga, ae na te lē mafaia ona ia fa’aleagaina le loto. Na te mafaia ona aumaia puapuagā ma tigā, ae lē o le loto palapalā. O le mea moni ua manumalo nei Keriso ia Satani, ia avea le manumalo o Keriso o se fa’alototelega lea mo Ona soo ina ia latou tau ma le lototele le tauā e tete’e atu ai i le agasala ma Satani.” - *The Great Controversy, p. 510.*

e. O fea tonu lava lea o loo taumafai i ai Satani e na te pulea atoatoa? Faataoto 4:23.

“ ‘Auā e pei ona manatu le tagata i lona loto, ua fa’apea lava o ia’ Faataoto 23:7. E ao lava ona fa’afouina le loto e ala i le alofa tunoa fa’ale-Atua, a aunoa ma lea, o le a leai se aogā o le sailia o le olaga mamā. O lē o loo taumafai e fausia a’e se amio lelei ma viia e aunoa ma le alofa tunoa o Keriso, o loo fausia la e ia lona fale i luga o le oneone fetafea’i. A pesi mai afa malolosi o fa’aosoosoga o le a mautinoa lava le lepetia ma soloia i lalo.” - *Patriarchs and Prophets, p. 460.*

a. O a mea e tatau ona lafoa'i ina ia avea ai ma soo o Keriso? Luka 14:33; Mataio 6:24.

“I le tu'uina atu ai o i tatou i le Atua, e ao lava ona tatou lafoa'i mea uma e ono fa'ate'aeseina mai ai i tatou mai ia te Ia. O le mea lea ua fetalai mai ai le Fa'aola, 'E fa'apea fo'i so outou e lē lafoa'i ana mea uma, e lē mafai ona fai o ia mo'u soo' [Luka 14:33]. Soo se mea e ono tosina ese mai ai le loto mai le Atua, e tatau lava ona lafoa'i. Ua avea le Mamone ua fai ma tupua i le to'atele. O le naunau i tupe ma le mana'o i le oloa, o le filifili auro lea ua noatia ai e Satani i latou. O le tasi vasega toatele o tagata ua atua i le fia ta'uleleia ma mamalu poo viiga fa'alelalolagi. O nisi fo'i ua fai ma o latou tupua le sailia o se olaga fa'afifilemu mai le tauaveina o avega fa'aleolaga nei. Ae peita'i, o nei noataga e tatau lava ona matuā motusia. E lē mafai ona vaeluaina i tatou i le Atua ma le lalolagi. E lē mafai ona avea i tatou ma fanau a le Atua se'ivagana ua tu'uina atoatoa atu i tatou lava ia te Ia.” -*Steps to Christ*, p. 44.

e. O le a le vala'au pa'ia e tu'uina atu e le Ali'i iai latou uma o ē manana'o i se fa'afouga o le loto ma le olaga? Isaia 1:18; Ieremia 29:13; Iakopo 4:7-10.

“O le malo o le Atua, e pei ona fa'afoliga mai ai Satani, e lē o fa'avaeina i luga o se gaua'i tauaso ma le lē malamalama, poo se mafaufau lē pulea, ina ia tosina mai ai le mafaufau ma le loto fuatia ifo.... E lē fa'amalosia e le Atua le mana'o o Ana mea na faia. Na te lē taliaina fo'i se fa'aaloalo ua lē o tu'uina atu ma le loto malie atoa ma le mafaufau loloto i ai. O se gaua'i fa'atauānuina o le a taofia ai le fausiaina a'e moni lava o le mafaufau po o le amio; ma o le a avea ai le tagata ma se masini fa'atonutonu e aunoa ma se mafaufau. E lē o le fuafuaga lea a le Atua Fofoa. E finagalo o Ia ina ia oo atu le tagata, lē ua avea ma fa'atumutumuga o Lona mana fofoa, ia ausia e ia le tapula'a aupito i maualuga e mafai ai. Ua Ia fa'atulagaina i o tatou luma le maualuga o fa'amanuiaga ua Ia finagalo i ai, ina ia aumaia ai i tatou e ala i le fesoasoani mai o Lona alofa tunoa. Ua Ia vala'au mai ia i tatou ina ia tu'uina atu i tatou lava ia te Ia, ina ia mafai ai ona Ia galueāina i totonu ia i tatou Lona finagalo. I lē ua tu'uina mai nei ia i tatou ina ia tatou filifili, pe o le a fa'asa'olotoina mai i tatou mai le nofo pologa i le agasala, ina ia tofusia fa'atasi ai i tatou i le sa'olotoga ua tatau mo ē ua ta'ua o atalii o le Atua.” -*Ibid.*, pp. 43, 44.

“Ina ua fa'aalia mai Keriso o le Fa'aola o tagata, o lea e lē tatau ai i tagata ona fa'alagolago i ā latou lava galuega, o ā latou lava amiotonu, po o i latou lava i soo se auala nai lo le fa'alagolago i le Tamai Mamoe a le Atua o lē 'na te aveesea agasala a le lalolagi.' Ua avea o Ia ma Fautua i le Tama. O Ia ua vala'auina ai i tatou, 'O mai ia, ina tatou filifili ia, ua fetalai mai ai Ieova, e ui lava ina pei o ofu mūmū ā outou agasala, e sinasina ia e pei o le kiona; e ui lava ina mūmū ia e pei o le ie ulaula, e sinasina ia e pei o fulufulu mamoe.' O leni vala'au o loo tatou fa'alogoina pea i le asō. 'Aua ne'i taofia e le fa'amaualuga, po o le manatu fa'apito, poo le fa'afiaamiotonu se tasi mai le ta'uta'u atu ma le fa'aali atu o ana agasala, ina ia mafai ai e ia ona ia maua le mea na folafolaina.' -*Fundamentals of Christian Education*, p. 239.

a. O le ā le mea na tu'uina atu ai ia Keriso le aiā e Na te ave ai Lana fanau i le lagi? Kolose 1:14; Eperu 7:25.

“I le lotolotoi o le pogisa matautia, e foliga mai ua tu'ulafoaina e le Atua, na inumia ai e Keriso le ipu oona mulimuli o mafatiaga fa'aletagata. O na itula matautia na Ia fa'alagolago ai i Lona Tamā i le fa'amaonia lea o le taliaina o le ofoina atu o Ia. Na Ia masani lelei i le amio a Lona Tamā, na malamalama lelei o Ia i Lana fa'amasinogatonu, o Lona alofa tunoa, ma Lona alofa mutimutivale. O Lona fa'atuatua na aumaia ai Lona filemū i Lē ua avea ma Ona olioliga ina ia Ona usiusita'i i ai. Ma a o Ia tu'uina atu o Ia lava i le Atua i le loto maualalo, na fa'apenā ona aveesea ai lagona o le vavaeeseina mai lea o Ia i le alofa tunoa o Lona Tama. O le fa'atuatua fo'i, na avea ai Keriso ma tagata manumalo.” -*The Desire of Ages*, p. 756.

“Ua avea lava le meaalofo sili na faia e Iesu ua ofoina mai ai e le Atua le lagi atoa uma. Mai i va'aiga lava ia fa'aletagata, o se taulaga fa'apena i le ofoina mai o Lona soifua, e peisea'i o se mea e matuā leai sona tauā ma aogā. E foliga mai i mafaufauga fa'aletagata, ua pei le fuafuaga atoa o le fa'aolataga o se meanoa ma lē amana'iaina o le taumasuasua o le alofa tunoa. O le fa'afitia e le tagata o ia lava ma le taulaga atoatoa e fetai'i ma i tatou i mea uma. Ua tatou va'ava'ai ma le maofa tele i le aiga tagata, o ē e mumusu e siitia ma fa'atamaoagaina i le alofa e lē fa'atuāoia ua fa'aalia e Keriso. Ma atonu latou te fa'apea, Aisea ua maumau ai lenei taulaga tele?”

“Ae peita'i, o le taulaga togiola mo se lalolagi ua leiloa o se mea e matuā silisili, ma telē, ma le atoatoa. O le taulaga a Keriso e sili atu lona telē ma fa'apea ona oo atu i agaga uma na foafoaina e le Atua. E lē o se mea e fa'atapulaaina ina ia tau lava na o i latou o ē o le taliaina lea Meaalofo tele latou te maua. E ui e lē o tagata uma e lavea'iina; ae peita'i o le fuafuaga o le fa'aolataga e lē o se mea fa'alēaogā talu ai le lē ausia o mea uma ua saunia e lona agalelei. E tatau ona lava ma sili atu.” - *Ibid.*, pp. 565, 566.

e. O le a le mea e mana'omia e Iesu mai ia i latou uma e manana'o e avea ma Ana fanau ma manana'o e maua Lona Agaga? Fa'ataoto 23:26.

“O loo fa'atali [Iesu] ma le alofa mutimutivale e fa'afofoga i ta'utinoga a i latou ua sēsē, ma talia lo latou salamō. Na te fia silasila mai mo se fa'ailoga o le agaga fa'afetai mai ia i latou, e pei o le tina ona ia va'ava'ai atu i foliga ataata o lana tama ua ia alofa fa'apelepele i ai. O loo a'oa'oina i tatou e le Atua ina ia tatou vala'au atu ia te Ia o le Tamā. O Lona finagalo mo i tatou ia tatou malamalama pe na fa'apefea ona naunau mai ma le agalelei Lona finagalo mo i tatou i o tatou tofotofoga ma fa'aosoosoga uma.” -*Gospel Workers*, p. 210.

“O le a se mea tatou te tu'uina atu, pe a tatou gaua'i atoatoa atu ia te Ia? O se loto ua fa'aleagaina e le agasala, e tu'uina atu iā Iesu e fa'amamāina, e fufuluina i Lona lava toto, ma fa'aolaina e Lona alofa e lē fa'atuāoia. Ae ui lava i lea, ua manatu tagata o se mea e matuā faigatā tele le tu'uina atoatoa atu o i latou! E na o lo'u māsiasi e fa'alogi i nei upu fa'apenei, ou te mā fo'i e tusia nei upu.” -*Steps to Christ*, p. 46.

a. O le ā le fa'anaunauga moni o Paulo mo i latou o ē talitonu? Roma 12:1; 1 Tesalonia 5:23.

“E ui ina sa fa'asino atu nei upu iā Isaraelu anamua, a o nei upu o loo i ai se lesona tāua mo tagata o le Atua i ona po nei. Ina ua aioi atu le aposetolo i le ‘au uso ina ia tu'uina atu o latou tino ‘i le Atua o se taulaga ola, paia, ma malie,’ o iinei na ia fa'ailoaina mai ai mataupu fa'avae moni o le olaga fa'apaiaina. Ua lē na o se talitonuga, poo se lagona oso, pe ua na o ni upu, ae o se mataupu fa'avae ola atoa ma galuega, e ulufale atu ai mo le olaga o aso uma. E manaomia ai o tatou masaniga o le ‘ai, inu, ma laei, o se la'asaga e tausia ai le ola maloloina e lē gata o le tino, mafaufau, ae fa'apea foi ma le tulaga tau le amio, ina ia mafai ona tu'uina atu i le Alii o tatou tino, e lē o se taulaga ua fa'aleagaina i amioga sēsē, a o se ‘taulaga ola, paia, ma malie i le Atua.’ ” - *The Sanctified Life*, pp. 27, 28.

“E tataua ona tatou tu'uina atu i tatou lava i le auunaga i le Atua, ma e ao lava fo'i ina tatou saili ina ia faia o se taulaga ia latalata atu i le atoatoa e mafai ai. E lē finagalo le Atua i se mea e itiiti ifo tatou te faia nai lo le mea sili e mafai ona tatou ofoina atu. O i latou e alolofa ia te Ia ma le loto atoa, latou te naunau e avatu ia te Ia le auunaga sili o le olaga, ma o le a latou lē malolo i le sailia o auala e aumaia ai le malosi uma i o latou tagata taito'atasi ina ia ogatasi ma tulafono o le a fesoasoani tele mo i latou ina mafai ona latou faia Lona finagalo.” - *Patriarchs and Prophets*, pp. 352, 353.

e. Ina ua fa'alogo le motu o tagata i le lauga a Peteru i le aso Penetekoso, o le a se mea na mamafa i o latou loto? Galuega 2:37, 38.

“Na fa'alogo [le motu o tagata] o lauga ma fa'ailoa mai e le ‘au soo e fa'apea, o le Alo o le Atua lea na fa'asatauroina. Sa matuā gatete faitaulaga ma le ‘au faipule. Na oo atu le mata'u i le motu o tagata ina ua latou fa'alogo ma atuatuvaile ai. ‘Ua fa'alogo mai i latou, ona tuia lea o latou loto, ua latou fai mai ia Peteru ma le ‘au aposetolo uma, Sema e, le au uso e, se a se mea matou te faia?’ O i latou na fa'alogologo i le au soo o ni tagata fa'amaoni o Iutaia, o ē sa fa'amaoni i lo latou talitonuga. O le mana na o fa'atasi ma upu a le failauga na fa'amaonia ai iai latou e moni lava o Iesu o le Mesia....

“Na fa'amamafa atu e Peteru i tagata ua fa'amaonia le mea moni i lo latou teena o Keriso ona na fa'asesēina i latou e faitaulaga ma faipule; ma afai latou te fa'aauau pea ona fa'alagolago atu i nei tagata i sa latou upu, ma fa'atali lo latou taliaina o Keriso e ui ua latou fa'alogo i ai ae le'i faia e i latou, o le a lē mafai lava ona latou taliaina o Ia. O nei tagata mamalu, e ui ina ta'ua o ni tagata paia ma amioatua, ae na naunau lava i oa ma mamalu fa'alelalolagi. Latou te le'i manana'o e o mai ia Keriso e talia le malamalama.” - *The Acts of the Apostles*, pp. 43, 44.

a. O le ā se mea e aumaia ai le mautinoaga ina ia mafai ai ona tu'uina atu atoatoa i tatou i le Alii ma tatou tauaveina ai le fa'atusa o Keriso? Filipi 2:12, 13.

“E lē o fetalai atu le Atua ia te oe e te fefe ne'i lē fa'ataunu'uina e Ia ana folafolaga ia te oe, pe ua lē lava fo'i Lona onosa'i, pe ua leai fo'i sona alofa mutimutivale. A ia e mata'u ne'i lē mafai ona noatia fa'atasi lou loto i le finagalo o Keriso, ina ne'i pulea lou olaga e ou uiga masani ma uiga na e atiina a'e ifo i lou olaga. 'Auā o le Atua, o Ia Lē e galue i totonu ia te outou i Lona finagalo alofa, ina ia outou loto ma galulue i ai.' Ia e mata'u ne'i fa'alavelaveina e lou uiga fa'anatura le so'otaga o lou agaga ma le finagalo o le Matai Silisili Ese. Ia e mata'u ne'i fa'aleagaina e lou loto fa'apito le fuafuaga maualuga ua finagalo le Atua e fa'ataunu'uina e ala atu ia te oe. Ia e mata'u ne'i e fa'alagolago i lou lava malosi, ma ia e mata'u ne'i e aveesea lou lima mai le aao o Keriso ma e taumafai ai e te savali i le ala o lou lava olaga e aunoa ma Lona fa'atasi mai.” -*Christ's Object Lessons*, p. 161.

e. E fa'apefea ona fa'atumauiina le tumau o le fa'atuatua ma le gaua'i atoatoa atu i tapulaa poo fa'avae sa'o? Kalatia 2:20; Mataio 16:24, 25.

“O i latou e fia maua le fa'amanuiaga o le fa'apa'iaina e tatau ona muamua ona latou a'oa'oina le olaga o le fa'afitia e le tagata o ia lava. O le satauro o Keriso o le fatu atoa lea o loo i ai le manuia 'mamafa e matuā silisili ese lava ma le fa'avavau.' “ -*The Acts of Apostles*, p. 560.

“E lē mafai ona e suia o lou loto, e le mafai fo'i ona e tu'uina atu o oe lava i le Atua; ae e mafai ona e filifili e te auauna atu ia te Ia e ala i le fa'aaogaina o le malosi o lou lava loto fai filifiliga. E mafai ona e tu'uina atu ia te Ia lou loto; ona galue lea o Ia i totonu ia te oe i Lona finagalo alofa ina ia outou loto atu ma galulue i ai....

“E ala i le fa'aaogaina sa'o o le loto, e mafai ona faia ai o se suiga atoa i lou olaga. O lou tu'uina atu o lou loto ia Keriso, ua e fa'atasia ai oe lava ma Lē 'e silisili lava i ali'i sili uma ma faipule, atoa ma ē ua malolosi.' O le a e maua mai ia te Ia le malosi'aga e taofimauiina ai oe, ma o le ala lea e tu'uina atu ai pea i le Atua, o le a mafai ai ona e ola i se olaga toe fuata'i, o le ola lea e maua mai i le fa'atuatua i le Alo o le Atua.” -*The Desire of Ages*, pp.47, 48. [Author's italics.]

FESILI TOE FA'AMANATU

Aso Faraile, Iulai 31

1. O le a le mea e mana'omia ina ia fa'amanuiaina ai le taua ma le fili o o tatou agaga?
2. O le a le taua moni ina ia maua ai le manumalo i se fili ua uma ona faiaina?
3. O le a se mea e mafai ona tatou a'oa'oina mai le meaalofa a Keriso mo lo tatou fa'aolataga?
4. O le a le fa'amoemoega o le Atua mo e talitonu, i le tino atoa ma le agaga?
5. Afai e ogatasi o tatou loto ma le finagalo o le Atua, o le a le mea o le a tatou oo i ai i aso taitasi?

Fa'atuatua ma Taliaina

Mau Autu: “Ou te avatu fo’i iā te outou se loto fou, ma Ou tuu i totonu iā te outou le agaga fou; ou te aveesea le loto maaa ai o outou tino, ma Ou avatu iā te outou le loto aano” (Esekielu 36:26).

Faitauga Fautuaina: *Steps to Christ*, pp. 49-55.

“E lē mafai ona e togiolaina au agasala ua mavae; e lē mafai ona e suia pe liua o lou loto ma e fa’apa’iaina oe lava. Peita’i, ua folafola mai e le Atua, o le a Na faia nei mea uma mo oe e ala iā Keriso.” - *Steps to Christ*, p. 51.

1. FA’AMAGALOGA MA LE FILEMU

Ulua’i Aso, Aukuso 2

a. O le ā le folafolaga ofoofogia ma matagofie a le Atua e uiga i le fa’amagaloga ma le filemu? 1 Ioane 1:9.

“Ua e iloa ua fa’atumuina lou olaga i le alofa fa’apito, i le ma le agasala. Ua e naunau ina ia fa’amagaloina oe, ma fa’amamāina, ma fa’asa’olotoina. O loo tuu fesilisili lou loto, pe se ā le auala e mafai ai ona e maua o le lotogatasi ma le Atua, ma fa’alauteleina ai i totonu ia te oe o Lona fa’atusa?

“O le filemu lea e te mana’omia—o le fa’amagaloga lea a le Lagi ma le filemu ma le alofa e te lagonaina i totonu o lou agaga. E lē mafai e tupe ona e fa’atauina mai ai, e lē mafai ona e maua i le malosi o le mafaufau, e lē mafai fo’i e se mafaufau atamai ona ausia; e lē mafai ona e maua i le fa’alagolago i au lava taumafaiga e te maua mai ai. Ae peita’i o se meaalofa lea a le Atua ua Ia ofoina mai ia te oe, ‘e leai se tupe, e leai fo’i se tau e fa’atau a’i’ Isaia 55:1. E fai lava lea mou, pe afai e na’o na aapa atu iai o lou lima ma e taofi mau i ai.” -*Steps to Christ*, p. 49.

e. O le a se isi folafolaga taua o le a liua pe suia ai le tagata atoa i se tagata fou e lotogatasi ma le Atua? Esekielu 36:26.

“Ua uma nei ona e faaali o au agasala, ma ua e tu’u ese i lou loto. Ua e filifili e tu’uina atu oe lava i le Atua. Ia e alu atu nei ia te Ia, ma aioi atu ia te Ia ina ia fufulueseina au agasala ma avatu ia te oe se loto fou. Ona e talitonu lea o le a Na faia lenei mea ia te oe auā ua Ia folafola mai. O le lesona lava lenei na a’oa’oina e Iesu a o i ai o Ia i lalo nei, o le meaalofa ua folafolaina mai e le Atua ia i tatou, e ao lava ona tatou talitonu i ai, ma o le a tatou maua, ona avea ai lea mo i tatou.” -*Ibid.*, pp. 49, 50. [*Author’s Italics.*]

a. O le ā se mea na ta’u atu e Iesu i le tagata pipili o Petesa e fai, ma o le ā se lesona e mafai ona tatou a’oa’oina mai ai? Ioane 5:1-9.

“Se’i o tatou liliu atu i le tala i le tagata pipili o Petesa. Sa leai se fesoasoani mo le tagata puapuagatia; e le’i mafai e ia ona fa’aaogaina ona vae ma savali mo le tolusefulu valu tausaga. Ae na fetalai atu Iesu ia te ia, ‘Inā tu ia i luga, ave ia lou moega, ma ia e savali’ Atonu na mafai e lenei tagata ma’i ona tali atu fa’apea, ‘Le Ali’i e, afai e te finagalo ina ia fa’amālōlōina o a’u, ia faia lava e tusa ma Lau fetalaiga.’ Peita’i e leai, na ia talitonu i le upu a Keriso, na ia talitonu ua fa’amālōlōina o ia, ma ia faia loa se taumafaiga ina ia tū ai i luga; na ia loto lava ina savali, ma na ia savali loa. Na faia e lenei tagata e tusa ma le upu a Keriso, ma na foa’iina mai e le Atua le malosi i lenei tagata. Ma na fa’amālōlōina o ia.” *-Steps to Christ, p. 50. [Author’s italics.]*

“E le’i tu’uina atu muamua e Iesu ia te ia se fa’ailoga o le mana poo se fesoasoani fa’alelagi. Atonu na ono taofia mai i lenei tagata le masalosalo, ina ia leiloa ai lona avanoa lava e tasi e fa’amalolo ai. Peita’i na ia talitonu i le fetalaiga a Keriso, ma ia taumafai e fa’atinoina na mafua ai ona ia maua le malosi.

“E ala i le fa’atuatua lava lea e tasi, e mafai ai ona tatou maua le malologa fa’aleagaga. Talu ai o le agasala ua vavae’eseina mai ai i tatou mai i le ola mai le Atua. Ua fa’ama’ia ma pipili o tatou agaga. E lē mafai e i tatou lava ona tatou maua o se olaga paia, e pei fo’i o le tagata pipili ona lē mafai ona ia savali i lona lava malosi. E to’atele ua latou iloa lo latou vaivai ma le leai o so latou fesoasoani, ma latou naunau ai mo lea ola fa’aleagaga ina ia aumaia ai i latou ina ia toe lelei ma le Atua; ma latou tauivi ina ia maua. I lo latou lagonaina ai o lo latou vaivai na latou alalaga ai, ‘Auē o a’u le tagata malaia! O ai se lavea’i ia te a’u ai le tino o lenei oti?’ Roma 7:24. Ia va’ava’ai a’ē nei tagata lotovaivai ma latou tauivi ai. O lo’o aapa mai le Fa’aola mo Lana fanau na Ia fa’atauina i Lona toto, ma fetalai atu i ai ma Lona alofa mutimutivale tele, ‘E te fia malolo ea?’ Ua Ia vala’au atu ia te oe e te tula’i ua e malolo ma ua ia te oe le filemu.” *-The Desire of Ages, p. 203.*

**e. O le ā le folafolaga mo le tagata agasala e maua e ala ia Keriso?
2 Nofoaiga a Tupu 7:14; Hosea 14:4.**

“E lē mafai ona e togiolaina au agasala ua mavae; e lē mafai fo’i ona liua o lou loto ma e fa’apaiaina ai o oe lava. Ae peita’i ua folafola mai e le Atua o le a Na faia nei mea uma mo oe e ala ia Keriso. Ua e talitonu ea i lena folafolaga. Ua e fa’aali atu au agasala ma tuuina atu oe lava i le Atua. Ua e matuā loto atu ea e auauna ia te Ia. Ma i le taimi lava e te faia ai lenei mea, e fa’ataunuuna ai e le Atua Lana folafolaga ia te oe. Afai e te talitonu i lena folafolaga—ma e talitonu ua fa’amagaloina oe ma fa’amamaina—o le a fa’apea lava ona foa’iina mai e le Atua ia te oe, ma fa’amaloloina oe, e pei lava ona tu’uina atu e Keriso i le tagata pipili le malosi e savali ai ina ua talitonu lena tagata ua fa’amaloloina o ia. E fa’apea foi ona faia ia i tatou pe afai e te talitonu i ai.

“Aua e te fa’atali se’i e lagonaina ua fa’amaloloina oe, peita’i e tataua ona e fa’apea ifo, ‘Ou te talitonu i ai; i lē ua fa’apea lava, e lē ona ua ou lagonaina, ae peita’i ona o le folafolaga a le Atua.’ ” *-Steps to Christ, p. 51.*

**a. Pe a taliaina Iesu o le Fa'aola, o le a se mea e tupu i agasala ua mavae?
Roma 3:24, 25; 5:1, 9, 10.**

“Ua fetalai mai Iesu, ‘O mea uma lava tou te ole mai ai i a outou tatalo, ina fa’atuatua ia o le a maua e outou, ona faia lava lea mo outou’ Mareko 11:24. O lenei folafolaga e i ai ona tu’utu’uga fa’atapulaaina-ia tatou tatalo atu i le Atua e tusa ai ma Lona finagalo. Auā o le finagalo lava lea o le Atua ia fa’amamāina i tatou mai le agasala, ma ia avea i tatou ma Ana fanau, ma ia mafai ona tatou ola ai i se olaga fa’apaiaina. O lea e mafai ai ona tatou ole atu mo nei fa’amanuiaga, ma talitonu o le a tatou maua lava, ma tatou fa’afetai ai i le Atua ina ua tatou maua. O lo tatou avanoa lea e o atu ai ia Iesu ma fa’amamāina i tatou, ma tūtū ai i luma o le tulafono e aunoa ma se māasiasi po o se fefe.” -*Steps to Christ*, p. 51.

e. O le a le tulaga o le tagata talitonu i luma o le Atua? Roma 8:1.

“E ao ina va’aia i le olaga o le Kerisiano le agamalū ae lē o le fa’anoanoa po o le manatu ua leai sona aogā. E ao ina tatou ola i se olaga e mafai ona fa’amanuia mai ai le Atua ia i tatou, auā o se avanoa tāua lea ua tu’uina mai mo tagata uma. E lē finagalo le Atua ina ia tatou nonofo i le pogisā ma le oona o le fa’asalaga o le agasala. O le tagata agamalū fa’amaoni e lē feālua’i ma lona ulu ua punou i le fa’anoanoa po o le manatu ifo ia te ia lava. E ao ona tatou o atu ia Iesu mo le fa’amagaloga, ma tutū atu ai i luma o le tulafono e aunoa ma se māasiasi po o se fefe.” -*The Great Controversy*, p. 477.

“Pe a tatou tu’uina atoatoa atu i tatou i le Atua, ma talitonu ma le fa’atuatua atoatoa, o le toto o Keriso e fa’amamāina ai a tatou agasala uma. E mafai ona fa’asa’olotoina mai ai le loto mai le lagonaina o le fa’asalaga. E ala i le fa’atuatua i Lona toto togiola, e mafai ai ona faia tagata uma ia atoatoa e ala ia Keriso Iesu. E lē tataua ona tatou popole i le mea e finagalo i ai Keriso ma le Atua e uiga ia i tatou, ae peita’i e tataua ona tatou manatu i le mea e finagalo i ai le Atua ona o Keriso, o Lē ua avea mo tatou Sui. Ma ua outou talia ai le Alo Pele o le Atua.” -*Selected Messages*, bk. 2, p. 32, 33.

i. O le a se lagona e tataua lava ona iloa e i latou uma ua ulufale atu i lenei feagaiga ma le Atua? 1 Peteru 1:18, 19; 1 Korinito 6:19, 20; Kalatia 3:26.

“O lenei, e lē toe aiā foi outou ia te outou; auā ua fa’atauina outou i le tau. [1 Peteru 1:18, 19]. Mai lou talitonu atoatoa i le Atua, ua fanauina ai e le Agaga Paia se ola fou i totonu o lou loto. Ua pei lava oe o se tamaitiiti ua fanau mai i le aiga o le Atua, ma e alofa o Ia ia te oe e pei ona Ia alofa i Lona Alo.” -*Steps to Christ*, pp. 51, 52.

a. E fa'apefea i le tagata talitonu ona ia talitonuina ia lava? Kolose 2:6.

“O lenei ua e tu'uina atu lou lava tagata ia Iesu, 'aia le toe tu'umuli ai, 'aia ne'i e toe ave'eseina oe mai ia te Ia, a ia e fa'apea ifo i lea aso ma lea aso, 'O so Keriso lava a'u; ua ou tu'uina atu a'u ia te Ia,' ma fa'atoga atu ia te Ia ina ia foa'i mai Lona Agaga ia te oe ma Na tausii ia te oe i Lona alofa tunoa. E pei ona i ai i le tu'uina atu o oe lava i le Atua, ma talitonu atoa ia te Ia, e avea ai oe ma Ana fanau, e fa'apea fo'i ona e ola ia te Ia. Fai mai le aposetolo, 'O lenei, fa'apei ona outou talia o le Alii o Keriso Iesu, ia fa'apea fo'i ona savavali ai outou o iā te Ia.' Kolose 2:6.

“O i ai nisi e foliga mai ua latou manatu e fa'apea, e tataua ona latou mua'i fa'amaonia i le Atua ua toe fuata'iina i latou, a'o le'i mafai ona latou mauaina o Lana fa'amanuiaga. Ae peita'i, atonu latou te maua lava le fa'amanuiaga a le Atua i le taimi lava lena. E ao ona latou maua o Lona alofa tunoa, ma le Agaga o Keriso, e fesoasoani i lo latou vaivai, auā a aunoa ma lea, e lē mafai ona latou tete'e atu i le leaga. E fiafia tele Iesu pe a fa'apea tatou te o atu ia te Ia e tusa ai ma lo tatou lava tulaga moni o i ai, i lo tatou tulaga agasala, ma aunoa ma se malosii, ma le fa'alagolago atu i Lona fesoasoani. E mafai ona tatou o atu ia te Ia ma o tatou vaivaiga uma, o lo tatou valea, lo tatou uiga agasala, ma fa'apau'ū atu i Ona aao ma le loto salamō. O Lona mamalu e fusia ai i tatou i aao o Lona alofa ma fusifusia o tatou manu'a, ma fa'amamāina i tatou mai le leaga uma.” -*Steps to Christ*, p. 52.

e. O le a le aiaiga mo mea sēsē na faia i le ala o le a'oa'oina? 1 Ioane 2:1, 2.

“Ia tu'u ese le masalosalo e fa'apea o folafolaga a le Atua e lē mo oe. E mo tagata agasala uma ua salamō. Ua saunia e Keriso fa'alumaga o le malosii ma le alofa tunoa ina ia aumaia e agelu ua avea ma auauna i agaga uma o ē talitonu. E leai se tasi ua fa'apea ona pa'u i le lua o le agasala o le a lē mafai ona latou maua o lenei malosii'aga, ma lenei fa'amamāina, ma lenei ta'uamionuina ia Keriso Iesu, o Lē na maliu mo i latou. O loo fa'atalitali mai o Ia Na te aveesea o latou ofu ua pisia ma fa'aleagaina i le agasala, ma Na fa'aofuina i latou i ofu sisina o le amionu; Ua Ia fetalai atu ia i latou ia latou maua le ola ae lē o le oti.” -*Ibid.*, pp. 52, 53.

i. Fa'amatala pe fa'apefea ona fa'amalosia i tatou i lenei savaliga. 1 Ioane 1:7; Kalatia 5:16, 17, 25.

“O i latou o loo savavali i ala o le poto, tusa lava po o puapuaga, e matuā fa'atumuina i latou i le olioli; auā o Ia o lē ua alofaina e o latou agaga, e savavali fa'atasi ma i latou i o latou itu uma e ui e lē o va'aia. O la'asaga taitasi uma agai i luga, latou te iloa lelei ai atili le pa'i atu o Lona aao; ma la'asaga taitasi uma e gafoa atu ai le pupula mai Mea e Lē o Va'aia i o latou ala uma; a o fa'apea ona latou vivii i vi'iga, ma ofoina atu ai vi'iga i se leo maua, e alu a'e fa'atasi ai ma vi'iga a agelu i luma o le nofoālii.” -*Thoughts from the Mount of Blessing*, p. 140.

a. O a tu'utu'uga ina ia taliaina ai i tatou e le Atua? Isaia 55:7; 44:22.

“E le faia e le Atua se feutaga'iga ma i tatou e pei ona faia e tagata. O Ona manatunatuga o manatunatuga o le alofa mutimutivale, ma le alofa, ma le agalelei e sili ona agamalu.” -*Steps to Christ, p. 53.*

“So o se tasi e fa'amaulalo i le a'oa'iga a le Atua ma fa'amaulaloina lona loto i le fa'aali atu o agasala ma le salamō e pei ona faia e Tavita, e mautinoa lava o lo'o i ai le fa'amoemoe mo ia. So'o se tasi e talia ma le fa'atuatua folafolaga a le Atua, o le a maua e ia le fa'amagaloga. E lē tu'ua lava e le Ali'i se agaga e sau ia te Ia ma le loto salamō fa'amaoni.” -*Patriarchs and Prophets, p. 726.*

e. O le a le uiga moni lava o lo tatou Tamā fa'alelagi i tagata uma ua sēsē? Esekielu 18:32; Luka 15:18-20.

“O lo'o nofo sauni pea Satani na te gaoia lo tatou talitonu ma lo tatou mautinoa lelei o folafolaga tāua a le Atua. O lona mana'o lenei, ia na aveesea uma nai malamalama mu itiiti o le fa'amoemoe mai le agaga, peita'i, ia 'aua lava ne'i e fa'atagaina o ia e faia lenei mea ia te oe. Aua e te fa'alogo atu i ana fa'aosoosoga, a ia e fai atu i ai, 'Na maliu Iesu ina ia ou ola. E alofa o Ia ia te a'u, ma e lē finagalo o Ia ia ou fano...Ua fa'aailoa mai i lenei fa'ataoto le auala o le a toe taliaina mai ai le tagata na ta'asē: [Luka 15:18-20].

“Peita'i, e ui ina aumaia e lenei fa'ataoto le loto ootia ma le nutimomoia, ae e lē o aumaia atoa ai le fa'aaliga o le alofa mutimutivale tele o le Tamā fa'alelagi. Ua folafola mai e le Ali'i e ala mai i Lana perofeta, 'O le alofa e fa'avavau ua Ou alofa atu ai ia te oe; o le mea lea ua ou fa'afualoaina ai Lo'u alofa ia te oe' Ieremia 31:3. A o mamao atu pea le tagata agasala mai le fale o lona Tama, ma fa'ama'umau ana mea i le nu'u ese, o lo'o naunau atu pea le finagalo o lona Tamā ia te ia; ma o mana'oga uma o le tagata agasala e toe fia foi atu i le Atua, e lē tupu fua o lea fa'alogona, ae peita'i o le galuega alofa a le Agaga o le Atua i totonu o le loto, o lo o aioi atu pea ma tau toso mai lē ua sē ese i le fatafata o lona Tamā.” -*Steps to Christ, pp. 53. 54. [Author's italics.]*

1. O le a se mea e aumaia i le loto o lē ua fa'amagaloina ana agasala?
2. Aisea na fa'afuase'i ai ona mafai e le pipili o Petesa ona savali?
3. A tatou talia Keriso o lo tatou Fa'aola, o le a le folafolaga o le a fai mo i tatou?
4. O le a le mealilo o le savavali manumalo fa'atasi ma Keriso?
5. Fa'amatala le eseese i le va o le ita lotoleaga o Satani ma le alofa fa'aola o le Tamā.

O le Tofotofoina o lē Ua Fia Avea ma So'o

MAU AUTU: “O lenei, afai o ia Keriso se tasi, o le tagata fou ia; ua mavae mea tuai; faauta, ua fa’afouina mea uma” (2 Korinito 5:17).

Faitauga Fautuaina: *Steps to Christ, chapter 7, pp. 57-65*

“E lē fa’aalia le uiga moni o se tagata i ni ana galuega lelei po o mea lē lelei fo’i e faia ta’itasitasi i nisi o taimi, ae peita’i, e fa’aalia e ala i le uiga o ana upu ma amioga po o gaioiga e fai so’o.”-Steps to Christ, pp. 57, 58.

1. O LE GALUEGA A LE AGAGA

Ulua’i Aso, Aukuso 9

a. O le ā le lesona na a’oa’oina mai e Keriso i le fa’amatalaina o le galuega o le liuaga? Ioane 3:5-8.

“Atonu o le a lē mafaia e le tagata ona ta’uina mai o le aso tonu po o le nofoaga tonu fo’i na ia liua ai, po o le toe su’esu’e atu fo’i i tua i le uiga ma la’asaga uma o lona liuaga; ae e lē fa’apea o le a avea lea ma ala e ta’ua ai o ia o se tasi e le’i liua... E pei o le matagi e lē māva’aia lona tino, ae fa’alogoina ma va’aia lelei fua o lana galuega, e fa’apea lava le Agaga o le Atua ma Lana galuega i loto o tagata. O le mana lea e toe fa’afouina ai, e lē va’aia e mata fa’aletino, ae na te galueāina le ola fou i le agaga; ma toe foafoaina le tagata fou ia foliga i le fa’atusa o le Atua.” - *Steps to Christ, p. 57.*

e. O a suiga o le a aliali mai i le olaga o lē ua liua moni lava? Roma 12:9-18; 2 Korinito 5:17.

“E ui e lē mafai ona tatou faia o se mea e liua ai o tatou loto pe aumaia ai i tatou ia ogatasi ma le finagalo o le Atua; e ui e lē tatau ona tatou fa’alagolago ia i tatou lava po o a tatou galuega lelei, ae o le a fa’aalia lava i o tatou olaga pe afai o lo o i totonu ia i tatou le alofa tunoa o le Atua. O le a va’aia se suiga i le amio, ma masaniga, ma mea e tausisi i ai. O le a matuā iloga lava ona i ai o le eseese i le amio sa faia muamua ma le amio ua i ai nei...”

“E moni e mafai ona maua o foliga o le amio tatau e aunoa ma le mana fa’afouina o Keriso. O le fia ta’uleleia ma le mana’o ina ia alofagia ma viia e isi tagata, e mafai ona maua i foliga o le olaga ua fa’atonutonuina lelei. O le fia fa’aeteete ifo o le tagata ia te ia lava, e mafai ona ta’ita’ia atu ai i tatou e ‘aloese mai le uiga aliali o le leaga. E mafai e se tasi ua pulea e le agaga o le alofa fa’apito ona faia o ni galuega alofa. O le ā fa’apefea la ona tatou mautinoaina o le tulaga tonu ua tatou i ai?

“O ai ua i ai le loto? O ai ua iai o tatou mafaufauga?” -*Ibid., pp. 57, 58.*

a. O a fua e fua mai e i latou ua fa'atumuina i le Agaga? Kalatia 5:22, 23.

“O i latou ua avea ma tagata fou ia Keriso Iesu o le a latou fuaina mai fua o le Agaga.... O mea sa latou inoino muamua i ai, ua latou fiafia nei i ai, a o mea sa latou fiafia muamua i ai, ua latou inoino nei i ai. O i latou sa fa'amauualuluga ma fia iloa, ua avea nei ma ē agamalū ma loto maulalo. O ē sa fia tagata ma fa'asausili, ua avea ma tagata fa'autauta lelei ma ua lē o toe fia muamua. O le tagata na fiafia i le inu 'ava ua lē toe onā, ma lē sa soona ulavale ua avea ma tagata amio mamā ma filemu. O tū ma uiga masani lē aogā a le lalolagi ua tu'ueseina. O le tagata Kerisiano o le ā lē sailia lava e ia 'teuga e faia i le tino,' ae peita'i 'o le tagata lilo o le loto, ia teua lea i le mea e lē pala, o le loto agamalū ma le filemu' 1 Peteru 3:3, 4.” -*Steps to Christ, pp. 58, 59.*

“O le aafiaga po o le galuega a le Agaga Paia, o le a va'aia ai le soifua ai o Keriso i totonu o le loto. Tatou te lē o vā'ai atu ia Keriso ma talanoa atu ia te Ia, ae peita'i o Lona Agaga Paia o lo o latalata mai pea ia i tatou i soo se nofoaga tatou te i ai. O lo o galue i totonu o tagata uma o ē latou te talia Keriso. O i latou ua iloa o loo afio ai le Agaga, e fa'aalia mai ai fo'i fua o le Agaga-o le alofa, olioli, filemu, onosai, agamalū, agalelei, ma le fa'atuatua.” -*The SDA Bible Commentary [E. G. White Comments), vol. 6, p. 1112.*

e. O le a le fa'amaoniga o le salamo moni? Esekielu 33:14, 15.

“E leai se fa'amaoniga o le salamō fa'amaoni, se'ivagana ua galueāina ai le toe fuata'iina. Afai na te toe fa'afo'i atu le mea na ia tauto ai, toe totogi le mea na ia gaoia, ma fa'aali atu ana agasala, ma alofa atu i le Atua atoa ma ona uso a tagata, o fua ia e mafai ai e le tagata agasala ona ia mautinoa 'ua oo atu ia i le ola, sa i le oti.

“O i tatou o tagata agasala, ma le sesē gofie, ae pe a tatou o atu ia Keriso ma ua tatou maua le fa'amagaloga mai Lona alofa tunoa, o le a puna a'e loa le alofa i o tatou loto. Ona māmā ai lea o avega uma, auā o le amo e fa'ae'e mai e Keriso, e ave gofie lea. E avea tiute uma ma fiafiaga, ma o le a avea foi taulaga ma mea e fa'afiafiaina ai. O le ala na foliga mai sa ufitia muamua i le pogisa, ua susulu mai i ai ave o le malamalama mai le La o le Amiotonu.

“O le a va'aia le matagofie o le amio a Keriso i olaga a Ona soo. Sa fiafia o Ia e faia le finagalo o le Atua. O le alofa i le Atua, ma le maelegā i le faia o mea e viia ai o Ia, o mea ia sa avea ma malosiaga na pulea ai le soifuaga o lo tatou Fa'aola. O Ana galuega uma na fa'amatagofieina ma fa'amalumuina i le alofa. O le alofa e mai le Atua lea. E lē tupu pe maua mai o lea alofa i le loto e le'i fa'apa'iaina. E gata ona maua i le loto ua pule ai Iesu. 'Auā ua tatou alolofa ia te Ia, auā na Ia mua'i alofa mai ia te i tatou.' 1 Ioane 4:19, R.V. O le alofa o le fa'avae lea o galuega uma lea e ta'ita'ia atu ai le loto ua fa'afouina e le alofa tunoa fa'alelagi. E suia ai le amio, pulea ai lagona, pulea ai tu'inanau, e tineia ai le faitagai, ma na fa'alauteleina atili ai manatu lelei ma le aogā. O lenei alofa ua fa'apelepeleina i le agaga, e na te fa'amatagofieina uiga uma o le olaga ma fa'asalalauina atu se aafiaga fa'amamāina ia i latou uma o lo o siomia ai.” - *Steps to Christ, p. 59.*

a. O a mea sesē matautia ua taliaina e le toatele o ē ua fai mai o Kerisiano? Filipi 3:9; Roma 10:3; Iakopo 2:17.

“E lua lava mea sesē e tatau ona matuā mataala i ai le fanau a le Atua—aemaise lava i latou ua fa’ato’a latou maua le fa’atuatua i Lona alofa tunoa. O le sesē muamua, e pei ona mua’i fa’amatalaina, o le va’ava’ai atu lea i a latou lava galuega, o le fa’alagolago lea i ni mea e mafai ona latou faia, ina ia maua ai so latou leleiga ma le Atua. O lē o loo taumafai na te ausia le tapulaa o le fa’apaiaina i ana lava galuega i le tausia o le tulafono, ua na taumafai e faia se mea e lē mafaia lava e se tasi ona ausia. Soo se mea ua loto le fanau a tagata latou te faia e aunoa ma Keriso, ua fa’aleagaina i le manatu faapito ma le uiga agasala. Ua na o le alofa tunoa lava o Keriso e ala i lo tatou fa’atuatua i ai, e mafai ona fa’apaiaina ai i tatou.

“O lona lua o sesē, e lē itiiti ifo lona tulaga matautia nai lo le sesē muamua, o le manatu lea e fa’apea, o le fa’atuatua ia Keriso e tu’usa’olotoina ai tagata mai le tausia o le tulafono a le Atua; talu ai ona o le manatu lea ua fa’asilia ai le fa’atuatua e peiseaī ua na o lea le auala e tasi tatou te maua ai le alofa tunoa o Keriso, ona ta’ufa’atauvaaina ai lea o galuega ua peiseaī ua leai lava se aogā o a tatou galuega i le fa’aolaina o i tatou.” - *Steps to Christ*, pp. 59, 60.

e. E fa’apefea ona fa’amaonia mai e le folafolaga o le feagaiga fou e le tu’usaunoaina i tatou e le alofa tunoa o Keriso mai le usiusitai i le tulafono a le Atua? Eperu 8:10; 10:16.

“O le tulafono a le Atua o se fa’aaliga lava lea o Lona uiga moni po o Lona natura, o se fa’atusa lava lea o le mataupu fa’avae silisili o le alofa, auā o le fa’avae lea o Lana faigā malo i le lagi atoa fo’i ma le lalolagi. Afai ua fa’afouina o tatou loto i le fa’atusa o le Atua, ma ua totoina le alofa fa’alelagi i le agaga, po ua lē tatau ea la ona fa’ataunu’uina ai ma galuega o le tulafono a le Atua i le olaga? Pe afai e totoina i le loto le mataupu silisili o le alofa, ma ua fa’afouina ai le tagata e tusa ma le fa’atusa o Lē na faia o ia, ona fa’ataunu’uina ai lea ia te ia o le folafolaga fa’alefeagaiga fou [Eperu 10:16 quoted]. Ma afai ua tusia le tulafono i le loto, pe o le a lē fa’atulagaina ai ea fa’apea ma le olaga o se tagata? O le usitai, o lona uiga o le auauna atu lea ma le fa’amaoni i le Atua i le alofa—o le fa’ailoga moni lava lea o lē ua tatau ona avea ma soo.” - *Ibid.*, p. 60.

“Ua matuā manaomia lava e le Atua i le taimi lava lenei le mea tonu lava lea na Ia manaomia mai le ulugalii na mamā ma paia i Etena, o le usiusitai atoatoa lea i Ana poloa’iga. O Lana tulafono e tumau pea ona i ai i augātupulaga uma. O le tulaga silisili ma le maualuga o le amiotonu e pei ona fa’aalia i le Feagaiga Tuai, e le o fa’aitiitia lea i le Feagaiga Fou. E lē o le galuega o le talalelei le fa’avaivaia po o le fa’aitiitia o manaoga o le tulafono paia a le Atua, ae o le aumaia lea o tagata i se tulaga e mafai ai ona latou tausia Ana poloa’iga.

“O le fa’atuatua ia Keriso lea e fa’aolaina ai le agaga, e lē o le mea lea o lo o fa’atusaina pe fa’amatalaina e le toatele, ma latou alalaga ai e fa’apea, ‘Tau lava o lou fa’atuatua, na o le talitonu lava ma fa’atuatua ia Keriso, ona fa’aolaina ai lea o oe. Na pau lava lea o le mea e tatau ona e faia e te maua ai le ola. Peita’i, e ui o le fa’atuatua moni o le fa’alagolago atoa atu lea ia Keriso mo le fa’aolataga, ae o le a fa’apea fo’i ona ta’ita’ia atu ai i le usiusitai atoatoa atu i le tulafono a le Atua.” - *The SDA Bible Commentary [E. G. White Comments]*, vol. 6, p. 1073.

a. O le ā se mea o lo o fa'atalitali mai i ē o lo'o tausiniō mo le ola e fa'avavau? 1 Ioane 5:2, 3; 1 Korinito 7:19.

“Pe afai e te tu'uina atu oe lava ia [Keriso], ma e taliaina ai o Ia e avea mōu Fa'aola, o lea la, e ui lava ina agasala tele lou olaga, a o le a faitauina oe o sē ua amiotonu ona o Ia. O le a tu mai le amio a Keriso e sui a'i lau amio, ona talia ai lea o oe i luma o le Atua e pei lava e te le'i agasala.

“E lē gata i lea, o le a suia e Keriso le loto. E afio o Ia i lou loto i le fa'atuatua. E tatau ona e tausia lenei so'otaga ola ma Keriso i le fa'atuatua, ma le tu'uina atu pea o lou loto ia te Ia; ma afai e te faia lenei mea, o le a galue o Ia i totonu ia te oe ina ia e loto atu ma faia mea uma e tusa ma Lona finagalo alofa. O lea e mafai ai ona e fa'apea ifo, ‘O le ola fo'i ou te ola ai nei i le tino, ou te ola ai lava i le fa'atuatua i le Alo o le Atua, o lē na alofa mai ia te a'u, ma foa'iina mai o Ia e Ia e fai mo'u sui’ Kalatia 2:20. Na fa'apea fo'i ona fetalai atu o Iesu i Ona soo, ‘Auā e lē o outou e tautala atu ai, a o le Agaga o lo outou Tamā e tautala mai ai i totonu iā te outou’ Mataio 10:20. O le mea lea, ina o galue Keriso i totonu iā te outou, o le a fa'aalia ai lea lava agaga e tasi ia te outou, ma o le uiga fo'i lea o galuega lelei o le a faia—o galuega ia o le amiotonu ma le usiusitai.

“O lea la, ua leai lava se mea o i totonu ia i tatou e ao ai ona tatou mitamita. E leai se mafuaaga e tatau ai ona fa'amaualugaina o i tatou. E na o le pau lava le fa'avae e tasi o lo tatou faamoemoe, o le amiotonu lea a Keriso ina ia Ona foa'iina mai ia i tatou, ma le amiotonu lea e galueā'ina pea e Lona Agaga i totonu ia i tatou.” -*Steps to Christ*, p. 63.

e. E ui lava ina ua saunia e le Alii mo tagata uma se auala ina ia maua ai le faaolataga, ae aisea ua sesē pe misia ai e nisi lea auala? Efeso 2:8,9; Galuega 4:12; Roma 9:30-33.

“O le ā lē fa'asa'olotoina lava i tatou e le fa'atuatua mai le mataupu e uiga i le usiusita'i, peita'i, o le fa'atuatua, ua na o le fa'atuatua lava, e mafai ona avea ai i tatou ma ē ua fa'asafuaina mai i ai le alofa tunoa o Keriso, a o lea fo'i le malosi'aga e mafai ai ona tatou fa'atinoina le usiusita'i....

“O le mea ua ta'ua o le fa'atuatua ia Keriso lea e fa'amatalaina mai e fa'apea e fa'asa'olotoina mai ai tagata mai le tiute o le usiusita'i i le Atua, e lē o se fa'atuatua lea mea, a o le fa'amaualuga ma le fia pule. ‘Auā o le alofa tunoa ua fa'aolaina ai outou i le fa'atuatua.’ Ae peita'i, o le ‘fa'atuatua, pe afai e lē i ai galuega, e mate lava ia ina ua na o ia.’ Efeso 2:8; Iakopo 2:17. Na tautala fo'i Iesu e uiga ia te Ia lava a'o le'i afio mai o Ia i le lalolagi, ‘Lo'u Atua e, Ou te fiafia e fai Lou finagalo, o lo'o i totonu lava ia te A'u Lau tulafono.’ Salamo 40:8. Ma a'o le'i toe afio a'e o Ia i le lagi, na Ia folafola mai, ‘Pei ona Ou tausia o poloa'iga a lo'u Tamā, ma Ou tumau ai i Lona alofa’ Ioane 15:10. Ua fai mai le Tusi Paia, ‘O le mea foi lea tatou te iloa ai ua tatou iloa o Ia, pe afai tatou te tausi i Ana poloa'iga.... O lē fa'apea o lo'o tumau o ia i totonu ia te Ia, e tatau ona savali o lenā tagata fa'apei ona savali o Ia.’ 1 Ioane 2:3-6. ‘Auā na tigāina Keriso lava o le sui o outou, ua tu'uina mai ai e Ia le fa'aa'oa'o mo outou, ina ia outou mulimuli atu i Ona tulagāaa.’ 1 Peteru 2:21.” -*Ibid.*, pp. 60-62.

a. Na fa'apefea ona ola manumalo le aposetolo o Paulo? 1 Korinito 15:30, 31.

“E tatau ona e tausia lenei sootaga ola ma Keriso i le fa'atuatua ma le tuuina atu pea o lou loto ia te Ia; ma afai e te faia lenei mea, o le a galue o Ia i totonu ia te oe ina ia e loto atu ma faia mea uma e tusa ma Lona finagalo alofa.” -*Steps to Christ, pp. 62, 63.*

“A o i ai Keriso i Lona soifuaga fa'ale-tagata, na Ia fausia a'e se uiga atoatoa o le amio, ma o lenei amio atoatoa ua Ia ofoina mai ma foaiina mai mo i tatou. ‘O a matou amiotonu uma e tusa ia ma le ie o le ma'i.’ Isaia 64:6. Auā o mea uma tatou te taumafai e faia mo i tatou lava, ua fa'aleagaina ma ua pisia i le agasala. Ae peita'i o le Alo o le Atua ‘na fa'aalia mai o Ia ina ia aveeseina e Ia tatou agasala; e lē o ia te Ia foi se agasala.’ Sa usiusitai atoatoa Keriso i manaoga uma o le tulafono. Na Ia fetalai mai e uiga ia te Ia, ‘Lo'u Atua e, Ou te fiafia e fai Lou finagalo, o loo i totonu lava ia te A'u Lau tulafono.’ Salamo 40:8... O Lona usiusitai atoatoa ua Ia faia ai ina ia mafai ai e tagata uma ona usiusitai i poloaiga uma a le Atua. Pe afai tatou te tuuina atu i tatou lava ia Keriso, ua tu'ufa'atasia ai o tatou loto ma Lona finagalo, ua tasi ai i tatou i Lona finagalo, ua tasi o tatou mafaufau ma Lona mafaufau, ma fa'apea ona fa'atagataotauaina ai o tatou mafaufau ia te Ia; ma ua tatou ola ai i Lona soifuaga. O le uiga tonu lenei o le fa'aofuina i le ofu o Lana amiotonu.” -*Christ's Object Lessons, p. 312.*

e. O le a le olioli na fa'aalia e le faisalamo i lona lava olaga? Salamo 119:97.

“A o tatou talanoa e uiga i le fa'atuatua, e iai se eseese e tatau lava ona tatou manatua. E iai le tasi ituaiga talitonu e matuā eseese mamao lava mai le fa'atuatua. O le i ai o le Atua, ma Lona mana, ma upumoni o Lana afioga, o mea moni ia e lē māfa'afitia, e oo lava ia Satani ma ana 'au, e lē mafai ona latou fa'afitia mai o latou loto. Ua molimau mai le Tusi Paia e fa'apea, ‘Ua talitonu foi temoni ma latou tetemu;’ Iakopo 2:19, ae peita'i o le talitonu lea e pei ona ta'ua, e 'ese i lo le fa'atuatua moni. Afai e lē gata ina iai le talitonu i le afioga a le Atua, ae ua gaua'i atoatoa atu le loto ia te Ia; afai ua gaua'i atu le loto ia te Ia, o le alofa ua taula'i atu ia te Ia, ona i ai lea ma le fa'atuatua-o le fa'atuatua lea e matuā galue i le alofa ma fa'amamāina ai le agaga. O lenei fa'atuatua e fa'afouina ai le loto i le fa'atusa o le Atua.” -*Steps to Christ, p. 63.*

FESILI TOE FA'AMANATU

Aso Faraile, Aukuso 14

1. Fa'amatala mai le fa'amaoniga o le loto ua liua.
2. O le a le eseese i le va o le tagata tuai ma le tagata fou?
3. Fa'amatala mai ni lamatiaga se lua e tatau ona 'alofia i lo tatou olaga fa'aleagaga.
4. A ola i lalo o le alofa tunoa, o le a le tulaga o le usiusitai?
5. O a ni mafaufauga, manaoga, ma ni uunaiga e tatau ona fa'apelepele i ai pe a afio Keriso i totonu o le loto?

O Le Tupu A'e ia Keriso

Mau Tauloto: “E avatu le fiafia i ē o fa’anoanoa i Siona, e foa’iina atu ia i latou le matagofie e sui a’i le lefulefu, o le suāuu o le olioli e sui a’i le fa’anoanoa, o le ofu e fai a’i le viiga e sui a’i le loto fa’avaivai; e igoa i latou, O laau o le amiotonu, o le fa’atoaga a Ieova, e fai Mona viiga” (Isaia 61:3).

Faitauga Fautuaina: *Steps to Christ, chapter 8, pp. 67-75.*

“O lo tatou fa’alagolago ia Keriso ina ia tatou ola ai i se olaga paia, e fa’apei lava lea o le fa’alagolago o le la laau i le pogai ina ia tupu a’e ai ma fua tele mai.”
-*Steps to Christ p. 69.*

1. O LE KI POO LE AUALA I LE TUPUTUPU A'E

Ulua’i Aso, Aukuso 16

a. E fa’apefea ona fa’amatala mai e le Tusi Paia le tuputupu a’e fa’a-Kerisiano? Isaia 61:3; 1 Peteru 2:2; Efeso 4:14, 15; Mareko 4:26, 27.

“E lē mafai e le poto ma le atamai uma o le tagata ona fa’atupuina ai o le ola i sina mea aupito itiiti o i le lalolagi nei poo le natura. E gata i le ola na foa’iina mai e le Atua lava Ia ona mafai ona ola ai o la’au atoa ma manu. Ua fa’apea fo’i i le ola fa’aleagaga, ua na o le Atua e fanau mai ai o lea ola i loto o tagata.” - *Steps to Christ, p. 67.*

e. O le ā se mea ua fa’ailoa ai lo tatou fa’alagolago iā Keriso mo le tutupu a’e fa’aleagaga? Hosea 14:5-7; 1 Korinito 3:6, 7.

“O Lana meaalofa e lē māfa’atusalia o Lona Alo, ua si’omia ai e le Atua le lalolagi uma i se siomaga mamā o Lona alofa tunoa, e pei lava ona ufitia o le atulaulau i le ea. O i latou uma e manana’o e manavaina lenei siomaga mamā fa’alelagi, o le a foa’iina mai i ai lea ola, o le a ola ma tutupu a’e i latou se’ia oo ina avea ma tagata matutua, o alii ma tamaita’i ia Keriso Iesu.

“E pei ona fa’asaga atu o le fugālaau i le la ina ia maua mai ai le fesoasoani i ona ave susulu e fa’aatoatoaina ai lona matagofie, e fa’apea foi ona tatou liliu atu i le La o le Amiotonu, ina ia susulu mai ia i tatou le pupula ma le malamalama o le lagi, ina ia fausia a’e ai o tatou uiga ma amio i le fa’atusa o Keriso.” -*Ibid., p. 68.*

a. O le ā se manatu tāua na fa’amamafaina e lo tatou Alii i Ona soo a o le’i mae’a Lana galuega i le lalolagi? Ioane 15:4-7.

“E toatele ua latou manatu e mafai lava ona latou faia se vaega o le galuega o le fa’aolataga i lo latou lava malosi. Na latou fa’atuatua ia Keriso mo le fa’amagaloga o a latou agasala, a o lenei ua latou taumafai nei e saili la latou lava amiotonu e ola ai. Peita’i, o taumafaiga uma fa’apena e lē pine lava lona i’uvale. Na fetalai mai Iesu, ‘E lē mafaia e outou ona fai o se mea e tasi pe a A’u lē i ai.’ O lo tatou tutupu a’e i le alofa tunoa, o lo tatou olioli, ma lo tatou aogā—e fa’alagolago uma lava i lo tatou feso’ota’iga ma Keriso. O lo tatou feso’otai pea ma Ia i aso uma ma itula taitasi—o le a tutupu a’e ai i tatou i le alofa tunoa—e ala i lo tatou tumau ia te Ia. E lē gata o Ia o le Fa’apogai, ae o Ia fo’i o le Fa’aatoatoaga o lo tatou fa’atuatua. O Keriso o lē muamua, o Ia fo’i lē mulimuli i mea uma. E tatau ona fa’atasi mai o Ia ma i tatou, e lē gata i le amataga ma le i’uga o la tatou savaliga, ae fa’apea fo’i i laasaga taitasi uma lava o lo tatou ala.” -*Steps to Christ*, p. 69.

“Afai e te naunau e a’oa’o le agamalu ma le loto maulalo i le a’oga a Keriso, e mautinoa lava o le a Ia foa’iina atu ia te oe le malologa ma le filemu. O se tauiviga e matuā faigata tele lou tu’ua ma lafoa’ia o lou lava loto ma ou lava ala. Ae o lenei lesona ua tatou a’oa’oina, o le a e maua ai le malologa ma le filemu. E tatau ona manumaloina le fa’amauualuga, o le alofa fa’apito, ma le fiasili po o le naunau i tulaga; ma e ao lava ona gaua’i ma miti’ia atu o tatou loto i le finagalo o Keriso. Ona mafai ai lea ona avea le olaga atoa ma taulaga ofo faifai pea o le alofa, ma avea ai gaioiga uma, ma upu uma o se fa’aaliga o le alofa. E pei ona maua e le vine ma ona fuifui lona ola mai le pogai ma ona a’a, ma sosolo atu ai i ona lau ma vaega eseese, o le a fa’apena foi ona fa’amuina ma taumasuasua le alofa tunoa ma le alofa o Keriso i le loto, ma fa’apena ona oo atu ai o ia uiga lelei i vaega eseese uma o le olaga o le tagata, ma sosolo atu ai i galuega ma gaioiga uma o le tino ma le mafaufau.” -*The SDA Bible Commentary [E. G. White Comments]*, vol. 5, pp. 1091, 1092.

e. O le a le mealilo o le tuputupu a’e ia Keriso? Kolose 2:6; Eperu 10:38.

“Ua e tu’uina atu atoatoa oe mo le Atua, e auuina ma usiusitai ia te Ia, ma ua e taliaina fo’i Keriso e avea mōu Fa’aola. E lē mafai ona e saunia se togioala mo au agasala pe liua ma suia lou loto; ae ina ua e tu’uina atu oe i le Atua, ma ua e talitonu ai, o Ia na faia nei mea uma mo oe ona o Keriso. O le fa’atuatua na mua’i avea ai oe ma sē ua iā Keriso, mā o le fa’atuatua fo’i o le a e tupu a’e ai ia te Ia—e ala i le ofoina atu ma lou taliaina mai. E tatau lava ona e tu’uina atu o lou loto atoa—o lou mafaufau atoa, o lou malosi atoa, atoa ma lau auuina—ina ia tu’uina atu oe lava ia te Ia e usiusitai ai i Ana poloa’iga uma; ma e tatau fo’i ona e taliaina nei mea uma—o Keriso lea, o le atoatoaga o Ana fa’amanuiaga uma, ina ia afio tumau o Ia i lou loto, e fai o Ia mōu malosi, ma au amiotonu, ma ou fesoasoani e fa’avavau - e Na te tu’uina atu ia te oe le mana e te usiusitai ai.” -*Steps to Christ*, pp. 69, 70.

a. O le ā le tiute muamua lava a fanau o le Atua a o le'i amataina tiute o aso taitasi? Salamo 5:3.

“Ia e fa'apa'iaina oe mo le Atua i le taeao; ia avea lenā ma au galuega muamua lava. Ia fa'apenei lau tatalo, 'Ieova e, ia ofoina atu a'u atoa mo Oe. Ou te tu'uina atu a'u fuafuaga uma lava i Ou aao. Ia fa'aaogā a'u i le aso nei i Au fe'au. Ia ta nonofo fa'atasi ma Oe, ma ia ta galulue fa'atasi ma Oe i galuega uma ou te faia.' O se mea lea e tatau lava ona e faia i aso ta'itasi. O taeao ta'itasi uma, ia e fa'apa'iaina ai oe mo le Atua e tusa ma ou la'asaga mo lenā aso. Ia e tu'uina atu ia te Ia fuafuaga uma ua e mafaufauina, ina ia fa'ataunu'uina po o le lē fa'ataunu'uina foi e tusa ma Lona finagalo o le a fa'aailoa mai. A o fa'apea ona e tu'uina atu o lou ola i Ona aao i aso uma, e tauau ai ina o le a foliga atili ai lou olaga e fa'apei o le soifuaga o Keriso.” - *Steps to Christ*, p. 70.

e. O le ā le vala'aulia ua tu'uina mai e Keriso i aso ta'itasi? Mataio 11:28, 29.

“O se olaga ua iā Keriso, o se olaga o le to'afilemu lea. Atonu e lē o lagonaina se fiafiaga ua sili atu ona tele, ae peita'i, e tatau lava ona i ai se fa'atuatuaga mausalī ma le to'afilemu i le loto. O lou fa'amoemoe ua lē o toe ia te oe lea; ae peita'i o iā Keriso. Ua fa'afeso'ota'iina lou vaivai i Lona malosi, o lou valea i Lona poto, o ou vaivaiga i Lona malosi e tumau. O lea la, 'aua e te toe va'ava'ai ifo ai ia te oe lava, 'aua fo'i ne'i fa'apito ia te oe mafaufauga o lou loto, a ia e va'ava'ai atu pea ia Keriso. Ia e mafaufau atu i Lona alofa, ma Lona matagofie, ma Lana amio e atoatoa ona lelei. O Keriso i Lona fa'afitia o Ia lava, o Keriso i Lona fa'amaulaloina, o Keriso i Lona mamā ma Lona paia, o Keriso i Lona alofa e le māfa'atusalia - o mataupu autu ia e tatau lava ona fa'aautūina i ai mafaufauga loloto o le agaga. O lou alofa ia te Ia, ma faaa'oa'o ia te Ia, ma fa'alagolago atoatoa atu ia te Ia, o le a liua ai oe i Lona fa'atusa.” - *Ibid.*, pp. 70, 71.

i. O le a le ki i le mauaina o le filemu i le mafaufau? Isaia 26:3, 4; 30:15.

“O i latou e taliaina Keriso ma talitonu i Lana Upu, ma tu'uina atu i latou ma o latou ola mo Lana tausiga ma Lana ta'ita'iga, o le a latou maua le manuia ma le to'afilemu. E leai se mea o i le lalolagi lenei e mafai ona auamaia ai le fa'anoanoa ia i latou pe a oo ina fa'aolioliina i latou ia Iesu i Lona fa'atasi mai. O le taliaina atoatoa o Lona finagalo, e maua ai e i latou le malologa atoatoa.... Atonu e foliga mai o tatou olaga o ni olaga o le fenunia'i ma femoumoua'i; ae pe afai tatou te tu'uina atu i tatou lava i le Matai o le Tufuga Poto, o le a Ia aumaia ai le fa'atusa o Lona soifua ma Lana amio i o tatou olaga ina ia avea Mona viiga.

“A o tatou ulufale atu i le malologa e ala ia Iesu, ma o iina e amata ai ona tatou iloa ai le lagi i le olaga nei. Ma ua tatou tali atu ai i Lana vala'au, ua faapea mai, O mai ia, ia outou faaa'oa'o mai ia te A'u, ma o iina e amata ai le olaga e fa'avavau.” - *The Desire of Ages*, p. 331.

a. O le ā le i'uga o le tu'uina atu atoatoa o le mafaufau e mafaufau ai iā Iesu nai lo lou va'ava'ai ifo ia te oe lava? 2 Korinito 3:18.

“O le va'ava'ai atu pea ia Iesu i mata o le fa'atuatua, e fa'amalosia ai i tatou. O le a faia e le Atua fa'aaliga sili ona tāua i Ona tagata fia aai ma fia feinu. E iloa ai e i latou o Keriso o le Fa'aola moni lava. A o fafagaina i latou i Lana upu, latou te iloa ai, o le agaga ia, o le ola fo'i lea. E avea Lana Afioga ma mea e fa'alēaogaina ai le natura fa'aletagata, fa'alelalolagi, ma aumaia ai le ola fou e ala ia Keriso Iesu. E afio mai le Agaga Paia i le loto, o se Fesoasoani. E ala i Lona alofa tunoa e liua ai le tagata, ma toe foafoaina ai le fa'atusa o le Atua i totonu o lē ua avea ma soo; ma avea ai o ia ma tagata fou. O le a suitulaga le alofa i le inoino, ma maua ai e le loto le uiga fa'ale-Atua.” -*The Desire of Ages*, p. 391.

“A liliu atu le mafaufau o le tagata i le manatu fa'apito, o lona liliu ese mai fo'i lea iā Keriso, o le puna o le malosi ma le ola. O le mea lea e taumafai ai pea Satani e fa'aliliueseina le mafaufau o le tagata mai le Fa'aola, ma taofia ai le mafuta fa'atasi o le agaga ma Keriso. O fiafiaga o le lalolagi, o le atuatuvaile, o puapuaga ma fa'anoanoaga o le olaga nei, o sesē o isi, po o ou lava sesē ma lou lē atoatoa i soo se mea e tasi lava o ia mea uma, o le a taumafai Satani e fa'aliliueseina mai ai lou mafaufau. Ia 'aia lava ne'i faasesēina oe i ana togafiti. O le toatele o ē ua matuā loto fa'amaoni, ma mananao e fa'apa'iaina o latou ola mo le Atua, e masani ona ia taitaiina i latou na ina ia mafaufau pea i o latou lava sesē ma o latou vaivaiga, se'ia o'o lava ina vavae'eseina i latou mai ia Keriso, ma ia fa'amoemoe ai e na te maua le manumalo ia i latou. Aua lava ne'i avea lo tatou manatu ifo ia i tatou ma autu o ō tatou manatunatuga, ma tatou pa'u'u atu ai i le tulaga popole vale ma le mata'u pe fa'aolaina i tatou. O nei mea uma e liliueseina ai le agaga mai le Puna o lo tatou malosi. Ia e tu'uina atu le tausiga o lou agaga i le Atua, ma ia fa'alagolago atu ia te Ia. Talanoa ma mafaufau ia Iesu. Ia natia oe i totonu ia te Ia.” -*Steps to Christ*, pp. 71, 72.

e. O a mea e mafai ona tatou a'oa'oina mai le liuaga na oo i le au soo ina ua mavae ona latou fa'atasi ma Keriso i le galuega faamisionare i aso ta'itasi? Galuega 4:13.

“O lo tatou va'ava'ai atu pea ia [Iesu], ua 'liua ai i tatou ua foliga i ai nai le pupula e oo i le pupula, fa'apei ona mai le Alii le Agaga.’ 2 Korinito 3:18.

“O le mea lava lea na maua ai e uluai soo le fa'atusa o le Fa'aola pele i o latou olaga. Ina ua fa'alogu atu na soo i fetalaiga a Iesu, o iina na latou lagonaina ai lo latou manaomia o Ia. Sa latou saili ia te Ia, na latou maua, sa latou mulimuli atu ia te Ia. Sa latou fa'atasi ma Ia i le fale, i le la'o'ai, i le afeafe, i le fanua. Sa latou fa'atasi ma Ia e pei o ni tamaiti a'oga ma lo latou faia'oga, ma latou maua mai ai pea i aso taitasi a'oa'oga ma lesona o upumoni paia mai i Ona laufofoga. Sa latou vaavaai atu ia te Ia, e pei o ni auauna i lo latou matai, ma a'oa'o ai i latou i o latou tiute. O na soo, 'o tagata e tusa ma i tatou' Iakopo 5:17. Sa latou tau foi lea lava tauā ma le agasala. Sa fia maua fo'i e i latou lenei lava alofa tunoa e tasi, ina ia mafai ona latou ola ai i se olaga fa'apa'iaina.” - *Ibid.*, pp. 72, 73.

a. O le ā le folafolaga matagofie ua tuua e Iesu mo Ona soo o loo fetaia'i ma luitau o se lalolagi tetee ma fouvale? Mataio 28:20.

“Ina ua afio a’e Keriso i le lagi, sa i ai pea le lagonaina o Lona fa’atasi mai e Ona soo. Sa latou maua pea se mafutaga moni ma Ia, o se mafutaga lava sa fa’atumuina i le alofa ma le malamalama. O Iesu o le Fa’aola, o lē sa savavali ma talanoa ma tatalo fa’atasi ma i latou, o lē sa fetalai atu i o latou loto i upu o le fa’amoemoe ma le fa’amafanafanaga, na aveina a’e o Ia nai iā te i latou i le lagi a o i ai pea le feau o le filemu i Ona laufofoga, ma na toe fa’alogoina pea Lona siufofoga o fetalai mai ia i latou, a o fa’apena ona talia o Ia e le ‘au agelu ua tino e pei o se ao-‘Fa’auta fo’i, Ou te iā outou i aso uma lava, e oo lava i le gataaga o le lalolagi.’ Mataio 28:20.” -*Steps to Christ*, pp. 73, 74.

e. O le a se fa’atonuga tāua na tuua e Iesu i Ona soo ina ia latou iloa ai le mea e fai i le taimi e manaomia ai? Ioane 16:23, 24; 14:16-18.

“A o latou potopoto fa’atasi ina ua mavae o Lona afio a’e, sa latou naunau e tu’uina atu o latou mana’o i le Tamā i le suafa o Iesu.... Sa atili maualuga pea ona latou aapa atu i lima o le fa’atuatua, a o latou finau atu pea i lenei finauga malosi, ‘O Keriso o lē na maliu, ua toe tu mai foi o Ia, o loo i le itu taumatau o le Atua, o loo fautua foi o Ia mo i tatou.’ Roma 8:34. Ma o le Aso Penetekoso na latou maua ai o lea Fesoasoani, o lē na fetalai mai ai Keriso, ‘e tumau pea o ia ia te outou, e i ai fo’i o Ia i totonu ia te outou.’ Ma na toe fetalai mai fo’i o Ia, ‘E aogā fo’i ia te outou pe a A’u alu ese; auā afai Ou te lē alu ese, e lē maliu mai le Fesoasoani ia te outou; a e afai Ou te alu, Ou te auina mai o ia ia te outou.’ Ioane 14:17; 16:7. Talu mai lenā taimi, o le a afio tumau pea lava Keriso i loto o Lana fanau e Lona Agaga. Na sili atu le vavalalata o lo latou fa’atasiga ma Ia i lo aso na latou fa’atasi ai ma Ia i le tino. Na susulu atu e ala ia i latou le malamalama, ma le alofa, ma le mana o le Keriso o lē o loo afio i totonu ia i latou, a o molimauina e tagata ma ‘ua latou ofo ai; ua latou iloa foi o i latou, sa latou fa’atasi ma Iesu.’ Galuega 4:13.” - *Ibid.*, pp. 74, 75.

FESILI TOE FA’AMANATU

Aso Faraile, Aukuso 21

1. Afai o loo tatou ola e pei o laau, aisea tatou te manaomia ai le fesoasoani mai le lagi?
2. E pei ona manaomia e laau le timuga ina ia ola ai, o le a se mea tatou te manaomia ina ia ola ai i le Agaga?
3. O le a le mea e taua ai le fa’apaiaina i aso taitasi ia i tatou uma taitoatasi?
4. Aisea e finagalo ai le Atua ia tatou tuu ese lo tatou manatu ifo iai tatou lava, a ia mafaufau ia Iesu i taimi uma?
5. O le a le folafolaga e tataua ona avea ma mea moni i aso taitasi i le olaga o tagata talitonu uma?

O le Galuega i le Olaga Nei

Matua Tauloto: “A o i latou uma o e na talia o Ia, ma fa’atuatua i Lona Suafa, na Ia avatu i ai o lea manuia, ia avea i latou ma fanau a le Atua” (Ioane 1:12).

Faitauga Fautuaina: *Steps to Christ, chapter 9, pp. 77-83.*

“O le finagalo alofa o Keriso na Ia ofoina mai ai o Ia e fai ma taulaga, o le finagalo lava fo’i lea o lo o ufitia ai le lagi atoa uma, ma o le mafua’aga autu lava lea o Lona fiafia. O le agaga foi lea o le a i ai i soo o Keriso, o le galuega foi lea e ao ona latou faia.” -*Steps to Christ, p. 77.*

1. O LE OLA MA LE MALAMALAMA

Ulua’i Aso, Aukuso 23

a. O le a le mea e masani ona lē amanaiaina e le loto fa’anatura-ma o le a lona i’uga? Ioane 1:4, 5.

“O le Atua o le puna o le ola ma le malamalama ma le olioli i le aoao o mea uma. E pei o ave o le malamalama mai le la, e pei o magāvai mai le punāvai, ua fa’apea fo’i ona tafe mai o fa’amanuiaga mai ia te Ia i Ana mea uma na faia o le foafoaga. I lē ua fa’apea lava i latou o lo o i ai le ola mai le Atua i o latou loto, e tafe atu mai ia i latou i isi le alofa ma fa’amanuiaga.” -*Steps to Christ, p. 77.*

e. A fa’apelepeleina loa le alofa o Keriso i le loto, o le a se mea o le a va’aia i le olaga? 2 Korinito 2:14, 15; 5:14.

“A nofomau le alofa o Keriso i le loto, e pei o le nanamu o le manogi ua puaina atu e lē mafai ona natia. O lona aafiaga paia o le a lagonaina e i latou uma tatou te feso’otai atu i ai. O le agaga o Keriso pe a pulea ai le loto, e pei o se punavai i le toafa i le nuu naumati, e tafe atu ma fa’afouina ai isi, ma fa’aosofia ai le naunau o i latou o ē a fano i le fia feinu i le vai o le ola.” -*Ibid., p. 77.*

“Ia iloa e le lalolagi tatou te lē o fa’apito mo i tatou i o tatou lava manaoga, ae peita’i o loo tatou naunau ina ia fa’asoa atu i isi fa’amanuiaga ma avanoa ua tatou maua. Ia latou iloa ai, e lē o avea la tatou tapuaiga ma tapuaiga fa’aailoga tagata ma lē alolofa. A ia auauna atu i latou uma o ē ua tautino mai ua latou maua Keriso, e pei ona Ia faia le galuega o le auauna atu mo le manuia o tagata.” -*The Desire of Ages, p. 152.*

a. Pe afai ua tatou talia Iesu e avea ma o tatou Fa'aola, o le ā le mana'oga e tatau ona fa'amalieina? Ioane 1:12, 13; 1 Korinito 1:4, 5; Roma 5:1, 2.

“O i latou o ē ua tofusia i le alofa tunoa o Keriso, o le a latou nofo sauni e faia so'o se taulaga ofo lava, ina ia mafai ai e isi na maliu ai Keriso ona latou maua le mea foa'i fua fa'alelagi. O le a latou faia mea uma latou te mafaia ina ia fa'aleleia atili ai le lalolagi i lo latou nonofo ai. O se agaga fa'apenei, o le fua mautinoa lava lea e tupu a'e i se loto ua moni lava ona liuaga. O le taimi lava e sau ai le tagata ia Keriso, e fanau mai loa i lona loto se naunauta'iga e fia fa'ailoa atu i isi le tāua o se uō ua na maua ia Iesu; ma e lē mafai ona punitia mai lona loto upu moni e mafai ona fa'aolaina ma fa'apa'iaina ai. Pe afai ua oofu i tatou i le amiotonu a Keriso, ma ua fa'atumuina o tatou loto i le oliolii i Lona Agaga o lo'o afio i totonu ia i tatou, o le a lē mafai lava ona tatou fa'alologo pe gugu. Pe afai ua tatou tofotofoina ma ua tatou iloa ai e lelei Ieova, o le a i ai sa tatou molimau e tatau lava ona talatala atu i isi. E pei o Filipo ina ua ia maua le Fa'aola, o le a fa'apea foi ona tatou vala'uina isi e o mai ia te Ia.” -*Steps to Christ*, p. 78.

e. Pe afai tatou te fetaia'i ma fa'afitauli ma faigata, o le a se mea ua fautua mai ai le aposetolo o Paulo? Eperu 4:16.

“E silafia e Iesu manaoga o Lana fanau, ma e fiafia fo'i o Ia e fa'afofoga i a latou tatalo. Ia vavae ese mai fanau mai mea uma lava e feso'otai atu i le lalolagi ma mea uma e tosina ese mai ai mafaufau mai le Atua, ma ia latou lagonaina, ia tau lava o le Atua ma i latou, auā o loo sisila mai Ona fofoga i totonu o le loto, ma faitauina manaoga o le agaga, ma ia mafai ona latou talanoa atu ai i le Atua.”
-*Sons and Daughters of God*, p. 121.

i. A avea loa i tatou ma fanau a le Atua, o le a se mea tatou te iloa o loo tatou nofo aitalafu ai i isi? Roma 1:14, 15.

“O le ā se lagona na fai ai Paulo ma tagata nofo aitalafu ia Iutaia ma Eleni? Na tuuina atu ia te ia se tofiga, e pei fo'i ona tuuina atu i soo uma o Keriso, 'Ia outou o atu e fai nuu uma lava ma soo, ma papatiso atu ia te i latou i le suafa o le Tamā, ma le Alo, ma le Agaga Paia; ma ia outou a'oa'o atu ia te i latou ia tausii i mea uma ua ou fai atu ai ia te outou; fa'auta foi, ou te iā te outou i aso uma lava, e oo lava i le gataaga o le lalolagi.' O lona taliaina ai o Keriso, na fa'apea fo'i ona taliaina ai e Paulo lenei tofiga. Na ia iloa ua i luga nei ia te ia se galuega e ao ona faia i ituaiga uma o tagata, e lē gata mo tagata Iutaia ae fa'apea fo'i i Nuū Ese, o tagata a'oa'oina ma tagata e le'i a'oa'oina, o i latou o loo i tulaga maualuluga ma i latou o loo i ai i se tulaga sili ona maualalo o le olaga.” -*The SDA Bible Commentary [E. G. White Comments]*, vol. 6, p. 1067.

a. Pe afai o loo i o tatou loto le Agaga Paia, o le a se tasi o a tatou gaiioiga muamua lava e tatau ona faia? Ioane 1:41, 42.

“O le a tatou saili e fa’ailoa atu i [isi] le matagofie o Keriso ma tosina mai ai i mea moni e lē o va’aia o le lalolagi a sau. O le a i ai se naunauta’iga malosi e mulimuli ai i ala na savalia e Iesu. O le a i ai se naunautaiga loloto fa’amaoni ina ia mafai e i latou o siomia i tatou ona latou va’ava’ai atu i le ‘Tamai Mamoe a le Atua, o Lē na te aveesea le agasala a le lalolagi.’ Ioane 1:29.

“Ma i lo tatou taumafai ai ina ia fa’amanuiaina isi, o le a toe foi mai ma avea ma fa’amanuiaga mo i tatou lava. O le fuafuaga lea a le Atua i Lona tuuina mai ia i tatou o se vaega o le feau tatou te galulue ai i le fuafuaga o le fa’aolataga. Ua Ia tuuina mai i tagata le avanoa ina ia avea ai ma ē ua tofisia fa’atasi i le amio Atua, a o i latou fo’i, ia latou fa’asalalauina atu le manuia i o latou uso a tagata. O le mamalu aupito maualuga lea, o le fiafiaga aupito i sili lea ua foa’iina mai e le Atua i tagata. O i latou ua fa’apea ona avea ma ē e galulue fa’atasi i galuega o le alofa, o le a aumaia fa’alatalata atili atu i Lē na faia i latou.

“Semanū e tu’uina atu e le Atua le feau o le talalelei, ma galuega uma o le auaunaga alofa i agelu latou te faia. Semanu e mafai ona Ia fa’aaogaina isi auala mo le fa’ataunuuina o Lana fuafuaga. Ae peita’i, o Lona alofa lē faituāoia, na Ia filifili ai ia avea i tatou ma mea faigaluega e galulue fa’atasi ma Ia, fa’atasi ma Keriso ma agelu, ina ia mafai ona tatou tufaina atu le manuia, le olioli, ma le siitia a’e o lo tatou tulaga fa’aleagaga, lea e mafua mai i le faia o lenei auaunaga e aunoa ma le alofa fa’apito.

O lo tatou ‘au fa’atasi ma Keriso i Ona tigā, e aumaia ai i tatou i se feso’ota’iga ola ma Ia. O galuega taulaga ofo uma e faia mo le lelei o isi, e fa’amalosia ai le agaga o le agalelei lima foa’i i le loto, ma latalata atili atu ai o ia i le Fa’aola o le lalolagi, o Lē ‘sa tamaoia ia, a ua fa’amativaina ona o outou... ina ia fa’atamaoia outou i Lona mativa.’ 2 Korinito 8:9. Ma e na o le fa’ataunuuina lava o le finagalo paia fa’alelagi na ala ai ona faia i tatou, ina ia mafai ai ona avea ma fa’amanuiaga mo i tatou.” -*Steps to Christ*, pp. 78-80.

e. O le a le fa’ataitaiga na faia e Keriso e tatau ona taitaia atu ai i tatou i a tatou feso’ota’iga uma ma aiga ma ē tuaoi? Kalatia 6:9, 10; Ioane 9:4.

“Afai e te alu atu ma e galue e pei ona fuafuaina e Keriso ina ia faia e Ona soo, ma manumaloina mai agaga mo Ia, o le a e lagonaina le mana’omia o se aafiaga loloto ma se malamalama sili atu i mea paia tau i le Atua, ma o le a e lagonaina lou fia ‘ai ma fia inu i le amiotonu. O le a e aioi atu i le Atua, ma o le a fa’amalosia atili lou fa’atuatua, ma o le a fa’ainumia lou agaga i punavai loloto mai le vaieli o le fa’aolataga. O lou fetai’i ai ma le fa’atuiese mai o nisi, atoa ai ma tofotofoga, o le a uuna’ia atili atu ai oe i le Tusi Paia ma le tatalo. O le a e tupu a’e i le alofa tunoa ma le poto uma ia Keriso, ma o le a e fausiaina a’e se aafiaga sili ona tamaoia.” -*Ibid.*, p. 80.

a. Ta'u mai se tasi o lamatiaga tele lava i le avea ai o i tatou ma tagata o le ekalesia i ona po nei. Malaki 3:8-10.

“O se lamatiaga sili ona taatele i [tagata Tausi Sapati o le Toe Afio Mai] i le taimi lenei, o loo i ai lea i a latou fa'aputuga oloa. O nisi ua fa'ateleina pea lo latou popole; ma ua latou soona galulue ai i galuega mamafa. O lona i'uga, ua toetoe lava galo atoatoa ia i latou le Atua ma mana'oga o Lana galuega; ma oo mai ai le oti fa'aleagaga ia i latou. E mana'omia ona latou faia se taulaga ofo i le Atua, peisea'i o se taulaga fa'afetai... O le tele o le tamaoiga i totonu o o tatou tagata, ua avea na mea ma mala ia i latou o loo pipii pea i ai.” - *Testimonies for the Church, vol. 1, p. 492.*

e. O a uiga lelei fa'a-Kerisiano e fesoasoani i le au faatuatua i lo latou tuputupu a'e i le alofa tunoa ma le poto i le Ali'i o Iesu Keriso? 1 Peteru 4:8-10; Eperu 13:2.

“O le avanoa lea na tuuina mai ia Aperamo ma Lota, e lē o taofia mai ia i tatou. O le fa'aalia o le uiga talimalo i fanau a le Atua, e mafai ona tatou talia ai o Ana agelu i o tatou afeafe. E oo mai lava i aso nei o loo tatou ola ai, e ulufale atu agelu i aiga o tagata i foliga fa'aletagata ma latou talia ai ma le fiafia. Ma o Kerisiano o ē ola i le malamalama o fofoga o le Atua, e masani ona fa'atasi ma agelu e lē o va'aia, ma o nei tagata paia latou te tuua i latou nei ma se fa'amanuiaga i o latou aiga.” - *Ibid., vol. 6, p. 342.*

i. O le a le manaoga e tatau ona fa'ataunuaina e tagata talitonu uma i ona po nei? 2 Korinito 10:16.

“E mafai lava e tagata uma o a tatou ekalesia ona faia o lea galuega e pei lava e le'i amata ona galulue ai. E lē tatau ona auina atu se tasi i nofoaga fou ona o ni manuia fa'aletino; ae afai e iai se avanoa e maua ai se galuega e tausi ai le aiga, ia alu atu la i aiga ua mausalī i le upu moni, e tasi pe lua aiga i se nofoaga, e galulue ai o ni misionare. E tatau ona latou lagonaina le alofa mo nei agaga, o se tasi lea o avega o le galuega mo i latou, ma ia avea ma ā latou su'esu'ega pe fa'aapefea ona aumaia i latou i le upu moni. E mafai ona latou tufatufa atu a tatou lomiga, faia mafutaga fa'aleagaga i o latou aiga, ma fa'amasani i o latou tuaoi, ma vala'aulia i latou e o mai i nei fa'atasiga. O lea le auala e mafai ai ona latou fa'asusulu atu lo latou malamalama e ala i a latou galuega lelei.” - *Ibid., vol. 8, p. 245.*

“Ua leva ona fa'atali le Atua mo le agaga lea o le auauna atu ina ia maua ma pulea ai a tatou ekalesia uma, ina ia galulue tagata uma mo Ia e tusa ai ma le mea latou te mafaia. Pe afai e faia e tagata o le ekalesia a le Atua a latou galuega na vala'auina ai i latou i nofoaga mativa ma le lē tagolima i laufanua e mamao ma lata mai, i le fa'ataunu'uina lea o le poloa'iga o le talalelei, o le a vave ona lapata'ia le lalolagi atoa ma o le a toe afio mai loa le Ali'i o Iesu i lenei lalolagi ma le mana ma le mamalu tele.” - *The Acts of Apostles, p. 111.*

a. O le a le mea o fa'atalitali mai ia i latou uma ua tofia i le galuega o le Talalelei-aemaise lava i le afaigaluega? 1Korinito 4:1, 2; Fa'aaliga 2:10.

“O le avanoa lea i ē ua tofia ma leoleo i luga o pā o Siona, ina ia latou fa'alatalata atu ai i le Atua, ma ia matuā faigofie ona latou talia musumusuga a Lona Agaga, ina ia mafai ai ona galue mai le Atua e ala ia i latou e ta'u atu i tagata agasala lo latou lamatiaga, ma fa'asino atu i latou i le nofoaga e saogalemu ai. Ua filifilia e le Atua, o le mea ua fa'amaufa'ailogaina i le toto o le fa'apa'iaina, ina ia avea i latou ma fa'aola i alii ma tamaitai mai le fa'aumatiaga o lo'o mulimuli mai. E tatau ona latou lapata'ia o latou uso a tagata i le i'uga ma'utinoa o le agasala, ma ia latou puipuia ma le fa'amaoni le manuia o le ekalesia.” -*Gospel Workers*, p. 15.

e. O le a le faaa'oa'oga na faia e Tanielu e mo tupulaga talavou i ona po nei? Tanielu 1:8, 15.

“E finagalo le Alii ia tatou a'oa'oina le lesona lava lea e tasi mai le olaga o Tanielu. E to'atele e ono avea ma tagata malolosi pe afai e avea i latou e pei o nei talavou fa'amaoni o Eperu, na latou fa'atuatua i le Atua ma fa'amoemoe i Lona alofa tunoa e manumalo ai, ma le malosi ma le potu i a latou galuega. Na fa'aalia e Tanielu le fa'aaloalo sili ona atoatoa, e lē gata i ona toeaiina o ē matutua ae fa'apea fo'i i tupulaga talavou. Na ia tula'i o se molimau mo le Atua, ma taumafai e ola i se olaga mausalī ina ia lē fa'alumaina le lagi ona o ni upu na te tautalagia po o se gaioiga na te faia. Ina ua poloaina Tanielu ina ia 'ai i mea taumafa taugata i le laulau a le tupu, na le'i oso a'e se lagona ia te ia na te 'ai pe inu i mea taumafa a le tupu e pei ona mana'o i ai le tupu. Na faia la latou filifiliga e aunoa ma se upu e fa'aailoa atu so latou tete'e, ae peita'i na latou tu'uina atu lenei mea i le Atua. Na ia saili atu fa'atasi ma ana uo i le potu mai le Atua, ma ina ua uma ona latou tu'uina atu a latou tatalo fa'amaoni i le Atua, na faia ai loa latou filifiliga. Ma o le lototele fa'amoni ma le uiga agamalu fa'a-Kerisiano, na tuuina atu ai e Tanielu le mataupu i le tagata e pule i le laulau a le tupu na va'aia i latou, ma fai atu i lē pule ina ia tau lava o meaai faigofie mo latou. O nei talavou na latou lagonaina le lamatia o i latou i lo latou talitonuga fa'alelotu, ma na latou fa'atuatua ma le fa'amaoni i le Atua, o Lē na latou alolofa i ai ma auauna i ai.” -*Testimonies to Ministers*, p. 263.

1. O le ā le tulaga o le lalolagi na mana'omia e le Atua ona fa'asusulu i ai o le malamalama?
2. O le ā le suiga ofoofogia o le a va'aia i le olaga o ē talitonu?
3. A maua se fa'amanuiaga, o le ā se mea e tatau ona tali atu ai?
4. Fa'amatala mai ni auala e mafai ai e i tatou ta'ito'atasi ona auauna atu i isi.
5. E fa'apefea ona avea le fa'amaoni o Tanielu e avea ma fa'amalosiga ia te a'u?

Taulaga Sapati Muamua

Sapati Setema 5, 2026



A'oga Tusi Paia Fa'amisionare i Filipino

A o faamanatu mai ia i tatou lenei poloaiga tele ina ia tatou ō atu i le lalolagi uma e fai nuu uma ma soo, e tatau ai ona tatou faia o se galuega mo lenei fuafuaga. O le A'oga Fa'ale-Tusi Paia Fa'amisionare, o se fa'alapotopotoga ua tuuina atu faapitoa mo le saunia ma le faa'aupegaina o tagata faigaluega mo le tovine a le Alii. Talu mai lona faavaeina ia Fepuari 1984, o lenei A'oga ua avea ma sulu o le faatuatua, e fausia a'e ai loto ma mafaufau o i latou e naunau mo le faasalalauina atu o le talalelei i atunuu uma o le lalolagi. O le toatele o tamaiti a'oga o lenei A'oga ua mae'a a latou a'oga faamisionare mo le lua tausaga na ofoina mai e lenei faalapotopotoga, ma ua avea nei ma misionare i isi vaega o le lalolagi, ma o le toatele o i latou ua avea ma taitai poo faifeau foi o loo faasalalauina atu le fe'au o le faaolataga i nofoaga ma motu tetele o Filipino poo Filipaina.

O le A'oga Tusi Paia Fa'amisionare o loo i Cabatang, Tiaong, Itumalo o Quezon, ma Filipaina, ua galueaina malosi e tuuina atu se faavae mautu fa'ale-Tusi Paia mo i latou ua sauni e avea ma misionare i Filipaina ma le atu Pasefika atoa. O lenei nofoaga ua saunia mo tamaiti a'oga e nonofo ai, a'oa'oina ai le Igilisi ma a'oa'oina ia avea ma misionare, tagata faatau tusi, tagata faigaluega faale-soifua maloloina ma pulega e matua manaomia lava i lenei atunuu ma fafo atu. Ua avea fo'i ma nofoaga e mafai ona faia ai seminā faale-a'oa'oga, fonotaga a tupulaga talavou, ma koneferenisi.

A o tuputupu a'e le galuega o le toe fuata'iga i Filipaina atoa, ua matuā manaomia ai lava le faalateleina ma le faaleleia atili o lenei nofoaga ina ia mafai ai ona fa'aauau pea ona tali atu i manaoga o le galuega a le Atua i le lumana'i. I le vaavaai atu ai mo lenei manaoga, ua faia ai se fuafuaga ina ia mafai fo'i ona faia ai ni Fonotaga tetele a le Koneferenisi Aoa o lenei lava nofoaga. O le a avea o se faamanuiaga tele lenei nofoaga e talimalō ai i usugāfono a le au faatuatua poo tagata talitonu, lea o le a avea ma taula'iga o fa'aaliga mo tala'iga faapea ma ni toe faafouga faaleagaga!

O lau Taulaga ofo mo le A'oga Sapati, Sapati Muamua i le asō, o le a avea ma meafaigaluega taua i le fausiaina o lenei nofoaga mo le faalateleina e pei ona manaomia. A o faapea ona tatou foa'i atu, ia tatou manatua le faamatalaga o loo i le 2 Korinito 9:7, "Ia taitoatasi ma foa'i e pei ona filifili i lona loto; aua ma le tigā, aua fo'i ma le faatauānuaina; auā e alofa le Atua i lē ua foa'i ma le loto malie."

Tau ina ia fa'amanuiaina e a outou meaalofa ofo lenei A'oga, ma ia saga faamalosia galuega faamisionare, ma aumaia ai tagata faigaluega ua sauni e folafola atu le talalelei e faavavau. Tau ina ia tatou foa'i atu ma le faatuatua ma le loto fialia, ma ia mautinoa lenei mea, o la tatou foai, o le a fua mai ai ni fua e faavavau mo le malo o le Atua.

Momoli atu ai lo matou agaga fa'afetai tele mo lo outou alofa, ma ia saga fa'amanuia tele atu le Ali'i ia te outou uma a'o faapea ona outou faia lenei alofa lima foa'i!

O ou uso ma tuafafine i Filipaina

O le Iloaina o le Atua

Mau Tauloto: “O lē ua poto na te tausia nei mea; e iloa e i latou o mea alofa a Ieova” (Salamo 107:43).

Faitauga Fautuaina: *Steps to Christ, chapter 10, pp. 85-91.*

“O le iloaina o le Atua, e maua mai ai le puna uma o le poto moni ma le tuputupu a’e.” -*Education, p. 14.*

1. UA FA’AALIA E LE ATUA IA LAVA

Ulua’i Aso Aokuso 30

a. O a mea o i le lalolagi nei o lo’o fa’aaogā e le Alii e tosina mai ai tagata ia te Ia? Salamo 19:1-6; Faataoto 2:1-5.

“E tele auala o loo saili ai le Atua e fa’aailoa mai ai o Ia ia i tatou ma aumaia ai i tatou ia tosina atu i se mafutaga paia ma Ia. O lo o lē mapu ona gagana mai i o tatou mafaufau mea uma o lo o tumu ai le lalolagi. O le a matuā ootia lava le loto o loo manatunatu i nei mea pe a va’ava’ai atu i le alofa ma le mamalu o le Atua ua fa’aalia mai i galuega a Ona aao. O le a malamalama lelei fo’i taliga o loo fa’alogologo lelei i fesootaiga ma le Atua e ala mai i mea ofoofogia o le natura. O le laususiusi mai o laufanua, o laau mafalā, o le fuga mai o laau ma fugālaau, o le fa’amalumalu ifo o ao o le lagi, o le totō ifo o timuga, o le fetafea’i o vaitafe, o le pupula mai o le lagi, o mea uma ia o loo fa’amatala mai i o tatou loto, ma valaau mai ia i tatou ina ia tatou fa’amasani atu ia te Ia o Lē na faia i latou uma.” -*Steps to Christ, p. 85.*

e. O le a se mea na fa’aaoga e Iesu e fa’amautu ai le upumoni i mafaufau o ē na fa’alogologo ia te Ia? Mataio 13:3, 34.

“Na tu’ufa’atasia e lo tatou Fa’aola Ana lesona tāua uma i mea o le natura. O la’au, o manu felelei, o fugāla’au i vanu, o mauga iti, o vaituloto, ma le matagofie o le lagi, fa’apea fo’i ma mea tutupu ma mea o lo’o siomia ai le olaga i aso faisoo, na feso’ota’i uma atu nei mea ma upu moni na fa’amatalaina, ina ia mafai ona fa’amanatuina mai ai pea i le loto Ana a’oa’oga, e o’o lava i le lotolotoi o popolega o le olaga pisi o le tagata.

“E finagalo le Atua ina ia talisapaia e Lana fanau Ana galuega ma latou fiafia ai i le faigofie ma le filemu matagofie ua Ia teuteuina ma fa’aofuina ai lo tatou aiga fa’a-lalo-nei.” -*Ibid, p. 85.*

a. O le ā se lesona e mafai ona a’oa’oina mai le natura o le foafoaga—mo se fa’ata’ita’iga o fugālaau, o manu felelei, ma fetu? Roma 1:20; Galuega 14:17.

“O suesuega a tusitala o le natura... e mana’omia ai ona tatou maua ai o le iloa e uiga i lē na Foafoaina mea. O tusitala moni uma lava ua na o ni fa’amatala upu lea o le tusilima a le Atua o i le lalolagi. O le tusitala e na te aumaia mai ana suesuega ni faamaoniga fou o le potu uiga ese o le Atua ma Lona mana. Pe afai e malamalama lelei i ai, o le tusi o le natura ma ana afioga tusia ua aumaia ina ia faamasani ai i tatou i le Atua e ala i le aoaoina o i tatou i ana tulafono o le potu ma Lona alofa mutimutivale.” - *Patriarchs and Prophets*, p. 599.

“Pe ana fai se’i tau lava ina tatou faalogo, semanū o le a aoaoina i tatou i lesona taua o le usiusitai ma le faatuatua. E mai lava i fetu o le lagi o lo’o latou faimalaga i o latou ala o i le vanimonimo ma mulimuli mai i lea tupulaga i lea tupulaga e pei ona fa’atonuina ai i latou, se’ia o’o atu lava i se mea aupito itiiti o le foafoaga, ina ia usiusitai mea uma o le foafoaga i le finagalo o Lē na Foafoaina i latou. Auā e tausia e le Atua mea uma ma fa’amalilie le mana’o o mea uma na Ia foafoaina.” - *Steps to Christ*, pp. 85, 86.

e. Pe afai tatou te mafaufau loloto i le matagofie ma le filemu o le natura e le’i fa’aleagaina, o le a se mea e tatau ona tatou manatua e uiga i le lalolagi fou ua folafolaina mai? 1 Korinito 2:9; Fa’aaliga 21:1.

“Se’i e fa’aata ane lava i lou mafaufau foliga o le aiga ua saunia mo le ’au paia, ma e mafaufau ai, o le a sili atu lona matagofie i lo le matagofie uma e mafai ona e manatu i ai. E tusa ai ma meaalofa eseese a le Atua e pei ona tatou va’aia i mea o le natura, ua na’o se ata fa’anefu lava lea o Lona matagofie tele.” - *Ibid.*, pp. 86, 87,

“Ua tu’uina atu i le ekalesia a le Atua ni fa’aaliga o le fuafuaga e fa’avavau a Ieova. Ua fa’atagaina Ona tagata e va’ava’ai i tua atu o tofotofoga o le taimi lenei i manumalo o i le lumana’i pe a uma ona tauina a latou tauā, o le a ulufale atu ē ua togiolaina i le laueleele folafolaina. O nei va’aiga o le fa’amamaluina o i le lumana’i, o va’aiga na o lo’o tusia e le aao o le Atua, e tatau ona aveva ma mea e pele i Lana ekalesia i aso nei.” - *Prophets and Kings*, p. 722.

“Ua faaigoa e le Tusi Paia le tofi o le ’au fa’aolaina o se ‘nuu.’ Eperu 11:14-16. O iina o le a taitaiina ai e le Leoleo Mamoe fa’alelagi Lana lafu mamoe i punavai o le vai ola. E fua mai fo’i e le laau o le ola ona fua i masina taitasi, a o ona lau e malōlō ai nuu uma. E i ai fo’i vaitafe e tafe pea e lē malolo e manino e pei o le maa tioata, o autafa o ia vaitafe o i ai laau o lo’o lafo atu o latou paolo i luga o ala ua saunia mo ē ua togiolaina e Ieova. O iina o lo’o i ai fanua laugatasi lafulemu e o’o atu i mauga matagofie, se’ia o’o atu lava i mauga matagofie o le Atua i o latou tumutumu maualuluga. O na fanua laugatasi lafulemu, ma tafatafa o na vaitafe matagofie o lenei nuu, o le a fai ma aiga e faavavau o le fanau a le Atua, o ē ua leva ona taasē ma maumausolo i lenei lalolagi.” - *The Great Controversy*, p. 675.

a. O a ni lesona tāua e mafai ona tatou aoaoina mai i perofeta e fa'amalosia ai i tatou i taimi o le faavaivai ma faaososoga? Iakopo 5:17; Roma 8:28; 1 Ioane 5:14.

“I lo tatou tulaga ma mea o siomia ai i tatou, i suiga o lo’o tutupu i aso ta’itasi o lo’o siomia ai i tatou, e mafai ona tatou molimauina mai ai ni lesona tāua lava pe afai e tatala atu i ai o tatou loto ina ia tatou malamalama ai. [O le ’au pateriaka ma perofeta] o tagata fo’i ‘e tusa ma i tatou.’ Iakopo 5:17. Ua tatou vaai i le auala na latou tauivi ai ma mea faafatiātamai e pei fo’i o i tatou, ma le auala na latou pa’uū ai i faaososoga e pei fo’i ona tatou pa’uū ai, ae na toe fa’amalosia i latou ma latou maua le manumalo e ala i le alofa tunoa o le Atua; i le ma lea, ua fa’amalosia ai foi i tatou i lo tatou sailia o le amiotonu.” -*Steps to Christ*, pp. 87, 88.

e. Afai e tausia e le Atua mea o le natura, e le sili atu ea Lana tausiga mo Lana fanau? Salamo 107:43; 145:15, 16.

“O galuega a Ona aao ma fa’aaliga a Lona mana, ua molimau fa’atasi nei mea uma i le alofa o le Atua. O lo tatou Tamā o i le lagi, o Ia o le puna o le ola, ma le poto, ma le olioli. Se’i o tatou vaavaai atu foi lea i mea ofoofogia ma le matagofie o le natura. Se’i o tatou mafaufau fo’i lea i le auala ofoofogia ua fuafuaina mo manaoga e le gata o tagata, ae faapea foi i meaola uma ina ia maua mai ai lo latou fiasia. O le susulu o le la ma le timu, o lo’o fa’afiafiaina ma fa’alafulemuina ai le laueleele, o mauga ma le sami ma fanua laugatasi, o mea uma ia o loo talatalaina mai ia i tatou le alofa o Lē na Fofoaina i latou.” -*Ibid.*, p. 9.

i. O le ā se mea e tatau ona taula’i atu i ai o tatou mafaufau ona o le folafolaga o le tausiga a le Atua? Mataio 6:30-34.

“Pe afai tatou te taumafai e pulea mea uma i o tatou lava lima, ma faalagolago i lo tatou lava poto mo le mauaina o fa’amanuiaga, ua tatou tauaveina la se avega e le’i faapea ona tuuina mai e le Atua ia i tatou, ma ua tatou taumafai e tauave nei avega e aunoa ma Lona fesoasoani. Ma ua tatou tauaveina ai i o tatou lava luga le tiute e gata lava i le Atua, ma faapea ona tatou tuuina moni ai lava i tatou i Lona tulaga. Atonu tatou te popole ma atuatuvaale e faatalitali i le matautia o mea e ono tutupu mai, auā e mautinoa lava o le a oo mai ia i tatou. Ae pe afai tatou te talitonu moni lava e alofa le Atua ia i tatou, ma ua Ia finagalo e faia mea lelei mo i tatou, o le a mafai ai e i tatou ona faate’aeseina lo tatou popole i le lumanai. O le a tatou faalagolago i le Atua e pei ona faalagolago o se tamaitiiti i se matua alofa. Ona mou atu ai lea o ō tatou faafitauli ma puapuaga, auā ua ufitia o tatou loto i le finagalo alofa o le Atua.” -*Thoughts from the Mount of Blessing*, pp. 100, 101.

a. O fea ua tu'uina maoti ai e Keriso fa'aaliga manino o le fuafuaga a le Atua mo le fa'aolataga o tagata? Ioane 5:39; Isaia 34:16.

“O lo'o fa'apea ona fetalai mai o le Atua ia i tatou i Lana afioga. O iinei ua tatou maua i ai ni laina manino ma le maoti o le fa'aaliga o Lana amio, atoa ai ma feūtaga'iga ua Ia faia ma le tagata, ma le galuega tele o le fa'aolataga.” -*Steps to Christ*, p. 87.

e. O le a se mea e tatau ona faia i aso ta'itasi e i latou uma e manana'o e tutupu a'e i le malosi ma le mana o le Atua? Ioane 6:53, 63; Kolose 3:1, 2.

“O le mataupu i le fa'aolataga, o se tasi lea o mataupu e naunau pea agelu e fia vaavaai ma suesue pea i ai; o le a avea lea ma suesuega ma pese a ē ua togiolaina i tausaga e lē gata mai o le ola e faavavau. Pe o le a lē tatau ea ia i tatou ona mafaufau loloto i ai ma avea ma ā tatou suesuega i le taimi nei? O le alofa mutimutivale lē faituāoia o Iesu, i le ma le taulaga tele na faia mo i tatou, e manaomia ai ona mafaufau loloto i ai ma le fa'amaoni. E tatau ona tatou mafaufau loloto i ai i le uiga ma le amio a lo tatou Fa'aola pele ma lo tatou Puluva. E ao lava ona tatou mafaufau loloto i ai i le misiona a Ia o Lē na afio mai e laveai Lona nuu mai a latou agasala.” -*Ibid.*, pp. 88, 89.

i. E fa'apefea ona tatou taliaina le afioga a le Atua i o tatou loto? Mataio 4:4; 2 Timoteo 2:15.

“E leai se tasi e iai se agaga e na te taliaina ana aoaoga e mafai ona faitau se fuaitau e tasi mai le Tusi Paia e aunoa ma le mauaina mai ai o se manatu aogā. Auā o le aoaoga sili ona tāua o le Tusi Paia e lē maua mai i ni suesuega o lagona oso fa'afuase'i pe lē feso'otai foi. O lona fa'atulagaga tele lava o le upu moni, e lē o tuuina mai i se auala e iloa ai e le tagata faitau televave po'o le fa'atamala fo'i ona malamalama i ai. Ma o le tele lava o ana oa o lo'o natia i lalo ifo o le eleele, ma e na o le suesuega māelega ma le filiga ma taumafaiga finafinau lē malolo e mafai ona maua mai ai. E tatau ona suesueina ma aumaia ai le tuufaatasia o upu moni tāua i se tulaga tele lava, 'o sina mea itiiti iinei, ma sina mea itiiti iina.' Isaia 28:10.

“A uma ona suesueina ma aumaia faatasi, o le a iloa ai ua fetau ma ogatasi lelei ia fa'amatalaga. O fa'amatalaga taitasi uma o le Talalelei, e i ai ona fa'aopoopoga i isi, e fa'apena fo'i i fa'amatalaga a nisi o valoaga e fa'amalamalamaina ai isi valoaga, e fa'apena foi i upu moni taitasi uma lava e fausia a'e ai isi upu moni. Ua fa'apena fo'i ona fa'amanoina mai e le talalelei ituaiga o oa poo tamaoaiga fa'a-Iutaia. O aoaoga poo mataupu fa'avae taitasi uma o le afioga a le Atua, e iai lava lona tulaga, e i ai foi uiga o mea taitasi o lo'o tusia ai. Ma o lona fa'avae atoa lava, i lona fuafuaga ma lona fa'atatauga, o lo'o molimau uma mai i lona Tusitala. O se fa'atulagaga fa'apena e leai se mafaufau e mafai ona faia fa'apena se'ivagana ai le Atua e lē māfa'atusalia.” -*Education*, pp. 123, 124.

a. O le ā se mea na aumaia le fa’amafanafanaga ma le fesoasoani ia Ieremia i lona taimi o faigata? Ieremia 15:16.

“E leai se isi mea e sili atu ona fuafuaina e fa’amalosia ai le mafaufau nai lo le su’esu’eina o le Tusi Paia. E leai se isi tusi e sili atu lona malosia e mafai ona siitia le fa’amalosia o tomai o le mafaufau, e pei o upu moni sili ona loloto ma lautele o i le Tusi Paia. Pe ana fai e su’esu’eina le afioga a le Atua e pei ona tatau ai, semanu e maua e tagata se fa’alauteleina o le mafaufau, ma se uiga fa’amamaluina o le amio, ma le mausalī o fa’amoemoega ua seāseā ona va’aia i ona po nei.” -*Steps to Christ*, p. 90.

“O lē ua tuuina atu lona mafaufau ma le tatalo i le suesueina o le Tusi Paia, o le a maua e ia se malamalama’aga manino ma le fa’asinomaga sa’o, e peisea’i ua ia oo atu i se tulaga maualuga atu o le atamai i lona liliu atu i le Atua.” -*Mind, Character, and Personality*, vol. 1, p. 95.

e. E fa’aapefa ona su’esu’eina le Tusi Paia, ma o le ā se mea e tatau ona faia muamua a o le’i suesueina le Tusi Paia? Salamo 119:9, 11, 16.

“O le upu moni a le Atua, e pei o le o natia i le eleele auro; e gata ona maua e le mafaufau e suesue ma le fa’amaoni i ai.” -*Gospel Workers*, p. 76.

“E pei ona maua e le tagata ‘eli auro se vaega o auro ma maa tāua o lo’o natia i lalo o le eleele, e fa’apea fo’i ona maua o lea oa silisili ona tāua e lē ua suesue ma le fa’amaoni i le afioga a le Atua, e pei o se oa natia e maua ai upu moni e sili ona taua, lea e natia mai le va’ai a le tagata sailiili ma le fa’atamala. O afioga musuia mai le Agaga o le Atua, pe afai e teuina i le loto, o le a pei o magāvai o lo’o tafe mai i le punavai o le ola.

“E lē tatau ona su’esu’eina le Tusi Paia e aunoa ma le tatalo. A o le’i tatalaina ona itulau e tatau ona tatou ole atu ina ia fa’amalamalamaina i tatou e le Agaga Pa’ia, ma e mautinoa lava le foa’iina mai.... O agelu o ē o lo’o mau i le malamalama fa’alelagi, o le a fa’atasi mai ia i latou o ē o lo’o sailia ma le lotomaulalo le ta’ita’iga fa’alelagi.” -*Steps to Christ*, p. 91.

1. O le a le metotia na fa’aaoga e lo tatou Fa’aola e aapa atu ai i tagata?
2. O le a le sauniuniga ua faia e le Atua e fa’aalia mai ai Ia lava i tagata uma—e oo lava ia i latou e le’i fa’alogo i Lana Afioga?
3. O a mea e mafai ona tatou aoaoina mai i le tausiga alofa a le Atua ia i tatou?
4. Fa’amatala le uiga talafeagai e tatau ona i ai ia i tatou e uiga i le Tusi Paia o le fa’aaliga lea a le Atua.
5. O le a le aafiaga na o’o ia Ieremia e uiga i le Tusi Paia e tatau ona toe tupu fo’i ia i tatou?

O lo Tatou Tofi o le Tatalo

Mau Tauloto: “A o oe, pe a e tatalo, ina ulu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā fo’i o Lē silasila i le mea lilo, Na te avatu fa’aaliali se tau i te oe” (Mataio 6:6).

Faitauga Fautuaina: *Steps to Christ, chapter 11, pp. 93-104.*

“O le tatalo, o le tatalaina atu lea o le loto i le Atua e pei o se uo. E lē faapea e tau faailoa atu i le Atua po o ai i tatou, ma lē silafia o tatou loto, ae peita’i ina ia mafai ai ona tatou talia o Ia. E lē ina ia aumaia ai e le tatalo le Atua ia i tatou, a ia siitia a’e ai i tatou ia te Ia.” -*Steps to Christ, p. 93.*

1. O LE TAGATA UA MATUĀ FA’ATOGA I LE [TATALO] Ulua’i Aso, Setema 6

a. I le avea ai o Ia ma Atalii o le tagata, o le a se mea na silafia e Iesu e tatau ma mana’omia? Luka 5:16; Mareko 6:46.

“Faauta i le Alo o le Atua ua toele o Ia i Lona Tamā i le tatalo! E ui o Ia o le Alo o le Atua, ae na Ia faamalosi Lona faatuatua i le tatalo, ma o Lana fesoota’iga vavalalata ma le Lagi na mafai ai ona faapotopotoina mai ai iā te Ia le mana ma le malosi e tete atu ai i le leaga, ma auauna atu ai i manaoga o tagata. I le avea ai o Ia ma o tatou Uso Matua mo le aiga tagata, na Ia silafia manaoga o i latou uma o ē ua siomia i le vaivai ma ola i se lalolagi o agasala ma tumu i faaosoosoga, o loo naunau pea e auauna atu ia te Ia. Ua Ia silafia lava, o avefeau ua Ia filifilia e auina atu, e i ai o latou vaivaiga, o ni tagata e sesē; ae o i latou uma o ē e tuuina atu atoatoa i latou lava i Lana auaunaga, ua Ia folafola atu i ai le fesoasoani faalelagi. O Lana lava faataitaiga o se faamaoniga mautinoa lea mo le tagata e aoi ma tatalo atu ma le loto faamaoni ma finafinau i le Atua i le faatuatua—auā o le faatuatua e ta’ita’ia atu ai i le faalagolago atoatoa atu i le Atua, ma le tuuina atu faapitoa o ia lava e aunoa ma se faatuai mo Lana galuega—ma o le a aogā tele lea e aumaia ai i tagata le fesoasoani a le Agaga Paia i le tauā e tete’e atu ai i le agasala.” -*Gospel Workers, p. 511.*

e. E faapefea ona avea le faiga tatalo na faia e Keriso ma faataitaiga mo i tatou? Mareko 1:35; Luka 6:12.

“O Iesu lava ia, a o mafuta faatasi o Ia ma tagata, sa masani o Ia ona tatalo.” -*Steps to Christ, p. 93.*

a. Na faapefea ona aoaoina e Iesu Ona soo i le tatalo? Luka 11:1-4.

“A o i ai Iesu i le lalolagi, na Ia aoaoina Ona soo i le auala latou te tatalo ai. Na Ia faatonuina i latou ina ia tuuina atu o latou manaoga o aso taitasi i le Atua, ma ia tuuina atu iā te Ia mea uma o latou popole ai. Na Ia tuuina atu ia i latou le mautinoaga e uiga i a latou tatalo, o le a faafofogaina a latou aioiga, ma o se faamautinoaga foi lea mo i tatou....

“O se uso lava o Ia i o tatou vaivai, auā ‘na faaosoosoina o Ia i mea uma pei o i tatou;’ ae peita’i o Ia o le Tagata e leai se agasala, auā o Lona soifuaga na matuā tete’e ma inoino i le leaga; Na Ia onosa’ia tauiviga tigā na fa’apuapuagaina ai Lona agaga i se lalolagi o agasala. I le avea ai o Ia ma Tagata Soifua pei o i tatou, e tatau ai lava ia te Ia ona tatalo, ma avea o se fa’amanuiaga ia te Ia le tatalo. Na Ia maua le fa’amafanafanaga ma le olioli i lo la fesoota’iga ma Lona Tama. Pe afai fo’i na lagona e le Fa’aola o tagata, o le Alo ia o le Atua le manaomia o le tatalo, o le a lē sili atu ea ona tatau ia i tatou o ni tagata ua vaivai ma agasala ona lagona le mana’omia o le tatalo soo faatauanau ma le fa’amaoni.” -*Steps to Christ, pp. 93, 94.*

e. E fa’apefea ona fa’amatalaina e le Tusi Pa’ia le tuuina atu faapitoa e Keriso o Ia lava, ma le mafua’aga e matuā tāua tele ai lenei mea? Isaia 50:4; Eperu 2:10; 5:7-9.

“A o Ia tauaveina le tino tagata, na Ia lagonaina Lona mana’omia o le malosi mai Lona Tamā. Sa i ai ni nofoaga faapitoa lava na Ia filifilia e tatalo ai. Na faaalua Lona fiafia i lo la mafuta fa’atasi ai ma Lona Tamā i Lona nofo toatasi ai i le filemu o mauga. O lenei faiga, sa matuā fa’amalosia ai lava Lona soifua paia fa’aletagata i tiute ma tofotofoga o aso uma. Ma ua faaalua mai ai e lo tatou Fa’aola Ia lava i o tatou mana’oga ma mea ua tatou vaivai ai, i le avea ai o Ia ma se tagata tatalo, o se tagata e aoi ma faatoga atu i Lona Tamā i po uma, ina ia saili mai ia te Ia ni faaopoopoga fou o le malosi, ina ia aumaia ai le malosi faafouina, e saunia ai mo le tauaveina o tiute o aso uma atoa ai ma tofotofoga. O Ia lava o lo tatou faaa’oa’o i mea uma.” -*Testimonies for the Church, vol. 2, pp. 201, 202.*

“Na ou vaaia, e leai ma se tasi mai le luasefulu o tupulaga talavou e iloa ma malamalama i le mea e ta’ua o le faamasani i le olaga fa’ale-tapuaiga moni. O lo o latou auuina i o latou lava mana’oga ae fai mai o i latou o auuina a Keriso; ae peita’i afai e lē mafai ona gagauina le mailei o loo fai ma togafiti ia i latou, o le a vave ona latou iloa ai, o le i’uga o le tagata agasala o le a avea foi lea ma i’uga o i latou. Auā o le faafitia e le tagata o ia lava, po’o le avea lea ma taulaga mo le upu moni, ua latou maua ai se ala faigofie e sili atu nai lo na mea uma. O le faatoga atu ma loimata faamaoni ma aoi atu ma le fa’amalosi i le Atua mo Lona alofa tunoa faamagalalo ma le malosi mai ia te Ia, e mafai ai ona tete’e atu ai i faaosoosoga a Satani, ae peita’i ua latou manatu faapea, e lē manaomia ona matuā faamaoni ma maelegā; ma e mafai lava ona latou ola manuia e aunoa ma lea. E ui lava o Keriso, o le Tupu o le mamalu, ae na masani o Ia ona alu atu i nofoaga tuufua i luga o mauga e sasaa atu ai Lona loto i Lona Tamā e ala i tatalo, ae peita’i le tagata agasala, leai se malosi ia te ia, ua manatu ia e mafai lava ona ia ola e aunoa ma le matuā tele o le tatalo.” -*Ibid., vol. 1, pp. 504, 505.*

a. Na fa'aapefea ona fa'aalia mai e Iesu ia i tatou le uiga o Lona Tamā i mana'oga fa'aletagata? Mataio 6:6; 7:7-11.

“O loo faatali lo tatou Tamā fa'alelagi e foa'i mai ia i tatou le atoatoa o Ana faamanuiaga. O lo tatou avanoa lea ma faamanuiaga tatou te matuā feinu ai i le puna o le alofa lē faituāoia. O se mea e matuā ofo tele ai i le itiiti o lo tatou olaga tatalo! Ua sauni ma naunau mai le Atua e fa'afofoga i le tatalo fa'amaoni a le tagata aupito i fa'atauva'a o Lana fanau, ae peita'i o i tatou ua tele ina peiseaī ua tatou mumusu e fa'ailoa atu o tatou mana'oga i le Atua...

“O le poto tele o le Atua e lē mafai ai ona Ia sesē, o Lona agalelei fo'i Na te lē taofia ai se mea lelei mai ia i latou uma o ē savavali ma le amio sa'o. O le mea lea, e ui lava ina tatou lē vave va'aia se tali mai i a tatou tatalo, a ia 'aua lava ne'i o tatou fefefe e talitonu pea ia te Ia. Ia talitonu pea ma le mautinoa i Lana folafolaga, 'Ia outou ole atu, ona foaiina mai ai lea ia te outou.' ” -*Steps to Christ*, pp. 94, 96.

e. O le ā se mea e ono taofia mai ai a tatou tatalo mai le fa'afofogaina e le Alii? Salamo 66:18; Faataoto 28:13.

“Atonu e mafai ona tosina atu o tatou mafaufau i le [Atua]; ma faapea ona tatou mafaufau loloto atu ai i Ana galuega, ma Lona alofa mutimutivale, faapea ma Ana fa'amanuiaga; ae peita'i e lē o le fesoota'iga atoatoa lea ma Ia. Ina ia fa'aatoatoaina lo tatou fesoota'iga ma le Atua, e ao ai lava ona i ai o se mea tatou te fai atu ai ia te Ia e uiga i le tulaga moni lava o ō tatou olaga...

“Po o le ā se mea e mafai ona manatu i ai agelu fa'alelagi e uiga i le aiga tagata vaivai ma le lē mafaia o se mea, o ni tagata matitiva, o ē o loo siomia i fa'aosoosoga, ina a o naunau mai le finagalo o le Atua e tumu i le alofa lē faituāoia, Na te fia foa'i mai ia i latou le manuia e fa'asilisili lava i mea latou te ole atu ai ma mafaufau i ai; a o lenei e seāseā ona latou tatalo, ma ua itiiti fo'i lo latou faatuatua? E fiafia agelu e ifo atu i luma o le Atua, latou te fiafia e fa'alatalata atu ia te Ia. O le mea lea e sili ona latou olioli ai, o lo latou mafuta fa'atasi pea lea ma la, ae peita'i le fanau a tagata o i le lalolagi, o ē e mana'omia tele le fesoasoani e na o le Atua e mafai ona maua mai ai, e foliga mai peiseaī ua latou malilie e feoa'i pea e aunoa ma le malamalama o Lona Agaga, e aunoa fo'i ma le mafuta fa'atasi ma Ia...

“O ē ua fa'avaivai ma fa'atamala i le tatalo, o le a ufitia i latou i le pogisa o lē o loo leaga. O faaosoosoga lē leoa a le fili e tauānuina ai i latou ia agasala; ma ua mafua lenei leaga uma ona ua latou lē fa'aaogaina avanoa ua tu'uina mai e le Atua ia i latou i le tofiga paia lea o le tatalo....

“Afai tatou te mautinoa se leaga ua i o tatou loto, ma ua tatou pipii atu pea i ai i se agasala ua tatou iloa, o le a lē fa'afofoga mai leova ia i tatou; ae peita'i o le tatalo ua faia ma le agaga salamō ma le loto momomo, e taliaina lava. Pe afai e faasa'oina ma ua uma ona fa'atonuina o mea ua mautinoa ua tatou sesē ai, e mafai ona tatou talitonu o le a tali mai le Atua i a tatou tatalo. E lē ona o so tatou lava lelei o le ā alofagia ai i tatou e le Atua; ae tusa ma le lelei silisili o Iesu o le a fa'aolaina ai i tatou, o Lona toto o le a fa'amamāina ai i tatou; ae peita'i o lo'o i ai fo'i la tatou galuega e ao ona fai i le usita'ia lea o tuutuuga ina ia taliaina ai i tatou.” -*Ibid.*, pp. 93-95.

a. O a vaega taua o le tatalo e manumalo ai le tagata finafinai, pe a faatusa atu i le tatalo a le tagata paiē ma le lē aogā? Eperu 11:6; Mareko 11:24.

“Pe afai tatou te lē maua le mea tonu lava lea na tatou ole atu ai i le taimi lava na tatou ole atu ai, e tatau lava ona tatou talitonu pea, o lo’o fa’afofoga mai le Ali’i ma o le a tali mai lava o Ia iā tatou tatalo. O i tatou o le fanau e sesē gofie, ma puupuu foi la tatou va’ai, o nisi taimi tatou te ole atu ai i mea e lē o i ai se fa’amanuiaga mo i tatou, ae peita’i, o lo tatou Tamā o i le lagi i Lona alofa silisili, e tali mai ai pea lava iā tatou tatalo e ala i le foaiina mai o mea ua Na silafia e sili ona lelei ma aogā mo i tatou, o mea lava ia na semanū tatou te ole atu ai ma manana’o ai pe ana fai tatou te maua le va’aiga fa’alelagi e mafai ona tatou iloa tino ai le uiga moni o nei mea uma. Pe afai e foliga mai ua lē taliaina mai a tatou tatalo, e tatau lava ona tatou taofi mau atu pea i Lana folafolaga; auā o le a oo mai lava le taimi e tali mai ai, ma o le a tatou maua fa’amanuiaga e sili ona tatou mana’omia.” *-Steps to Christ, p. 96.*

e. O le a le agaga tonu lava e tatau ona ia i tatou, ina ia fa’afofogaina ai e le Alii a tatou tatalo? Mataio 6:12; Mareko 11:25, 26.

“Pe afai tatou te o atu i le Atua ma tatou ole atu mo le alofa mutimutivale ma le faamanuiaga mai ia te Ia, e tatau lava la ona iai iā i tatou le agaga o le alofa ma le fa’amagalo atu i o tatou lava loto. Auā o le a fa’apefea ona tatou tatalo atu e fa’apea, ‘Ia e faamagalo mai ia te i matou i a matou agasala, e pei o i matou fo’i ona matou faamagaloina atu i ē ua agaleaga mai ia te i matou,’ a o lo’o i ai pea iai tatou le agaga o le lē fia fa’amagalo atu? Mataio 6:12. Pe afai tatou te faamoemoe ina ia fa’afofogaina ma talia mai a tatou tatalo, e tatau lava la ona tatou fa’amagalo atu i isi i le auala lava lea e pei fo’i ona tatou fa’amoemoe e faamagaloina ai i tatou.” *-Ibid., p. 97.*

i. O a ni mea e mafai ona tatou aoaoina mai i le tatalo a Elia ina ia timu? 1 Tupu 18:41-45.

“Sa vaavaai le auuana a o tatalo Elia. E fa’a-ono lelei na ia toe foi mai nai le leoleoga, ma faapea mai ia Elia, E leai se mea na ou iloa, e leai fo’i se ao, e leai fo’i se faailoga o le timu. Peita’i, e le’i avea lea ma mea na fa’avaivaia ai le perofeta. Na matuā toe iloilo lelei e le perofeta lona olaga, ina ia ona iloa ai, po o ifea se mea na ia lē faamamaluina ai le Atua, ma ia ta’uta’u atu ana agasala, ma ia fa’auau ai pea lona fa’apuapuagatia o lona agaga i luma o le Atua, a o ia vaavaai atu mo se faailoga e faamautinoa ai ua taliina e le Atua lana tatalo. A o ia su’esu’eina lona loto, na foliga mai ai na ia tuuina o ia i se tulaga maulalo ma faatauvaa i lona lava manatu mai le silafaga a le Atua. Na foliga mai ia te ia ua aunoa lava o ia ma se faamoemoe peiseaī o se mea noa lava ia, ae ui lava i lea, na ia iloa o le Atua e ou mea uma lava; ma ina ua oo atu o ia i le tulaga o lona lē toe talitonuina o ia lava, a o faapea ona ia taofi mau atu pea i le Faaola ua na’o le pau lava lea o le ala o lona malosi ma le amiotonu, ona oo mai ai lea o le tali.” *-The SDA Bible Commentary, vol. 2, p. 1035.*

a. O a fautuaga taua ua tu'uina mai e le au aposetolo e uiga i le tatalo? 1 Peteru 4:7; Filipi 4:6.

“E tatau lava ona e vilivilitai i le tatalo; ‘aua ne’i fa’alavelaveina oe i se mea lava e tasi. Ma ia faia taumafaiga uma ina ia tausia ai pea le mafuta fa’atasi o Iesu ma lou agaga. Ia saili ina ia faaaogaina soo se avanoa e mafai ona e auai atu ai i nofoaga poo le mea e masani ona faia ai o tatalo. O i latou o lo’o matuā sailia moni lava le mafutaga ma le Atua, o le a va’aia pea i latou i saunigā lotu tatalo, o lo’o fa’amaoni i le faia o ō latou tiute, ma le vilivilitai, ma le naunau ina ia latou seleseleina mai fa’amanuiaga uma e mafai ona latou maua. O le a latou fa’aleleia avanoa uma ina ia tu’u ai i latou i le mea e mafai ona latou maua mai ai ave uma o le malamalama mai le lagi.” -*Steps to Christ, p. 98.*

e. O le a le mea e finagalo le Ali’i ina ia faia e Lana fanau, e pei lava o soo se matua ona naunau i a latou fana? Luka 11:10, 13; Ioane 14:13, 14.

“Na fetalai atu Keriso i Ona soo, ‘O Lo’u igoa’ tou te ole atu ai pe a outou tatalo. E tatau i Ona soo uma ona latou tutū atu i luma o le Atua i le Suafa o Iesu. Talu ai ona o le tāua o le taulaga na Ia faia mo i latou, o le mea lea e tāua ai i latou i le silafaga a le Atua. Ona o le amiotonu a Keriso ua ofoina atu ia i latou, ua manatu ai le Atua e tāua i latou. Ona o Keriso, ua faamagalo ai e le Alii i latou o e matata’u ia te Ia. Ua lē silasila mai o Ia ia i latou i le leaga o le tagata agasala, a ua Ia silasila mai ia i latou i le fa’atusa o Lona Alo, o Lē ua latou talitonu ma fa’atuatua i ai.” -*The Desire of Ages, p. 667.*

“E leai se taimi (itula) po o se nofoaga e fa’apea ua lē talafeagai ai ona faia o se tatalo i le Atua. E leai se mea na te mafaia ona taofia maia i tatou mai le siitia a’e o ō tatou loto i le agaga o le tatalo ua faia ma le faamaoni. E mafai lava e i tatou ona siitia a’e o talosaga i le Atua i totonu o se motu o tagata i le alatele, i le lotolotoi o galuega, e mafai lava ona tatou ole atu ai i le Atua ma aioi atu ai ina ia tatou maua o le taitaiga fa’alelagi, e pei ona faia e Neemia ina ua ia faia lana aioi i luma o le Tupu o Aretaseta. Soo se mea lava tatou te i ai, e mafai lava ona tatou maua ai o se afeafe poo se mea tuufua tatou te fesootai ai ma le Atua.” -*Steps to Christ, p. 99.*

1. O le ā se faataitaiga o le tumau pea i le tatalo ua tu’uina atu mo tagata talitonu uma?
2. O le ā le valoaga o loo faaalua ai le tāua o le tatalo e faia i taeao uma?
3. O le ā se mea e manaomia ona faia mo le tatalo o faamanuiaga?
4. Aiseā e mana’omia ai ona faia pea o tatalo a o fa’atali mo se tali?
5. Fa’amatala le uiga o le tatalo i le suafa o Iesu.

O Le Mea e Faia i le Masalosalo

Mau Tauloto: “A ia ole atu ma le faatuatua, aua lava ne’i masalosalo. Auā o lē masalosalo e tusa ia ma le peau o le sami ua sousou i le matagi ma felafolafoa’iina” (Iakopo 1:6).

Faitauga Fautuaina: *Steps to Christ, chapter 12, pp. 105-113.*

“E lē mafai ona fetalai mai o le Atua ia i tatou ina ia tatou talitonu, ae aunoa ma le tuuina mai o ni faamaoniga poo ni molimau e lava ma totoe e faavae a’i lo tatou faatuatua.” -*Steps to Christ, p.105.*

1. O LE Ā LE MASALOSALO?

Ulua’i Aso, Setema 13

a. O le ā se mea e tatau ona tatou manatua pe a tofotofoina i tatou e faalotolotolua i le faatuatua ma le masalosalo? Iakopo 1:5-7.

“[O le folafolaga a le Fa’aola] e na’o i latou lava o ē naunau e mulimuli atoatoa atu i le Alii. E lē fa’amalosia e le Atua se loto o se tasi; o le ala lea e lē mafai ai ona Ia ta’ita’ia i latou o ē ua tele le fa’amauualuluga auā e lē mafai ona a’oa’oina i latou o ē o naunau e fai le auala latou te loto i ai. O le tagata e fa’alotolotolua lona mafaufau - o lē ua saili e mulimuli i lona lava loto a o loo ia ta’utino mai o loo ia faia le finagalo o le Atua - ua tusia, ‘Aua ne’i manatu lea tagata na te maua se mea e tasi mai le Ali’i.’ Iakopo 1:7.” -*Patriarchs and Prophets, p. 384.*

e. O le ā le mea ua tuuina mai e le Ali’i ina ia aveesea ai le masalosalo? Salamo 119:105; Eperu 11:1, 3, 6.

“E tatau ona fa’avae lo tatou fa’atuatua e ala i fa’amaoniga, ae lē o le tino mai o mea. O i latou e fia masalosalo, latou te maua pea lava le ala o le masalosalo; a’o i latou o ē ua naunau faamaoni i le fia iloa o le upu moni, o le a latou maua le tele ma le anoanoa’i o fa’amaoniga e fa’avae a’i lo latou fa’atuatua.” -*Steps to Christ, p. 105.*

“Ua lava molimau ua tuuina mai e le Atua i Lana afioga e faailoa mai ai Lona uiga ma le paia o Lana amio. Ua manino foi ona a’oa’o mai le Tusi Paia e faatatau i upu moni silisili o lo tatou fa’aolataga. E mafai e soo se tasi ona malamalama i ai i nei upu moni uma pe a ole atu mo le ta’ita’iga a le Agaga Paia, e pei ona folafola mai e le Agaga Paia ia i latou uma o ē saili i ai ma le faamoni. Ua tuuina mai fo’i e le Atua i tagata se faavae mautū ma malosia e faavae pe taula i ai lo latou faatuatua.” -*The Great Controversy, pp. 526, 527.*

a. E fa'apefea ona tatou fetaia'i pe faafesootaia i tatou i mea lilo e le'i faailoaina mai e le Atua? Teuteronome 29:29; Iopu 38:4-11.

“O loo i ai i le afioga a le Atua, e pei foi ona i ai i le uiga o lona Tusitala, nisi mea e lē mafai ona manino ma malamalama atoatoa i ai le mafaufau fa'aletagata. O le ofi mai o le agasala i le lalolagi, o le liu tino tagata o Keriso, o le toe fanaufouina o i tatou, o le toe tutū mai o ē ua oti, ma le tele o nisi mataupu o lo'o tusia i le Tusi Paia, o mea lilo ia e fai si loloto tele, ma e lē mafai e le mafaufau fa'aletagata ona fa'amatalaina, pe malamalama atoatoa foi i ai. Ae peita'i, e leai ma se mafua'aga e tatau ai ona tatou masalosalo i le Afioga a le Atua ona o mea ua lē mafai ona tatou malamalama atoatoa i ai e uiga i mea lilo o Lana tausiga.” -*Steps to Christ*, p. 106.

“E lē faamalosia e le Atua le tagata ina ia tuu'ese lo latou lē talitonu. O loo ua i o latou luma nei le malamalama ma le pouliuli, o le upumoni ma le mea sesē. E ao ia i latou ona latou filifili po o le fea latou te taliaina. Ua tuuina atu i le mafaufau o le tagata le malosi fai filifiliga o le mafaufau e iloa ai le eseesega i le va o le sa'o ma le sesē. E finagalo le Atua ina ia 'aua ne'i faia e tagata a latou filifiliga i lagona oso, ae peita'i ia latou filifili ona o le fua faatatau o faamaoniga poo molimau, ma ia faatusatusa ma le faaeteete isi mau o le Tusi Paia i isi mau. Ana faapea na tuu ese e tagata Iutaia lo latou faailoga tagata ma faatusatusa valoaga tusia ma mea moni o loo faamatalaina mai ai le soifuaga o Iesu, semanū latou te iloa le matagofie o le ogatasi lelei o valoaga ma lona faataunuuga o mea ua tusia ai e uiga i le soifuaga ma le galuega a le Tagata loto maulalo ma faatauva'a o Kalilaia.

“E toatele fo'i ua fa'asesēina i aso nei e pei ona fa'asesēina o tagata Iutaia. E a'oa'o ma faitau e faiaoga faalelotu le Tusi Paia e tusa ma le malamalama i le mea ua latou iloa e fua i ā latou tū ma agaifanua; auā ua lē suesueina e tagata le Tusi Paia ona e mo i latou lava, ma tuuina i ai i latou e faamasino i ai po o le ā le upu moni; ae peita'i ua latou taumafai e alo ese mai i le mea o faailoa mai e le Tusi Paia, ma latou tuuina atu o latou agaga i le faasinomaga a o latou taitai. O le folafolaina ma le aoaoina o Lana Afioga, o se tasi lea o auala ua faatulagaina e le Atua mo le faasalalauina atu o le malamalama; ae peita'i e tatau lava ona tatou tuu uma i luga o le fua o le Tusi Paia ina ia tofotofoina ai soo se aoaoga e aumaia e tagata.” -*The Desire of Ages*, pp. 458, 459.

e. E faapefea ona iloa i le Tusi Paia o loo i ai mea e faigata ona malamalama i ai? 2 Peteru 3:16.

“O upu faamatalagatā o i le Tusi Paia ua uunaia malosi e nisi o tagata masalosalo, ua latou ave'a e fai ma finauga e tetee atu ai i le Tusi Paia; ae peita'i ua ave'a lea ma faamaoniga ma molimau malosi o Lona uiga fa'ale-Atua. Pe ana fai e leai se tala tusia e uiga i le Atua ae ua na o ni mea e faigofie ona tatou malamalama i ai; pe ana fai fo'i e mafai ona malamalama atoatoa i ai le mafaufau o le tagata i Lona silisiliese ma Lona mamalu, semanū tatou te lē maua i le Tusi Paia ni faamaoniga poo ni faailoga manino e lē māfa'afitia o Lana pule fa'alelagi. O le silisiliese ma le mamalu, o le loloto ma le lilo o mataupu o loo ua faaalaina mai i le Tusi Paia, e tatau ona faaosofia ai le faatuatua ma le talitonu atoatoa i le moni o afioga a le Atua.” -*Steps to Christ*, p. 107.

a. O le ā se lamatiaga faapitoa lava mo le ‘au talitonu i nei ona aso e gata ai? Eperu 3:12; 2 Timoteo 4:3, 4.

“E tāua tele fe’au o le lapata’iga ua auina mai e le Atua i tagata e pei ona folafolaina e agelu paia o loo felelei i le taulotoa’iga o le lagi, o le mea lea ua finagalo ai le Atua ina ia usita’i tagata uma o ē ua i ai le mafaufau loloto e faalogo ai i nei fe’au. Ma e mata’utia le to’asa o le a liligiina mai ia i latou o ē ifo i le manu fe’ai ma lona faatagata (Faaaliga 14:9-11), o le mea lea e tatau ai lava ona maelegā tagata uma i le suesueina o nei valoaga, ina ia latou iloa ai po o le a le faailoga o le manu fe’ai, ae pe faapefea fo’i ona latou ’aloese mai ai ne’i maua e i latou lea faailoga. Peita’i, o le toatele o tagata ua latou lē fia faalogo i le upu moni, a ua liliu atu i uputuu ma tala o le vavau. A o tepa le aposetolo o Paulo i aso o le i’uga, o upu ia na ia tusia: ‘Auā e oo i ona po latou te lē mafafai ai ona talia o le mataupu e ola ai.’ 2 Timoteo 4:3. O lenei ua oo mai le faataunuuga atoatoa o lea taimi. E afe ma afe i latou e lē manana’o i upu moni o le Tusi Paia ona e faalavelave i le faiga o manaoga leaga a o latou loto agasala, le loto e fiafia i le lalolagi; auā e tuuina atu e Satani ia i latou le mea taufaasesē e pei ona latou fiafia ma mananao i ai.” -*The Great Controversy*, pp. 594, 595.

e. O le ā le mea ua valoia mai e uiga i le amio a vasega nei e lua i aso e gata ai? Tanielu 12:10; Faaaliga 22:11.

“O le ā i ai i le lalolagi lenei se nuu poo le fanau a le Atua o ē tausia ma le faamaoni le Tusi Paia, na o le Tusi Paia lava, e fai ma faavae poo le fua tapulaa o a’oa’oga uma, e fai fo’i ma faavae o toe fuata’iga uma. O manatu o le au popoto, o faauigaga a le au atamamai i le poto fa’alelalolagi nei, o talitonuga po o faai’uga a fono a ekalesia, po o le leo fo’i o le toatele - e leai se mea o nei mea uma e ao ona avea ma faamaoniga o le sa’o poo le sesē o soo se a’oa’oga fa’alelotu. Ma e na o le tasi lava le faamaoniga e ao ona faalagolago i ai lo tatou talia poo le teena fo’i o soo se a’oa’oga poo soo se tapulaa faalelotu, E fa’alagolago i le tali o le fesili e fa’apea, ‘Ua fai mai ai ea le Tusi Paia?’ ” -*Ibid.*, p. 595.

“O le a fa’aalia pea e le Atua se malamalama fou mai Lana Afioga i ē o lo’o i ai sa latou sootaga ola ma le La o le Amiotonu. ‘Aua ne’i manatu se tasi ua leai se isi upu moni e toe fa’aalia mai. O le tagata filiagā i le suesue ma le tagata tatalo ma le loto faamaoni mo le upu moni, o le a ia maua pea ni ave tāua o le malamalama o loo susulu mai i le Afioga a le Atua. O loo i ai pea le tele o maa tāua o lo’o fa’asalalauina solo, e ao ina fa’apotopotoina mai ina ia avea ma malamalama o tagata totoe o le Atua. Peita’i, e le’i tu’uina mai e le Atua lea malamalama ina ia tau lava na o na faamalosi ai o le ekalesia, a ia fa’asusulu atu i ē o lo’o i le pogisa.” -*Counsels on Sabbath School Work*, p. 34.

a. E fa'apefea ona tatou iloa le eseesea i le va o mea e tāua ma mea e lē tāua? 2 Korinito 13:5; Tito 3:9-11.

“E ui lava ina ua tu'uina mai e le Atua le tele o faamaoniga e taula i ai lo tatou fa'atuatua, ae peita'i, o le a lē aveeseina ai lava so'o se mea e ono fai ma 'alofaga o ē lē fia talitonu. O i latou uma o ē sailiili mo ni 'alofaga e faamaite ai lo latou masalosalo, o le a tele ni 'alofaga latou te maua. O i latou uma e mumusu e talia ma usiusita'i i le afioga a le Atua se'iloga ua faamolemoleina auala uma ma ua leai ni toe masalosaloga, ma ua maua le tali o a latou fesili uma, e lē o'o lava i latou ia i le malamalama.” -*The Great Controversy*, p. 527.

e. O a fa'amanuiaga e maua e i latou o ē lotomaulalo? Iakopo 4:6, 10; 1 Peteru 5:6, 7.

“ ‘Ua Ia foaiina mai mea uma e tusa ma lo'u mativa, ua fa'amalieina le fia 'ai ma le fia inu o lo'u agaga; ma ua avea ai nei le Tusi Paia ma fa'aaliga o Iesu Keriso ia te a'u. Pe e te fesili mai ea, po ua mafua i se a ona ou talitonu ia Iesu? Auā ua avea o Ia ia te a'u o lo'u lava Fa'aola fa'alelagi. Ae po o le ā fo'i le mea ua ou talitonu ai i le Tusi Paia? Auā ua ou iloa ma ou maua nei, o le si'ufofoga lava lea o le Atua i lo'u agaga.' E mafai lava ona i ai i totonu ia i tatou o lenei molimau i le moni o le Tusi Paia, o Keriso, o Ia lava o le Alo o le Atua. Ua tatou iloa, tatou te lē o mulimuli i tala ua fatua ma le potu e faasesē ai.” -*Steps to Christ*, p. 112.

i. E faapefea ona faamatalaina e le aposetolo o Paulo le aafiaga o le tagata talitonu i le taimi nei ma le lumanai? 1 Korinito 13:12.

“Ua na o se vaega papa'u o le mataupu matagofie o le fa'aolataga ua mafai ona tatou malamalama i ai i lenei olaga. E mafai e o tatou mafaufau vaivai ona manatunatu ma le naunauta'i i le faalumaina atoa ma le mamalu, o le ola fo'i atoa ma le oti, o le amiotonu ma le alofa tunoa, o mea uma ia ua feiloa'i i le satauro; ae peitai, tusa lava pe tatou te faalateleina le malosi o ō tatou mafaufau, o le ā lē mafai lava ona tatou malamalama atoatoa i lona uiga loloto. Ua na'o na tatou malamalama ma le fa'anenefu i le umi ma le lautele, le loloto ma le maualuga o le alofa toggiola. O le fuafuaga o le fa'aolataga o le a lē mafai lava ona tatou malamalama atoatoa i ai, e tusa lava poo le taimi o le a iloa tino ai le 'au fa'aolaina e faapei ona iloatinoina o i latou; ae peita'i o le a tatalaina mai malamalama'aga o upu moni fou i le mafaufau ma'elega, ma le lotu e fia suesue i le ola e faavavau.” -*The Great Controversy*, p. 651.

“O le faatuatua e mafai ai ona tatou vaavaai atu i le olaga a sau ma mafai ai ona tatou taofi mau atu ai i le folafolaga a le Atua mo le fa'alauteleina o lo tatou iloa, o le a tuufaatasia ai o malosi faaletagata ma le malosi fa'alelagi, ma faapea ona aumaia ai o malosi uma o le agaga ina ia faafeso'ota'iina ma le Puna o le malamalama. E mafai ona tatou maua ai o le olioli ona o mea uma sa fa'anenefu ai o tatou mafaufau i le taitaiga potu a le Atua lea o le a fa'amalamalamaina, o mea sa faigata ona tatou malamalama i ai o le a tatou maua se faamaninoga; o mea na aliali mai ai na o le fenumia'i ai o tatou mafaufau ma lē faataunuuina ai o tatou faamoemoega, o le a tatou vaaia ai le lotogatasi sili ona atoatoa ma matagofie o Lana taitaiga potu. [1 Korinito 13:12.]” -*Steps to Christ*, pp. 112, 113.

a. O le ā le auala ofoofogia ua fa'aalia ai e le Ali'i Lana afioga i le taimi lenei a'o latalata mai ai o le i'uga? Faaaliga 10:2, 6, 7.

“O le tusi lea na faamaufaailogaina, e lē o le tusi o Faaaliga, a o se vaega o le valo'aga a Tanielu lea e fesoota'i tonu lava ma aso o le i'uga...[Tanielu 12:4.] Ina ua tatalaina le tusi, ona sau ai lea o le alaga, 'E lē toe i ai se taimi.' (Faaaliga 10:6.) Ua tatalaina nei le tusi a Tanielu, ma o le fa'aaliga na fai atu e Keriso ia Ioane, e tatau ona tuuina mai i tagata uma lava o loo nonofo i le lalolagi. O le fa'atuputeleina o le malamalama, o le a saunia ai tagata poo le fanau a le Atua e tutū atu i aso o le i'uga.” -*Selected Messages, bk. 2, p. 105.*

“E toatele ua latou manatu o le tusi o Faaaliga o se tusi ua faamaufaailogaina, ma latou lē fia faaluina ai se taimi e suesueina ai mea lilo o loo i ai. Latou te fai mai o loo latou vaavaai atu i le mamalu o le faaolataga, ma latou fai mai o mea lilo ia na faailoa ia Ioane i le Motu o Patamo e lē manaomia ona mafaufau tele i ai ona e leai sona tāua. Peita'i, e lē o le finagalo lea o le Atua e uiga i lenei tusi....

“O le tusi o Faaaliga o loo faamatalaina mai i le lalolagi mea ua uma ona faia, o mea o loo tutupu, ma mea o le a oo mai; o se tusi e mo i tatou o ē ua aulia mai ona aso e gata ai. E tatau lava ona matuā suesueina ma le faaeteete i le ava ma le migao e tatau ai....

“O le Alii lava Ia na faailoa i Lana auauna o Ioane mea lilo o le tusi o Faaaliga, ma o Lona finagalo ia tatalaina ma suesueina e tagata uma. O loo faailoa mai i totonu o lenei tusi vaaiga o loo i ai nei i le taimi ua tuanai, ma nisi o mea e fiafia i ai e faavavau o loo tutupu i o tatou itu uma; o isi o ana valoaga o loo i ai e le'i faataunuaina atoatoa se'i vagana ua oo i le i'uga o le taimi, pe a faai'uina le finauga tele mulimuli i le va o malosi o le pouliuli ma le Perenise o le lagi.” -*The SDA Bible Commentary [E.. G. White Comments], vol. 7, p. 954.*

e. O a mea e tatau ona faia e tagata talitonu i le suesueina o le Tusi Paia? 2 Timoteo 2:15; Ioane 7:17.

FESILI TOE FA'AMANATU

Aso Faraile, Setema 18

1. O le a le uiga e tatau ona ia i tatou ina ia malamalama ai i le upu moni?
2. Faamatala pe aisea e lē mafai ai ona tatou malamalama atoatoa i vaega uma o le Tusi Paia.
3. Aisea e le mananao ai le toatele e talia le upu moni o le Tusi Paia?
4. O le a le mea o le a maua pea e i latou e mananao e masalosalo?
5. Aisea e tāua ai le naunau e usitai i le malamalama o le upu moni?

Olioli i le Alii

Mau Tauloto: “Ae faapei ona tofusia o outou faatasi i tigā o Keriso, ia outou olioli ai; ina ia fiafia outou ma le olioli tele pe a faaalua mai Lona mamalu” (1 Peteru 4:13).

Faitauga Fautuaina: *Steps to Christ, chapter 13, pp. 115-126.*

“O le finagalo leni o le Alii mo Lana fanau uma o alii ma tamaitai, ia latou maua le fiafia, filemu, ma usiusitai.” -*Steps to Christ, p. 124.*

1. O TAGATA LATOU TE TAUAVEINA LE MALAMALAMA **Ulua’i Aso, Setema 20**

a. O le a le tiute na fetalai ai Iesu e tatau i Ona soo ona latou tauaveina i leni lalolagi? Mataio 5:13-16.

“Ua tofia Kerisiano e fai ma sulu o le malamalama i le ala aga’i atu i le lagi. E ao ona latou lafoia atu i le lalolagi le malamalama o loo susulu atu ia i latou mai ia Keriso. Ia avea o latou olaga ma amio ma ala e maua ai e isi se malamalama’aga sa’o e uiga ia Keriso ma Lana auaunaga e ala atu ia i latou.” -*Steps to Christ, p. 115.*

e. O le ā le uiga i le avea ai ma tagata talitonu mai tagata uma? Ioane 17:18, 23; 2 Korinito 5:20.

“Ua avea fanau uma taitoatasi a Iesu ma Ana tusi ua Ia auina atu i le lalolagi. Pe afai o oe o le soo o Keriso, ua avea lava oe ma Ana tusi ua Ia auina atu i le aiga, o le nuu, o magāla i le mea o loo e nofo ai. O Iesu, Lē o loo afio i totonu ia te oe, o loo naunau mai Na te fia fetalai atu i loto o i latou uma o ē latou te lē o masani ma Ia. Atonu latou te lē o faitauina le Tusi Paia, pe lē o faalogo foi i le siufofoga o loo fetalai mai ia i latou mai ona itulau; ma latou lē vaaia foi le alofa o le Atua e ala i Ana galuega. Ae pe afai o oe o se sui moni o Iesu, atonu o le a avea oe ma ala o le a taitaiina mai ai i latou ina ia pupula atu ai iai latou Lona agalelei, ma tosina mai ai i latou ina ia alolofa ma auauna atu ia te Ia.” -*Ibid.*

i. E na o le ā fo’i le auala e mafai ona faataunuuna ai o leni misiona? 2 Korinito 3:2-5.

a. O le ā le fa'aaliga aupito i sili ona maualuga o le alofa o le Atua mo Lana fanau? Ioane 3:16; Roma 5:6-10.

“Pe afai ua foliga mai ua tatou masalosalo i le alofa o le Atua ma peiseaī ua tatou lē talitonu i Ana folafolaga, ua tatou lē āva ma fa'amāsiasi lea o Ia ma fa'atigā i Lona Agaga Paia. Faamata o le ā se lagona o se tinā pe afai o lo'o faitio pea lava pea lana fanau iā te ia, e peiseaī ua lē o lelei lona loto iā i latou, ae o taumafaiga uma lava o lona olaga atoa o le sailia ma galueāina lea o mea latou te fiafia ma manuia ai ma avatu iā i latou le filemu ma le fa'amafanafanaga? Pe a faapea ua latou masalomia lona alofa; o le a tuia ma momomo ai lona loto. Faamata o ā ni lagona o se mātua pe afai ae faia faapea e sana fanau? Ma o le a fa'apefea ona silasila mai o lo tatou Tamā o i le lagi iā i tatou pe a tatou lē talitonu i Lona alofa, a o le alofa lava lea na mafua ai ona Ia auina mai Lona Alo e to'atasi ina ia tatou maua ai le ola? Na tusia e le aposetolo e faapea, ‘O Ia lava sa na lē fa'asaoina Lona lava Alo, a ua tu'uina mai o Ia e sui a'i i tatou uma lava, e lē foai fua mai ea e Ia ia i tatou mea uma lava faatasi ma Ia i se a?’ Roma 8:32. Ae peitai, e toatele o loo faapea ane, pe afai e lē o ni a latou upu, a'o a latou amioga ua faapea ane ai, ‘E lē o a'u e faasino i ai lenei fetalaiga a le Ali'i. Atonu e alofa o Ia i nisi, a ua Ia lē alofa mai iā te a'u.’” -*Steps to Christ*, pp. 118, 119.

e. O le ā se mea e fa'amaonia ai o le finagalo o le Atua ia foa'iina mai i Lana fanau mea uma lava? Roma 8:32.

“O outou o loo i ai le lagona popole ma le lē tusa, ‘aua le faaatuatuvaleina outou e faailoa atu i le Atua ou manao. Ina ua Ia foaiina mai o Ia lava e ala iā Keriso mo agasala a le lalolagi, na Ia tauave i luga ia te Ia lava mana'oga o agaga uma. ‘O Ia lava sa na lē fa'asaoina Lona lava Alo, a ua tu'uina mai o Ia e sui a'i i tatou uma lava, e lē foai fua mai ea e Ia ia te i tatou mea uma lava faatasi ma Ia i se a?’ Roma 8:32. Pe o le a lē faataunuina ea e Ia Lana folafolaga alofa ua tuuina mai e faamalosi ai i tatou ma tatou maua ai le malosi?

“E leai se isi mea e sili ona naunau i ai le finagalo o Keriso nai lo le togiolaina o Lona tofi mai le pule malosi a Satani.” -*Christ's Object Lessons*, p. 174.

i. E faapefea ona atagia mai i o tatou olaga lenei alofa? 1 Ioane 4:9-12.

“O tagata faigaluega Kerisiano e faamanuiaina a latou taumafaiga e tataua ona latou iloa Keriso; ma ina ua latou iloa o Ia, e tataua ona latou iloa foi Lona alofa. O lo latou agavaa i le avea ai ma tagata faigaluega i le lagi, e fuaina i lo latou mafaia lea ona latou alolofa ma galulue e pei foi ona galue Keriso ma Ia alofa mai ia i tatou.

“ ‘Aua ne'i tatou alolofa tau o le upu,’ o le tala lea a le aposetolo, ‘a o le amio ma le faamaoni.’ O le atoaga o le amio faa-Kerisiano, e mafai ona ausia pe a oo ina puna mai pea i totonu o le loto le naunau e fesoasoani ma faamanuiaina ai nisi. O le siosiomaga o lenei alofa o loo siomia ai le agaga o le tagata talitonu, e mafai ona avea ai o ia ma manogi o le ola e oo atu ai le ola i nisi, ma mafai ai e le Atua ona faamanuiaina lana galuega.” -*The Acts of the Apostles*, p. 551.

a. O le a le uiga na iloga ai le soifuaga o Keriso i Lana galuega mo le faaolataga o tagata? Isaia 53:10, 7.

“O le soifuaga [o Keriso] o se soifuaga sa tumau pea i le faataulaga ofoina o Ia lava. Sa leai sona aiga i lenei lalolagi, se’ivagana ai ni nai uo na agalelei ma saunia ni mea mo Ia i le avea ai o Ia ma tagata femalaga’i solo. Na afio mai o Ia ina ia soifua ma ola faatasi ma i tatou i se olaga mativa, ma galulue faatasi ai ma ē matitiva ma puapuagatia. E le’i iloa o Ia e tagata, e lē o Ia foi o se tagata taualoa, ae na Ia ui atu i totonu o le lotolotoi o le motu o tagata ma Ia faia i ai le tele o mea lelei.” -*Gospel Workers*, pp. 42, 43.

“E le’i maligi Ona loifofoga [le Alo o le Atua] mo Ia lava, e ui lava sa Ia silafia lelei le mea ua taatia mai nei mo Ia i le ala o le a Ia savalia. Ua taatia mai nei i Ona luma Ketesemane, le mea o le a Ia fetaia’i ai ma Ona tiga ua lalata mai. Sa vaaia foi le faitotoa o mamoe, le mea e masani ona taitaiina atu ai mamoe mo le tele o seneturi e tagata na fasia taulaga, ma o le a tatalaina fo’i lea lava faitotoa mo Ia pe a aumaia o Ia ‘e pei o le tamai mamoe ua taitaiina ia fasia.’ Isaia 53:7. O tala atu ua tu mai ai Kalevario le nofoaga o le a faasatauroina ai o Ia. E matautia nauā le pogisa tele ua siomia ai nei le ala ua lē o toe mamao ona savalia lea e Keriso, a o faapea ona tuuina atu ai e Ia Lona agaga o se taulaga mo agasala. Peita’i e lē o le lalata mai o ia tigā ua avea ma ao pogisa ua lafo atu nei i Ona luga i lenei ituaso o le fiafia. E le’i avea Lona mua’i silafia o nei tigā o le a oo ia te Ia, ma mea e faanenefuina ai Lona agaga lē faapito. Na tutulu o Ia ona o le faafanoga o le afe ma afe o Ierusalem - ona o le tauaso ma le loto maa o i latou na Ia afio mai ai e lavea’i ma faamanuia.” -*The Great Controversy*, p. 18.

e. I Ona tigā ma Ona tofotofoga, o le a se mea na avatua ia Iesu le lototele e faataunuaina ai Lana galuega? Isaia 53:11; Eperu 12:2.

“O le i’uga o le finauga a le Faaola ma agaga o le pouliuli, o le olioli lea i ē ua togiolaina, e i’u atu ai i le viiga o le Atua i augātupulaga uma o le ola e faavavau. Ua faapea lava le tāua o se agaga e toatasi i le silafaga a le lagi, ma ua faamalieina ai le finagalo o le Tamā i le tau ua faia mo le togiola; ua faapea foi ona silasila atu o Keriso i fua o Lana taulaga tele na faia, ma faapea ona faamalieina ai Lona finagalo.” -*Ibid.*, p. 652.

“E masani ona fai mai nisi, sa tutulu Iesu, ae le’i iloa lava o Ia e se tasi o soisoi. E moni na avea lo tatou Fa’aola o le Tagata Fa’anoanoa, ua masani foi ma le tigā, auā na Ia tatalaina atu pea Lona finagalo i puapuaga uma o tagata. Ae ui lava ina sa fa’afitia e Lona soifua ia lava, ma ufitia ai i le tigā ma le mafatia i avega, ae sa le’i vaivai ai Lona finagalo. E le’i fa’aalia i Ona fofoga se uiga faavavau ma le mafatia, ae na faaalia mai ai pea lava na o le filemu ma le to’afimālie. O Lona finagalo o se puna o le ola lea, ma e po o fea lava e femaliua’i i ai o Ia, na Ia momoli atu i ai le malologa ma le filemu, le olioli ma le fiafia.” -*Steps to Christ*, p. 120.

a. Pe afai e oo mai fa'aosoosoga i le tagata talitonu, o le a le mea ua saunia ina ia mafai ai ona ia manumalo i lenei taua fa'aleagaga? Efeso 6:11-18.

“E tofufu tagata uma lava ma faaosoosoga; o faanoanoaga e faigata ona onosa'ia, ma faaosoosoga e faigata ona tete'e atu i ai. 'Aua ne'i e tautalatala atu ou fa'afitauli i ou uso a tagata, o ē o loo vaivai e pei lava o oe, a ia e tuuina atu mea uma lava i le Atua i le tatalo. Ia avea ma tulafono i lou loto le 'aua lava ne'i e tautalagia atu se upu e tasi lava o le masalosalo po'o se upu foi e faavaivaia ai se tasi. E tele mea lelei e mafai ona e faia e fa'amalamalamaina ai olaga o isi ma fa'amalosia ai a latou taumafaiga, i upu o le fa'amoemoe ma upu faalototele.” -*Steps to Christ*, pp. 119, 120.

e. Aisea e to'atele ai e gatete i le va o le fa'atuatua ma le masalosalo pe a faaosoosoina ma tofotofoina? O le a la se mea e tatau ona latou faia? Mataio 14:28-31; Iakopo 1:2.

“E i ai nisi e to'atele o loo fetaia'i pea ma faaosoosoga mamafa, ua tauau lava ina a vaivai ma fai ifo lo latou malosi i tauiviga ma o latou lava uiga agasala, atoa ai ma le malosi o lē o loo leaga. 'Aua lava ne'i avea oe ma se tasi e fa'avaivaia ai sē o loo fa'apea ona tauivi ma ona mafatiaga. A ia fa'afiafia atu ia te ia i upu faalototele ma upu o le fa'amoemoe ina ia uuna'ia ai o ia i lona ala. O le mea lea o le a faapea ona susulu atu ai o le malamalama o Keriso mai ia te oe. 'Auā e leai se tasi o i tatou e ola mo ia lava.' Roma 14:7. O o tatou uiga ma amio tatou te le'i mafaufauina, e mafai ona fa'amalosia ma fa'alototeleina ai nisi, po o le fa'avaivaia ai foi ma tosina ese mai ai nisi iā Keriso ma le upu moni.

“E to'atele nisi o lo'o i ai se manatu sesē e uiga i le soifuaga ma le amio a Keriso. Fai mai le manatu o nei tagata, sa aunoa o Ia ma se alofa, leai foi sona uiga fiafia e faaalila i tagata, o Ia fo'i o se tagata sauā, Na te le'i iloa foi se fiafia. O nei manatu pogisa, ua matuā iloga ona faaleagaina ai le aafiaga fa'aleagaga o le toatele.” -*Ibid.*, p. 120.

i. E fa'apefea ona faamalamalamaina le ala o le amiotonu e oo lava i le totonugalemu o tofotofoaga? Faataoto 4:18; Filipi 4:4.

“Atonu e faigata ma gaoā le ala; atonu e i ai fa'afatiatama'i i le itu taumatau ma le itu tauagavale; ae peitai e tatau lava ona tatou onosa'ia le faigata o la tatou faigamalaga; a tatou lagona le vaivai ma manaomia foi se malologa, e tatau lava ona tatou galulue ma faaauau pea; ae pe afai foi tatou te lagona le vaivai, e tatau lava ona tatou tau pea; pe afai tatou te lagona le faavaivai, e tatau lava ona i ai so tatou faamoemoe; auā afai ua avea Keriso ma o tatou taiala, o le a tatou lē toilalo i le taunuu atu i le nofoaga e maua i ai lo tatou malologa. Auā ua uma ona uia e Keriso le ala gaoā i o tatou luma ma ua ia faalauleleiina le ala tatou te savavali ai.

“Ma o luga o lea ala gaoā e tau atu i le ola e faavavau, o loo i ai vaipuna o le olioli e faafouina ai ē ua lailoa ma vaivai.” -*Thoughts from the Mount of Blessing*, p. 140.

a. O le ā le folafolaga a Iesu e tatau ona tatou maua ai le mafuaaga o lo tatou olioli ma tuuina atu ai le viiga i lo tatou Tama o i le lagi? Isaia 41:10; Luka 12:32; I Peteru 4:13.

“E lē o le finagalo o le Atua le mafatia o Lana fanau i ni avega mamafa. Auā e lē o faa’ole’ole lo tatou Alii ia i tatou. E lē o fetalai mai fo’i o Ia iā i tatou, ‘Aua le fefe; e leai ni mea matautia e faalavelaveina ai lou ala.’ Ua Ia silafia lava o loo i ai tofotofoga ma lamatiaga i o tatou ala, ma e manino lava Lona faamalamalamaina mai o ia mea uma ia i tatou. E lē o Lana fuafuaga ia aveeseina Ona tagata mai se lalolagi o le agasala ma le leaga, ae Na te faasino atu i latou i se sulufa’iga e lē mafai ona muta.” -*Steps to Christ*, pp. 122, 123.

e. Ta’u mai nisi o folafolaga matagofie o le filemu ma le olioli na tuuina mai e Iesu. Ioane 14:1-3, 27; 15:11; 16:20.

“I le tauā o loo i o tatou luma, e ao lava ona oo mai ia i tatou nisi o faafatiātama’i fou, e lē gata ina tatou vaavaai atu i mea ua tuana’i, ae fa’apea fo’i ma mea o le a o’o mai, ma tatou fa’apea atu ai, ‘Ua fesoasoani mai Ieova iā i tatou, ua oo mai i le aso nei.’ ‘E pei o Ou aso, e fa’apea fo’i Lou malosi.’ Teuteronomie 33:25. O le a lē sili atu lava se tofotofoga i lo le malosi o le a foa’iina mai iā i tatou e onosa’ia ai. Ona tatou faia lea o la tatou galuega i le mea tonu lava ua tofia i ai i tatou, ma ia tatou matuā talitonu i le a lava le mea o le a o’o mai, o le a foa’iina mai le malosi e tusa ai ma le tofotofoga.

“Ma e lē o toe mamao ae tatalaina loa puipui o le lagi ina se’ia ulufale atu ai o le fanau a le Atua, ona pa’u ifo ai lea i laufofoga o le Tupu mamalu o lenei fa’amanuiaga, o le a avea e pei o se pese e sili ona mālie i o latou taliga, ‘O mai ia, o outou ua faamanuiaina e Lo’u Tamā, ia fai mo outou tofi le malo ua saunia mo outou talu ona faavaeina le lalolagi.’ Mataio 25:34...

“I lo tatou vaavaai atu ai i le manuia silisili ua saunia e fai ma tofi o lē ua faatuatua, ‘se a foi se mea e avatu e le tagata e sui ai lona ola?’ Mataio 16:26.... O le agaga ua faaolaina ma ua faamamāina mai le agasala, ma ua faapaia ona uiga tāua uma ma lona malosi uma ua tuuina atu faapitoa e auauna atu ai i le Atua, e matuā sili atu lona tāua; ma e iai le olioli i le lagi i le mea o loo afio ai le Atua ma le ‘au agelu paia, ona o le agaga e toatasi ua faaolaina, o se olioli lea e faaalua i viiga o le manumalo paia.’ -*Ibid.*, pp. 125, 126.

1. E faapefea ona oo atu i tagata uma - e oo lava ia i latou e lē iloa le Tusi Paia - faapea foi le upumoni?
2. E faapefea ona faaalua e le Alii Lona alofa e le faatuaomia i tagata?
3. O le a le puna o le mautinoaga na maua e Iesu ina ua fetaia’i ma Ona mafatiaga e oo lava i Lona maliu?
4. O le a le sauniuniga e tatau ona tatou manatua pe a tatou fetaia’i ma tofotofoga?
5. I le olaga o aso taitasi, o le a se mea e tatau lava ona tuu i le mafaufau o le tagata talitonu?

Taulaga mo Sapati Muamua



Sapati, Iulai 5, 2026

Fa'alautele o le falelotu i Chennai, India

Ia tatou tutu fa'atasi e lagolago le fa'ama'eaina o lenei falelotu i se aai e 12 miliona tagata! (Tagai itulau 4.)



Sapati, Aukuso 1, 2026

Matagaluega o A'oa'oga a le Koneferenisi Aoao

Ua valaauina i tatou e a'oa'o, a'oa'o, a'oa'o, ma e mana'omia tupe e fa'atino ai ma le manuia. (See p. 25)



Sapati, Setema 5, 2026

A'oga Misionare Fa'ale-Tusi Paia i Filipaina.

Se'i o tatou fa'amalosia lenei a'oga ina ia avea ma mea uma e finagalo i ai le Atua. (Tagai itulau e 51.)